



北史卷五十五
列傳第四十三

孫搴

陳元康

杜弼 子臺卿

房謨 子恭懿

張纂

張亮 趙起

徐遠

張曜

王峻

王紘

敬顯儁

平鑒

唐邕

白建

元文遙

趙彥深

赫連子悅

馮子琮 子慈明

郎基 子茂

孫舉字彥舉樂安人世寒賤少勵志勤學自檢校御史再遷國子助教太保崔光引修國史歷行臺郎後預瞿祖螭反逃於王元景家遇赦乃出孫騰以宗情薦之齊神武未被知也會神武西征登鳳陵命中外府司馬李義深相府城局李士畧共作檄文皆辭請

以舉代神武乃引舉入帳自為吹火催促之舉神色安然授筆立就其文甚美神武大悅即署相府主簿專典文筆又能通鮮卑語兼宣傳號令當煩劇之任大見賞重賜妻韋氏既士人子女又兼色貌時人榮之文襄初欲之鄴總知朝政神武以其年少未許舉為致言乃果行恃此自乞特進文襄但加散騎常侍時大括人為軍士逃隱者身及主人三長守令罪以大辟沒其家於是所獲甚眾舉之計也舉學淺行薄邢邵嘗謂曰須臾讀書舉曰我精騎三千足敵君羸卒數萬舉少時與溫子昇齊名嘗謂子昇卿文何如我子昇謙曰不如卿舉要其為誓子昇笑曰但知劣於卿便是何勞且曰舉悵然曰卿不為誓事可知矣舉常服棘刺丸李諧調之曰卿應自足何假外求坐者皆笑司馬子如與高季式召舉飲酒醉甚而卒神武親臨之曰折我右臂贈吏部尚書青州刺史

更須

書

陳元康字長猷廣宗人也父終德魏濟陰內史元康貴贈度支尚書謚曰貞元康頗涉文史機敏有幹用魏正光中從李崇北伐以軍功賜爵臨清男普泰中除主書累遷司徒高昂記室初司馬子如高季式與孫奉劇飲奉醉死神武命求好替子如舉魏收他日神武謂季式曰卿欲殺我孫主簿魏收作文書都不稱我意司徒嘗道一人謹密是誰季式以元康對曰是能夜聞書快吏也召之一見便授大丞相功曹內掌機密善陳事意不為華藻遷大行臺都官郎封安平子軍國多務元康問無不知神武臨行留元康在後馬上有所號令九十餘條元康屈指數之盡能記憶神武甚親之曰如此人世間希有我今得之乃上天降佐也時趙彥深亦知機密人謂之陳趙而元康勢居趙前性又柔謹神武之伐劉蠡升天寒雪深使人舉擲元康於壇下作軍書颯颯運筆筆不及凍俄

傾數紙及出神武目之曰此何如孔子邪神武嘗怒文襄親加蹶躡極口肆罵以告元康元康俯伏泣下霑地曰王教世子過矣神武曰我性急曠阿惠常如此元康大啼曰一度為甚況常然邪神武自是為之懲忿時或恚撻輒曰勿使元康知又謂左右曰元康用心誠實必與我兒相抱死高仲密之叛神武知其由崔暹將殺之文襄匿暹為之請神武曰我為余不殺然須與若手文襄乃出

暹而謂元康曰暹若得杖不須見我及暹見神武將解衣受罰元康趨入止伍伯因歷階升曰王方以天下付世子世子有一崔暹不能免其杖父子尚爾況世間人邪神武意解曰不由元康崔暹得一百乃捨之文襄入輔居鄴下崔暹崔季舒崔昂等竝被任用張亮張徽纂竝為神武待遇然皆出元康下神武每與元康久語文襄門外待接之時人語曰三崔二張不如一康左衛將軍郭瓊

以罪死子婦范陽盧道虞女也沒官神武啟以賜元康爲妻元康地寒時以爲殊賞元康遂棄故妻李氏識者非之元康便辟善事人而不能平心處物溺於財利受納金帛不可勝紀責負交易遍於州郡爲清論所譏從神武於芒山將戰遺失陣圖元康冒險求得之西師旣敗神武會諸將議進取策或以爲人馬疲瘦不可遠追元康曰兩雄交爭歲月已久今得大捷便是天授時不可失必須乘勝追之神武曰若遇伏兵孤何以濟元康曰前沙苑還軍彼尚無伏今者奔敗何能遠謀捨之必成後患神武不從累遷大行臺左丞及神武疾篤謂文襄曰芒山之戰不用元康言方貽汝患以此爲恨死不瞑目事皆當與元康定也神武崩秘不發喪唯元康知之文襄嗣事自晉陽將之鄴令元康預作神武條教數十紙留付段孝先趙彥深在後以次行之別封昌國縣公以從嘉名侯

景反文襄逼於諸將欲殺崔暹以謝之元康諫曰今枉殺無辜虧廢刑典豈直上負天神何以下安黎庶暹一作朝錯前事願公慎之文襄乃止高岳討侯景未克文襄欲遣潘相樂副之元康曰相樂緩於機變不如慕容紹宗且先王有命稱堪敵景時紹宗在遠文襄欲召見之恐其驚叛元康曰紹宗知元康特蒙顧待新使人來餉金以致誠款元康欲安其意故受之而厚答其書保無異也乃任紹宗遂破景賞元康金五十斤王思政入潁城諸將攻之不能拔元康進曰公自匡朝政未有殊功雖敗侯景本非外賊今潁城將陷願公因而乘之足以取威定業文襄令元康馳驛觀之復命曰必可拔文襄乃親征潁川益發衆軍決旣至而克之賞元康金百銖

初魏朝授文襄相國齊王諸將皆勸恭膺朝命元康以爲未可崔暹因間之薦陸元規爲大行臺郎欲分元康權元康旣貪貨賄文

此君臣相佐
不能至此

襄內漸嫌之又欲用爲中書令以閑地處之事未施行屬將受魏
禪元康與楊愔崔季舒竝在坐將大遷除朝士共品藻之文襄家
倉頭蘭固成掌厨與其弟阿改謀害文襄阿改時事文宣常執刀
從期聞東齋叫卽加刃於文宣時文宣別有所之未還而難作固
成因進食置刀盤下而殺文襄元康抱文襄文襄曰可惜可惜與
賊爭刀鬻解被刺傷重腸出猶手書辭母口占祖孝徵陳權宜至
夜而終時年四十三時楊愔狼狽走出遺一靴崔季舒逃匿于厨
庫直紇奚舍樂捍賊死散都督王師羅戰傷監厨倉頭薛豐洛率
宰人持薪以赴難乃禽盜固成一名京事見齊本紀秘文襄凶問
故殞元康於宮中託以出使南境虛除中書令明年乃贈司空謚
曰文穆元康卒後母李氏哀感發病而終贈廣宗郡君謚曰貞昭
元康子善藏嗣善藏溫雅有鑒裁位給事黃門侍郎隋開皇中尚

書詳

書郎大業初卒於彭城郡贊務

杜弼字輔玄中山曲陽人也祖彥衡淮南太守父慈度繁時令弼
幼聰敏家貧無書年十二寄郡學受業同郡甄琛爲定州刺史簡
試諸生見而策問應答如響大歎異之命其二子楷寬與交州牧
任城王澄聞而召問深相嗟賞許以王佐之才澄琛還洛稱之丞
相高陽王等多相招命但父祖官薄不獲優叙以軍功起家征虜
府墨曹參軍典管記弼長於筆札每爲時輩所推孝昌初除太學
博士遷先州曲城令爲政清靜遠近稱之弼父在鄉爲賊所害弼
居喪六年以常調除侍御史臺中彈奏皆見信任儀同竇泰西伐
詔弼監軍及秦失利自殺弼與其徒六人走還陝州刺史劉貴鑠
送晉陽神武責以不諫爭賴房謨諫以免累遷大行臺郎中又引
典掌機密甚見信待或有造次不及書教直付空紙卽令宣讀承

間密勸受禪神武舉杖擊走之相府法曹辛子炎諮事云取署子炎讀署爲樹神武怒其犯諱杖之於前弼進曰孔子言徵不言在子炎可恕神武罵曰眼看人瞋乃復牽經引禮叱令出去弼行十許步呼還子炎亦蒙宥文襄在鄴聞之謂楊愔曰王左右賴此人天下蒙利豈獨吾家也初神武自晉陽東出改介朱氏貪政使人入村不敢飲社酒及平京洛貨賄漸行弼以文武在位罕有廉潔言之神武神武曰弼來我語爾天下濁亂習俗已久今督將家屬多在關西黑獺常相招誘人情去留未定江東復有一吳老翁蕭衍專事衣冠禮樂中原士大夫望之以爲正朔所在我若急作法網恐督將盡投黑獺士子悉奔蕭衍則何以爲國爾宜少待吾不忘之及將有沙苑之役弼又請先除內賊却討外寇指諸勳貴掠奪百姓神武不荅因令軍人皆張弓挾矢舉刀按穉以夾道使弼

冒出其間曰必無傷也弼戰慄流汗神武然後喻之曰箭雖注不射刀雖舉不擊稍雖按不刺爾猶頓喪寬膽諸勳人觸鋒刃百死一生縱其貪鄙所取處大弼頓顙謝曰愚人不識至理後破芒山軍命爲露布弼卽書絹曾不起草以功賜爵定陽縣男奉使詣闕魏帝見之九龍殿曰聞卿精學聊有所問經中佛性法性爲異弼曰正是一理又問曰說者妄皆言法性寬佛性愜如何弼曰在寬成寬在愜成愜若論性體非愜非寬詔曰旣言成寬成愜何得非愜非寬弼曰若定是寬則不能爲愜若定是愜亦不能爲寬以非寬非愜所成雖異能成恒一上稱善引入經庫賜地持經一部帛百疋弼性好名理探味玄宗在軍恒帶經行注老子道德經二卷表上之遷廷尉卿會梁貞陽侯蕭明等入寇彭城大都督高岳行臺慕容紹宗討之詔弼爲軍司攝行臺左丞臨發文襄賜胡馬一

疋曰此廐中第二馬孤恒自乘聊以爲贈又令陳政要可爲鑒誠者弼曰天下大務莫過刑賞二端賞一人使天下之人喜罰一人使天下之人服二事得衷自然盡美文襄大悅曰言雖不多於理甚要握手而別破蕭明廻破侯景於渦陽後魏帝集名僧於顯陽殿講說佛理救弼升師子座莫有能屈帝歎曰此賢若生孔門則何如也關中遣王思政據潁州朝廷以弼行潁州攝行臺左丞及潁州平文襄曰卿試論思政所以禽弼曰思政不察逆順之理不識大小之形不度強弱之勢有此三蔽宜其俘獲文襄曰古有逆取順守大吳困於小越弱燕能破強齊卿之三義何以自立弼曰王若順而不太大而不強強而不順於義或徧得如聖旨今旣兼備鄙言可以還立文宣作相位中書令仍長史進爵爲侯弼志在匡贊知無不爲及受命以預定策功遷衛尉卿別封長安縣伯常

與邢邵扈從東山共論名理邢以爲人死還生恐是爲蛇畫足弼曰物之未生本亦無也無而能有不以爲疑因前生後何獨致怪邢云聖人設教本由勸獎故懼以有來望各遂其性弼曰聖人合德天地齊信四時言則爲經行則爲法而云以虛示物以詭勸人安得使北辰降光龍宮韞牘旣如所論福果可以鎔鑄性靈弘獎風教爲益之大莫極於斯此卽真教何謂非實邢云季札言無不之亦言散盡若復聚而爲物不得言無不之也弼曰骨肉下歸於土冤氣則無不之此乃形墜冤游往而非盡由其尚存故云無所不之若也全無之將焉適邢云神之在人猶光之在燭燭盡則光窮人死則神滅弼曰燭則因質生光質大光亦大人則神不係形形小神不小故仲尼之智必不短於長狄孟德之雄乃遠奇於崔琰其後別與邢書前後往復再三邢理屈而止文多不載又以本

官行鄭州事未發爲家客告弼謀反案察無實久乃見原因此絕朝見復坐第二子廷尉監臺卿斷獄稽遲與寺官俱爲郎中封靜哲所訟徙臨海鎮時楚州人東方白額謀反鎮爲賊帥張綽潘天命等所攻弼率厲城人終得全固文宣嘉之敕行海州事後除膠州刺史弼所在清靜廉潔爲吏人懷之耽好玄理注莊子惠施篇并易上下繫辭曰新注義苑竝行於世性質直在霸朝多所匡正及文宣作相致位寮首初聞揖讓之議猶有諫言帝又嘗聞弼治國當用何人對曰鮮卑車馬客會須用中國人帝以爲譏已高德正居要不能下之乃至於衆前面折德正德正深以爲恨數言其短又令主書杜永珍密啟弼在長史日受人屬大營婚嫁帝內銜之弼恃舊仍有公事陳請十年夏上因飲酒積其愆失遣使就州斬之尋悔驛追不及子藎及遠徙臨海鎮次子臺卿先徙東豫州

乾明初竝得遷鄴天統五年追贈弼開府儀同三司尚書右僕射武平元年又贈驃騎大將軍謚曰文肅藎字子美學業不如弟臺卿而幹局過之武平中位大理少卿兼散騎常侍聘陳使主吏部郎中隋開皇中終於開州刺史子公贍仕隋位安陽令公贍子之松大業中起居舍人

隋臣

臺卿字少山好學博覽解屬文仕齊位中書黃門侍郎修國史旣居清顯忌害人物趙彥深和士開高阿那肱等親信之後兼尚書左丞省中以其耳聾多戲弄之下辭不得理者乃至大罵臺卿見其口動謂爲自陳令史又故不曉喻訓對往往乖越聽者以爲嗤笑及周武平齊歸鄉里以禮記春秋講授子弟隋開皇初被徵入朝臺卿採月令觸類廣之爲書名玉燭寶典十二卷至是奏之賜帛二百疋患耳不堪吏職請修國史拜著作郎後致仕終於家有

集十五卷撰齊記一十卷竝行於世無子

房謨字敬放河南洛陽人也其先代人本姓屋引氏少淳厚雖無造次能而沈深內敏正光末歷位昌平代郡太守所在著廉惠及六鎮亂謨率郡人入九崢山結壘拒守時外無救援乃率所部奔中山遇鮮于脩禮之亂朝廷以謨得北邊人情以爲假燕州事北轉至幽州南爲修禮所執仍陷葛榮榮敗余朱榮故授行冀州事尋除太寧太守榮死其黨徵兵謨不應前後斬其三使遣弟毓詣闕孝莊以毓爲都督毓弟欽爲行臺竝持節詣謨同爲經畧及京都淪覆爲賊黨建州刺史是蘭安定執繫州獄蜀人聞謨被囚並叛安定於是給謨弱馬令軍前慰勞諸賊見謨莫不遙拜謨先所乘馬安定別給將士戰敗蜀人得之謂謨遇害莫不悲泣善養其馬不聽乘騎兒童婦女競投草粟皆言此房公馬也其結愛人心

如此余朱世隆聞而嘉之捨其罪以爲東北道行臺及余朱氏敗濟州刺史侯景以謨先款附推謨降首謨以受眷余朱不宜先爲反覆不從其計神武入洛再遷潁川太守魏孝武帝入關神武以謨忠貞遣其弟毓爲大使持節勞問時軍國未寧徵發煩速至有數使同徵一物公私勞擾謨請事遣一使下自催勅朝廷從之徵爲丞相右長史以清直甚被賞遇謨悉心盡力知無不爲前後賜其奴婢率多免放神武後賜其生口多黥面爲房字而付之神武討關右以謨兼大行臺左丞長史如故總知府省務天平三年行定州事請在左右拾遺補闕固不肯行神武責而罷之未幾出爲兗州刺史謨選用廉清廣布恩信寮屬守令有犯必知雖號細密百姓安之轉徐州刺史始謨在兗州彭城慕其政化及爲刺史合境欣悅謨爲政如在瑕丘先是當州兵皆寮佐驅使饑寒死病動

至千數。謨至皆加檢勒，不令煩擾。以休假番代洗沐，督察主司親自檢視。又使傭賃令作衣服，終歲還家，無不溫飽。全濟甚多。時梁魏和好，使人入其界者咸稱歎之。神武與諸州刺史書叙謨及廣平太守羊敦、廣宗太守竇瑗、平原太守許季良等清能以爲勸勵。謨曾啟神武以天下未寧，宜降婚勳，將收將士心。深見納。魏朝以河南數州鄉俗絹濫，退絹一疋，徵錢三百人，庶苦之。謨乃表請錢絹兩受任，人所樂。朝廷從之，徵拜侍中、監國史。謨無他材學，每求退身不許。尋兼吏部尚書、加衛大將軍。以子子遠罪解官。久之，詔復本將軍，起爲大丞相、左長史。後除晉州刺史，加驃騎大將軍。又攝南汾州事。先時境接西魏，土人多受其官爲之防守。至是，酋長鎮將及都督守令前後降附者三百餘人。謨撫接殷勤，人樂爲用。爰及深險胡夷咸來歸服。謨常以已祿物克其饗賚，文襄嘉之。聽

用公物。西魏懼，乃增置城戍，募義者自相糾合，擊破之。自是龍門已北，西魏戍皆平。文襄特賜粟千石，絹二百疋，班示天下。卒於州。州府相帥贈物及車牛，妻子遵其遺志，拒而不納。謨寡嗜慾，貞白自守。然內營家產，足爲富贍，不假官俸。是以世稱清白。贈司空，謚曰文惠。謨與子結婚盧氏。謨卒後，盧氏將改適他姓。有平陽廉景孫者，少厲志節，以明經舉郡孝廉，爲謨所重。至是訟之臺府，不爲理。乃持繩詣神廟前，北面大呼曰：「房謨清吏，忠事高祖，及其死也，妻子見陵，神而有知，當助申之。」今引決訴於地下，便以繩自經於樹。衛士見之，救解送所。司朝廷哀其至誠，命女歸房族。謨前妻子子遠險薄，謨甚嫌之，不以爲子。列時以謨爲後妻，盧氏所譖。神武亦以責謨，謨陳其惡。神武弗信，自收恤之。令與諸子同學。久乃令還，後與任胄等謀殺神武。事發，神武歎曰：「知子莫若父，信哉。」因上

言房謨鄭述祖李道璠三家理宜從法竊以謨立身清白履行忠謹鄭仲禮嚴祖庶兒晚始收拾李世林生自外養屬絕本宗三人特乞罪止一房魏帝許焉及謨卒子廣嗣廣弟恭懿恭懿字慎言沈深有局量達於從政仕齊平恩令濟陰太守並有能名齊亡不得調後預尉遲迥亂廢於家隋開皇初吏部尚書蘇威舉爲新豐令政爲三輔最上聞而嘉之賜物四百段以所得賜分給窮乏未幾復賜米三百石又振貧人上聞止之時雍州諸縣令每朔朝謁上必呼恭懿至榻前訪以化下之術威又薦之歷澤德二州司馬盧愷復奏其政美上甚異之復賜以帛諸州朝集稱爲勸勵之首以爲上天宗廟之所祐助豈朕寡薄能致朕卽拜爲刺史卿等宜師之乃下詔褒美因授海州刺史未幾國子博士何妥奏恭懿尉遲迥之黨威愷曲相舉薦上大怒恭懿竟放嶺南未幾徵還至洪

州卒論者寬之

張纂字徽纂代郡平城人也初事尔朱榮又爲尔朱兆長史使於神武遂被顧讖及相州城拔參丞相軍事封武安縣伯累遷神武行臺右丞從征玉壁大軍將還山東至晉州忽遇寒雨士卒饑凍有死者州以邊禁不聽入城時纂爲別使遇見輒令開門內之分寄人家給其火食多所全濟神武聞而善之纂性便僻事神武二十餘歲通傳教令甚見親賞文宣時卒於護軍將軍

張亮字伯德西河隰城人也初事尔朱兆兆奔秀容左右皆密通誠款唯亮獨無啟疏及兆敗竄於窮山令亮及倉頭陳山提斬已首以降皆不忍兆乃自縊於樹亮因伏屍哭神武嘉歎之授丞相府參軍漸見親待委以書記之任天平中爲文襄行臺郎中典七兵事雖爲臺郎常在神武左右遷右丞高仲密之叛與大司馬斛

律金守河陽周文帝於上流放火船欲燒河橋亮乃備小艇百餘
皆載長鎖鎖頭施鈿火船將至卽馳小船以釘釘之引鎖向岸火
船不得及橋橋全亮之計也後自太中大夫拜幽州刺史薛琬嘗
夢亮於山上持絲以告亮且占之曰山上絲幽字也君其爲幽州
乎數月而驗累遷尚書右僕射西南道行臺亮性質直勤力强濟
深爲神武文襄信委然少風格好財利久在左右不能廉潔及歷
數州咸有贖貨之號天保初別封安定縣男位中領軍卒贈司空
時霸府又有趙起徐遠者竝見任委起廣平人性沈謹神武頻以
爲相府騎兵二局典兵馬十餘載至文宣卽位累遷大鴻臚卿雖
歷九卿侍中常以本官監兵馬出內居腹心寄與二張相亞武平
中卒於師贈都督滄州刺史遠廣寧人爲丞相騎兵參軍事深爲
神武所知累遷棗州刺史政有恩惠郭邑大火城人亡產業遠

本史作耀

躬自赴救對之流涕仍爲經營皆得安立卒於衛尉卿起遠前書
竝有傳更無異迹今附此云
張曜字靈光上谷昌平人也少貞謹韓軌爲御史劾州府僚佐及
軌左右以贓挂網者百餘人唯曜以清白免天保初賜爵都鄉男
累遷尚書右丞文宣曾近出令曜居守帝夜還曜不時開門勒兵
嚴備帝駐驛門外久之催迫甚急曜以夜深須火至面識門乃可
開於是獨出見帝帝笑曰卿欲效郅君章也乃使曜前開門然後
入嗟賞之賜以錦綵大寧初遷秘書監曜歷事累世奉職恪勤咸
見親待未嘗有過每得祿賜輒散之宗族性節儉率素車服飲食
取給而已好讀春秋月一遍時人北之賈梁道趙彥深嘗謂之曰
君研尋左氏豈求杜服繆邪曜曰何爲其然乎左氏之書備叙言
事惡者可以自戒善者可以庶幾故勵已溫尋非欲詆訶古人得

失也天統元年奏事暴疾仆於御前武成下坐臨視呼不應帝泣曰失我良臣也旬日卒贈尚書右僕射謚曰貞簡

王峻字巒嵩靈丘人也明悟有幹畧歷事神武文襄爲相府佐賜爵北平男除營州刺史營州地接邊賊數爲人患峻至州遠設斥候廣置疑兵賊不敢發合境獲安先是刺史陸士茂詐殺室帝八百餘人因此朝貢遂絕至是峻要其行路大破之虜其首帥厚加恩禮放遣之室帝遂獻誠款朝貢不絕峻有力焉蠕蠕主菴羅辰東徙峻設伏大破之於此遁走歷位尚書河清中位南道行臺坐違格私度禁物并盜截軍糧有司定處斬刑家口配沒詔決鞭一百除名配甲坊蠲其家口武平初卒於侍中贈司空

王紘字師羅太安狄郡人也父基頗讀書有智畧初從葛榮與周文帝相知及周文據關中神武遣基與長史侯景同往焉周文留

基不遣後乃逃歸歷南益北豫二州刺史所歷皆好聚斂然性和直吏人不甚怨苦後爲奴所害贈吏部尚書紘善騎射愛文學性敏捷年十三見揚州刺史太原郭元貞撫其背曰讀何書曰誦孝經曰孝經云何曰在上不驕爲下不亂元貞曰吾豈驕乎紘曰君子防未萌亦願留意元貞稱善十五隨父在北豫州行臺侯景與人論掩衣法爲當左右尚書敬顯儁曰孔子云微管仲吾其被髮左衽以此言之右衽應是紘進曰國家龍飛朔野雄步中原五帝異儀三王殊制掩衣左右何足是非景奇其早慧賜以名馬與和中文襄召爲庫直奉朝請文襄遇禍紘冒刃捍禦以忠節進爵平春縣男頗爲文宣所知爲領左右都督嘗與左右飲酒曰快哉大樂紘曰亦有大苦帝曰何苦紘曰長夜荒飲不悟國破是謂大苦帝默然後責紘曰爾與紘奚舍樂同事我兄舍樂死爾何不死紘

曰君亡臣死自是常節但賊堅力薄故臣不死帝使燕子獻反縛之長廣王捉頭帝手刃將下紘呼曰楊遵彥崔季舒逃難位至僕射尚書冒死效命之士翻見屠戮曠古未有此事帝投刃於地曰王師羅不得殺遂舍之後拜驃騎大將軍武平初加開府儀同三司上言突厥與周男女來往必相影響南北寇邊宜爲之備五年陳人寇淮南封輔相議討之紘曰若復出頓江淮恐北狄西寇乘弊而來莫若薄賦省徭息人養士使朝廷協睦遐邇歸心征之以仁義鼓之以道德天下皆當肅清豈直江南僞陳而已高阿那肱謂衆曰從王武衛者南席衆皆同焉尋兼侍中聘周使還卽正未幾卒紘好著述作鑒誡二十四篇

敬顯儁字孝英陽平太平人也少英俠從神武信都義舉歷位度支尚書神武攻鄴顯儁督造土山以功封永安縣侯出內多歷顯官所在著名河清中卒於兗州刺史子長瑜武成時爲廣陵太守多所受納刺史陸駿將表劾之以貨事和士開以書屏風詐爲長瑜獻武成大悅駿表尋至遂不問焉遷合州刺史陷於陳卒子德亮齊亡後負屍歸德亮隋開皇中卒於尚書郎

平鑒字明達燕郡薊人也祖延魏安平太守父勝安州刺史鑒少聰敏受學於徐遵明受詩禮於弘農楊文懿通大義不爲章句雅有豪俠氣孝昌末見天下將亂乃之洛陽與慕容儼以客騎馬爲業兼習弓矢鑒性巧夜則胡晝以供衣食俄奔尔朱榮榮大奇之以軍功累遷襄州刺史神武起兵信都鑒棄州自歸卽授本官文襄輔政封西平縣伯遷懷州刺史鑒奏請於州西故軹關道築城以防西軍從之尋而魏將楊標來攻時新築之城糧仗未集素乏水南門內有大井隨汲卽竭鑒具衣冠俯井而祝至旦而井泉湧

溢有異於常合城取足揚示敵人將士既覩非常勇氣自立楊標
敗以功進開府儀同三司累遷揚州刺史其妻生男鑒因喜酣醉
擅免境內囚誤免關中細作二人醒而知之上表自劾文宣特原
其罪賜犢百頭羊二百口酒百石令作樂河清二年重拜懷州刺
史時和士開使求鑿愛妾阿劉卽送之仍謂人曰老公失阿劉與
死何異要自爲身計不得不然後卒於都官尚書贈司空謚曰文
子子敬嗣輕險無賴姦穢所至禽獸不若隋開皇中爲晉州行參
軍爲并州總管秦主所殺

唐邕字道和太原晉陽人也其先自晉昌徙焉父靈芝魏壽陽令
邕貴贈司空公邕少明敏有材幹初直神武外兵曹以幹濟見知
擢爲文襄大將軍督護文襄崩事出倉卒文宣部分將校鎮壓四
方夜中召邕支配造次便了帝甚重之天保初稍遷給事中兼中

書舍人封廣漢鄉男及從征塞虜黃門侍郎袁猛舊典騎兵事至
是爲割配遲留鞭杖一百仍令邕監騎兵事以猛賜邕文宣頻年
出塞邕必陪從專掌兵機承受敏速自軍吏已上勞效由緒無不
諳練占對如響或御前簡閱邕多不執文簿唱官名未嘗謬誤七
年於羊汾堤講武令邕總爲諸軍節度事畢仍監宴射之禮親執
其手引至太后前坐於丞相斛律金上故太后云邕一人當千仍
別賜錢綵邕非唯強濟明辯亦善揣上意是以委任彌重帝嘗白
太后云邕手作文書口且處分耳又聽受實是異人一日中六度
賜物又嘗解所服青鼠皮裘賜邕云朕意在與卿共弊除兼給事
黃門中書舍人文宣嘗登并州童子佛寺望并州城曰此何等城
或曰金城湯池天府之國帝云我謂唐邕是金城此非也後謂邕
云高聽正妄說卿短而薦主書郭敬朕已殺之卿劬勞旣久欲除

卿作州頻敕楊遵彥求堪代卿者如卿實不可得所以遂停文宣或切責侍臣云觀卿等不中與唐邕作奴其愛遇如此孝昭作相署相府司馬皇建元年除給事黃門侍郎太寧元年除大司農卿河清元年突厥入寇遣邕驛赴晉陽纂集兵馬在路聞虜將逼邕斟酌事宜改敕更促期會由此兵士限前畢集後拜侍中并州大中正護軍將軍從武成幸晉陽帝至武軍驛因醉責虞侯都督范洪將殺之邕諫以爲若非酒行戮族誅人無所怨假實有大罪因酒殺人恐招橫議洪因得免死邕又以軍人教習田獵依令十二月月別三圍以爲疲弊請每月兩圍又奏河陽晉州與周連境請於河陽懷州永橋義寧烏籍各徙六州軍人并家立軍府安置以備機急之用帝竝從之未幾出爲趙州刺史侍中護軍大中正悉如故謂曰朝臣未有帶侍中護軍中正臨州者以卿舊勲故有此

舉放卿百餘日休息至秋間當卽召邕政頗嚴酷然抑挫豪強公事甚理尋除中書監仍侍中遷尚書右僕射武平初坐斷事阿曲爲御史所劾除名久之以舊恩復除將軍開府累遷尚書令封晉昌王高思好構逆令邕赴晉陽監勒諸軍事平錄尚書事屬周師攻洛陽右丞相高阿那肱赴援邕配割不甚從允那肱譖之由是被疎七年車駕將幸晉陽敕斛律孝卿總騎兵事多自決邕恃舊一旦爲孝卿所輕鬱快形於辭色帝從平陽敗後狼狽歸邕懼那肱譖懟恨孝卿輕已遂留晉陽與莫多婁敬顯等樹安德王爲帝尋降周邕依例授上開府儀同大將軍再遷戶部轉少司馬封安福郡公遷鳳州刺史隋開皇初卒邕性識明敏在齊一代典執兵機是以九州軍士四方勇募強弱多少番代往還器械精麤糧儲虛實精心勤事莫不諳知自大寧以來奢侈糜費比及武平之

末府藏漸虛邕支度取捨大有裨益然既被任遇意氣漸高其未經府寺陳訴起覽辭牒條數甚多俱爲憲臺及左丞彈劾竝御注放免司空從事中郎封長業太尉記室參軍平濤竝爲徵官錢違限邕各杖背三十齊時宰相未有撾撻朝士至是大駭物望三子長子君明開府儀同三司開皇初卒於應州刺史次子君徹中書舍人隋戎順二州刺史大業中卒於武賁郎將少子君德以邕降周伏法齊朝因神武作相丞相府外兵騎兵曹分掌兵馬及受禪諸司咸歸尚書唯此二曹不廢令唐邕白建主之謂之外兵省騎兵省後邕建位望轉隆各置省主令中書舍人分判二省事故世稱唐白云

白建字彥舉太原陽邑人初入大丞相府任騎兵曹典文帳明解書計爲同局所推天保末兼中書舍人孝昭輔政除大丞相騎兵

參軍河清二年除員外散騎常侍仍舍人三年突厥入境代忻二牧悉是細馬合數萬疋在五臺山北柏谷中避賊賊退敕建送馬定州付人養飼建以馬瘦違敕以便宜從事戎馬無損建有力焉武平末歷位尚書特進侍中中書令封高昌郡公父長命贈開府儀同三司都官尚書建雖無他才伎勤於在公以溫柔自處與唐邕俱以典執兵馬致位卿相諸子幼弱俱爲州郡主簿男女婚嫁皆得勝流卒贈司空

元文遙字德遠河南洛陽人也魏昭成皇帝六世孫也五世祖常山王遵父晞有孝行父卒廬於墓側而終文遙貴贈特進開府儀同三司中書監謚曰孝文遙敏慧夙成濟陰王暉業每云此子王佐才也暉業常大會賓客時有人將何遜集初入洛諸賢皆贊賞之召河間邢邵試命文遙誦之幾遍可得文遙一覽便誦時年始

十餘歲濟陰王曰我家千里駒今定如何邢云此殆古來未有起家員外散騎侍郎遭父喪服闋除太尉東閣祭酒以天下方亂遂解官侍養隱於林慮山武定中文襄徵爲大將軍府功曹齊受禪於登壇所授中書舍人宣傳文武號令楊遵彥每云堪解穰侯印者必在斯人後忽中旨幽執竟不知所由如此積年文宣後自幸禁獄執手愧謝親解所著金帶及御服賜之卽日起爲尚書祠部郎中孝昭攝政大丞相府功曹參典機密及踐祚除中書侍郎封永樂縣伯參軍國大事及帝大漸與平秦王歸彥趙郡王叡等同受顧託迎立武成武成卽位任遇轉隆歷給事黃門侍郎散騎常侍侍中中書監天統二年詔特賜姓高氏籍屬宗正子弟依例歲時入廟朝祀再遷尚書左僕射進封寧都郡公仍侍中文遙歷事三主明達世務每臨軒大采多令宣敕號令文武聲韻高朗發吐

無滯然探測上旨時有委巷之言故不爲知音所重齊因魏宰縣多用廝濫至於士流恥居百里文遙以縣令爲字人之功遂請革選於是密令搜揚貴游子弟發敕用之猶恐其披訴總召集神武門令趙郡王叡宣旨唱名厚加慰諭士人爲縣自此始也旣與趙彥深和士開同被任遇雖不如彥深清貞守道又不爲士開貪淫亂政於季孟之間然性和厚與物無競故時論不在彥深之下初文遙自洛遷鄴唯有地十餘頃家貧所資衣食魏之將季宗姓被侮有人冒相侵奪文遙卽以與之及貴此人尚在乃將家逃竄文遙大驚追加慰撫還以與之彼人愧而不受彼此俱讓遂爲閑田至後主嗣位趙郡王叡婁定遠等謀出和士開文遙亦參其議叡見殺文遙由是出爲西兗州刺史詣士開別士開曰處得言地使元家兒作令僕深負朝廷旣言而悔仍執手慰勉之猶慮文遙自

疑用其子行恭爲尚書郎以慰其心士開死自東徐州刺史徵入朝竟不用卒行恭美姿貌有父風兼俊木位中書舍人待詔文林館齊亡陽休之等十八人同入闕稍遷司勳下大夫隋開皇中位尚書郎坐事徙瓜州而卒行恭少頗驕恣文遙令與范陽盧思道交游文遙嘗謂思道云小兒比日微有所知是大弟之亦然白擲劇飲甚得師風思道荅云六郎辭情俊邁自是克荷堂構而白擲趙隱字彥深自云南陽宛人漢太傅喜之後高祖父難爲齊州清河太守有惠政遂家焉清河後改爲平原故爲平原人也隱避齊廟諱改以字行父奉伯仕魏位中書舍人行洛陽縣令彥深貴贈司空彥深幼孤貧事母甚孝年十歲曾候司徒崔光光謂賓客曰古人觀眸子以知人此人當必遠至性聰敏善書計安閑樂道不

素

神

雜交游爲雅論所歸服昧爽輒自埽門外不使人見率以爲常初爲尚書令司馬子如賤客供寫書子如善其無誤欲將入觀省舍隱靴無瓊衣帽穿弊子如給之用爲書令史月餘補正令史神武在晉陽索二史子如舉彥深後拜子如開府參軍超拜水部郎及文襄爲尚書令攝令選沙汰諸曹郎隱以地寒被出爲滄州別駕辭不行子如言於武徵補大丞相功曹參軍專掌機密文翰多出其手稱爲敏給神武曾與對坐遣造軍令以手捫其額曰若天假卿年必大有所至每謂司徒孫騰曰彥深小心恭慎曠古絕倫及神武崩秘喪事文襄慮河南有變仍自巡撫乃委彥深後事轉大行臺都官郎中臨發握手泣曰以母弟相託幸得此心旣而內外寧靜彥深之力及還發喪深加褒美乃披郡縣簿爲選封安國縣伯從征潁川時引水灌城雉將沒西魏將王思政猶欲死戰

文襄令彥深單身入城告諭即日降之便手牽思政出城文襄大悅先是文襄謂彥深曰吾昨夜夢獵遇一群豕吾射盡獲之獨一大豕不可得卿言當爲吾取須臾獲豕而進至是文襄笑曰夢驗矣卽解思政佩刀與彥深曰使卿常獲此利文宣嗣位仍典機密進爵爲侯天保初累遷秘書監以爲忠謹每郊廟必令兼太僕執御陪乘轉大司農帝或巡幸卽輔贊太子知後事爲東南道行臺尚書徐州刺史爲政尚恩信爲吏人所懷多所降下所營軍處士庶追思號趨行臺頓文宣璽書勞勉徵爲侍中仍掌機密河清元年進爵安樂公累遷尚書左僕射齊州大中正監國史遷尚書令位特進封宜陽王武平二年拜司空爲祖珽所間出爲西兗州刺史四年徵爲司空轉司徒丁母憂尋起爲本官七年六月暴疾薨時年七十彥深歷事累朝常參機近溫柔謹慎喜怒不形於色自

皇建以還禮遇稍重每有引見或升御榻常呼官號而不名也凡諸選舉先令銓定提獎人物皆行業爲先輕薄之徒弗之齒也孝昭旣執朝權群臣密多勸進彥深獨不致言孝昭嘗謂王晞云若言衆心皆謂天下有歸何不見彥深有語晞以告彥深不獲已陳請其爲時重如此常遜言恭已未嘗以驕矜待物所以或出或處去而復還母傅氏雅有操識彥深三歲傅便孀居家人欲以改適自誓以死彥深五歲傅謂之曰家貧兒小何以能濟彥深泣而言曰若天哀矜兒大當仰報傅感其意對之流涕及彥深拜太常卿還不脫朝服先入見母跪陳幼小孤露蒙訓得至於此母子相泣久之然後改服後爲宜陽國太妃彥深有七子仲將知名沈敏有父風溫良恭儉雖妻子亦未嘗怠慢終日儼然學涉群書善草隸雖與弟書書字楷正云草不可不解若施之於人卽似相輕易若

當家卑幼又恐其疑所在宜爾是以必須隸筆彥深乞轉萬年縣子授之位給事黃門侍郎散騎常侍隋開皇中位吏部郎終於安州刺史齊朝宰相善始令終唯彥深一人然諷朝廷以子叔堅爲中書侍郎頗招物議時馮子琮子慈明祖珽子君信並相繼居中書故時語云馮祖及趙穢我鳳池叔堅身才最劣

赫連子悅字士欣僭夏赫連勃勃之後也神武起兵時爲濟州別駕勸刺史侯景赴神武後除林慮太守文襄往晉陽由郡境問所不便悅云臨水武安去郡遙遠山嶺重疊若更屬魏郡則地平路近文襄笑曰卿徒知便人不覺損幹悅荅曰所言者人所疾苦不敢以私潤負公心文襄善之乃敕依事施行自是人屬近便行路稱之天保中爲揚州刺史先是城門早閉晚開廢於農作子悅到乃命以時開閉人吏使之累遷鄭州刺史政爲天下之最入爲都

鑒

官尚書鄭州人馬子韶崔孝政等八百餘人請立碑頌德有詔許焉加位開府歷行北豫州事兼吏部尚書子悅在官唯以清勤自守旣無學術又闕風儀人倫清鑿去之彌遠一旦居銓衡之首大

招物議由是除太常卿兼侍中聘周使主卒子仲章中書舍人

馮子琮字子琮長樂信都人北燕主馮弘之後也祖嗣興相州刺

史父靈紹尚書郎太中大夫子琮貴贈開府儀同三司子琮性識

聰敏爲外祖滎陽鄭伯猷所異初襲爵滎陽縣子齊天保初改爲

長安縣男皇建初爲尚書駕部郎中攝庫部孝昭曾閱簿領試令

口陳子琮闇對無有遺失時梁丞相王琳歸國孝昭詔子琮觀其

形勢琳卽與赴艱甚見嘉賞子琮妻胡皇后姊也故詔與胡長榮

輔導太子後轉太子中庶子天統元年武成禪位後主謂子琮曰

少君左右宜得正人以卿心存正直今以後事相委再遷散騎常

侍奏門下事尋兼并省祠部尚書後與胡長粲有隙武成深誠之
曰辱亡齒寒勿復如此武成在晉陽既居舊殿少帝未有別所詔
子琮監造大明宮成帝怪其不宏麗子琮曰至尊幼承大業欲令
敦儉以示萬邦兼此北連天闕不宜崇峻帝稱善又詔子琮監議
五禮與趙郡王叡分爭異同略無降下大爲識者所鄙及武成崩
和士開秘喪三日子琮問其故士開引神武文襄初崩竝秘不舉
喪至尊年少恐王公貳欲追集然後與詳議時趙郡王叡先預帷
幄之謀子琮素知士開忌叡及領軍婁定遠恐其矯遺詔出叡外
任奪定遠禁衛權因荅云大行神武之子今上又是先皇傳位群
臣富貴皆至尊父子之恩但令一無改易必無異望世異事殊不
得與霸朝相比且公不出宮門已經數日升遐之事行路皆傳久
而不舉恐有他變及發喪元文遙以子琮太后妹夫恐其獎成太

秘喪三日子
琮深為趙郡
王地而趙郡
子琮不遺餘
力可效也

后干政說趙王叡及和士開出之拜鄭州刺史既非後主本意賞
賜甚厚仍轉滄州別駕封寧都縣伯太后爲齊安王納子琮長女
爲妃子琮因請假赴鄴遂授侍中轉吏部尚書其妻放縱請謁公
行賄貨填積守宰除授先定錢帛然後奏聞其所通致事無不允
子琮亦不禁制又廣拓傍隣增修宅宇以夜繼晷未曾休息斛律
光將兵度玉壁至龍門周有移書別須籌議詔子琮乘傳赴軍與
周將韋孝寬面相要結龍門等五城因此內附後主以爲子琮之
功封昌黎郡公遷尚書右僕射仍攝選侍中如故和士開居要日
欠子琮舊所附託中雖阻異其後還相彌縫士開弟士休與盧氏
成婚子琮檢校趨走與士開府寮不異時內外除授多由士開奏
擬子琮既恃內戚兼帶選曹自擅權寵頗生間隙時陸媪勢震天
下太后與之結爲姊妹而和士開於太后有醜聲子琮欲陰殺陸

媼及士開因廢帝而立琅邪王儼以謀告儼儼許之乃矯詔殺士開及儼見執言子琮教已太后怒又使執子琮遣右衛大將軍侯呂芬就內省以弓弦絞殺之使內參以庫車載尸歸其家諸子方握槩聞庫車來以為賜物大喜開視乃哭子琮微有識鑒頗慕存公及位望轉隆宿心頓改擢引非類公為深交縱其子弟不依倫次又專營婚媾歷選上門例以官爵許之旬月便驗頓丘李克范陽盧思道隴西李胤伯李子希榮陽鄭庭堅竝其女壻皆至超遷其矯縱如此祖珽先與子琮有隙於後具奏此事諸子竝坐此除名太后以為言又被擢用子琮有五子慈明最知名

慈明字無佚在齊為中書舍人隋開皇中兼內史舍人大業中位尚書兵部郎加朝請大夫十三年攝江都郡丞事李密之逼東都詔慈明追兵擊密為密黨崔樞所執密延與坐論以舉兵之意慈

明曰慈明直道事人有死而已不義之言非所敢對密厚禮之冀其從已慈明潛使奉表江都及致書東都留守論賊形勢密知又義而釋之出至營門為賊帥翟讓所贖責慈明勃然曰天子使我來正欲除爾輩不圖為賊黨所獲我豈從汝求活邪須殺但殺何須罵詈讓益怒亂刀斬之梁郡通守楊江上狀煬帝歎惜之贈銀青光祿大夫拜其二子怳惇俱為尚書承務郎王世克推越王侗為主重贈柱國戶部尚書黎郡公謚曰壯武長子忱先在東都王世克破李密忱亦在軍中遂遣奴負父屍柩詣東都身不自送未幾又盛華燭納室時論醜之

郎基字世業中山新市人也祖智魏魯郡太守贈兗州刺史父道恩開府陽平郡守基身長八尺美鬚髯汎涉墳籍尤長吏事齊天保四年除海西鎮將遇東方白額稱亂淮南州郡皆從逆梁將吳

明徹攻圍海西基固守乃至削木爲箭剪紙爲羽圍解還朝僕射
楊愔迎勞之曰卿本文吏遂有武畧削木剪紙皆無故事班墨之
思何以相過御史中丞畢義雲引爲侍御史趙州刺史尉粲文宣
外弟揚州刺史郭元貞楊愔妹夫基不憚權威竝劾其贓罪皇建
初除鄭州長史帶潁川郡守西界與周接境因侯景背叛其東西
分隔士人仍緣姻舊私相交易而禁格嚴重犯者非一基初莅職
披檢格條多是權時不爲久長州郡因循失於請讞致密網久放
得罪者衆遂條件申臺省仍以情量事科處自非極刑一皆決放
積年留滯案狀膠加數日之中剖判咸盡尋而臺省報下並允基
所陳條綱旣疎獄訟清靜基性清慎無所營求嘗語人云任官之
所木枕亦不須作况重於此乎唯頗令人寫書潘子義曾遺之書
云在官寫書亦是風流罪過基荅云觀過知仁斯亦可矣卒於官

贈驃騎大將軍和州刺史謚曰惠極將還遠近赴送莫不攀轅悲
哭哀不自勝初基任瀛州騎兵時陳元康爲司馬畢義雲爲屬與
基竝有聲譽爲刺史元寔所目三賢俱有當世才後來皆當遠至
惟郎騎兵任真過甚恐不足自達陳畢後竝貴顯而基位止郡守
子茂

清臣

茂字蔚之少敏慧七歲誦騷雅日千餘言十五師事國子博士河
間權會受詩易三禮及玄象刑名之學又就國子助教長樂張奉
禮受三傳群言至忘寢食家人恐成病常節其燭及長以博學稱
歷位保城令有能名周平齊上柱國王誼薦之授陳州戶曹屬隋
文帝爲亳州總管命掌書記周武帝爲象經隋文從容謂茂曰人
主之所爲也感天地動鬼神而象經多亂法何以致人茂竊歎曰
此言豈常人所及陰自結納隋文亦親禮之後還家爲州主簿及

隋文爲丞相以書召之言及疇昔甚歡授衛州司錄有能名尋除衛國令時有繫囚二百茂親自究審數日釋免者百餘人歷年辭訟不詣州省魏州刺史元暉曰長史言衛國人不取申訴者畏明府耳茂曰人猶水也法令爲隄防隄防不固必致奔突苟無決溢使君何患哉暉無以應有部人張元預與從父弟思蘭不睦丞尉請加嚴法茂曰元預兄弟本相憎嫉又坐得罪彌益其忿非化人之意也乃遣縣中耆舊更往敦諭道路不絕元預等各生感悔詣縣頓首請罪茂曉之以義遂相親睦稱爲友悌開皇中累遷戶部侍郎時尚書右僕射蘇威立條章每歲責人間五品不遜或荅者乃云管內無五品家不相應領類多如此又爲餘糧簿擬有無相贍茂以爲繁紆不急皆奏罷之又奏身死王事者子不退田品官左貶不減地皆發於茂茂性明敏剖決無滯當時以吏幹見稱

煬帝卽位爲尚書左丞參選事茂尤工政理爲世所稱時工部尚書宇文愷右翊衛大將軍于仲文競河東銀窟茂奏劾愷位望已隆祿賜優厚拔葵去織寂爾無聞求利下交曾無愧色仲文大將宿衛近臣趨侍階庭朝夕聞道虞芮之風抑而不慕分銖之利知而必爭何以貽範庶寮示人軌物愷與仲文竟坐得罪茂與崔祖濬撰州郡圖經一百卷奏之賜帛百段時帝每巡幸王綱已紊茂旣先朝舊臣明習世事然無譽諤之節見帝忌刻不敢措言唯竊歎而已以年老乞骸骨不許會帝征遼以茂爲晉陽宮留守其常山贊務王文同與茂有隙奏茂附下罔上詔納言蘇威御史大夫裴蘊雜推之茂素與二人不平因深文其罪及弟司隸別駕楚之皆除名徙且末郡茂怡然任命不以爲憂在途作登隴賦以自慰後附表自陳帝頗悟十年追還京兆歲餘卒子知年

論曰孫騫入幕未久倉卒致斃神武以情寄之重義切折肱若不
愛惜才子何以成夫王業元康以知能才幹委質霸朝綢繆帷幄
任寄爲重及難無苟免忘生殉義可謂得其地焉杜弼識學甄明
發言讜正禪代之際先起異圖王怒未終卒蒙顯戮直言多矣能
無及於此乎房謨忠勤之操始終若一恭懿循良之風可謂世有
人矣張纂張亮張曜王竣王紘等並事霸朝申其力用皆有齊之
良臣也伯德之慟哭伏屍靈光之拒關駐驪有古人之風焉顯儁
明達文武驅馳盡其知力不遑寧處可謂德以稱位能以稱官道
和爰從霸府以終末路四十餘載典綜兵機識用閑明甚爲朝臣
所服及于後主奔遁莫知所之首贊延宗以從權變旣而晉陽傾
覆運極窮途還鄴則義隔德昌死事則情乖舊主雖復全生握節
豈比背叛之流歟夫縣宰之寄綿歷古今親人任功莫尚於此漢
氏官人尚書郎出宰百里晉朝設法不宰縣不得爲郎皆所以貴
方城之職重臨人之要後魏令長多選舊令史爲之故縉紳之流
耻居其位爰逮有齊此途未改寧都公革斯流弊弘之在人固爲
美矣司徒器度沈遠有宰臣之量始從文吏終致台輔出內有常
夷險若一而世人諭之胡廣譏其不能廷爭然古稱見幾而作又
曰相時而動若時有開悟或可希舜一功而終遇姦回便恐舟壑
俱運斯蓋趙公之志也子悅牧宰流譽子琮簿領見知及居藻鏡
俱稱尸祿馮溺於賄貨於斯爲甚慈明赴蹈之義蓋有銜鬚之節
郎基政績有聞蔚之克荷堂構美矣乎

北史卷五十六
列傳第四十三終

西川中興
氏書

北史卷五十六

列傳第四十四

魏收

魏長賢

魏季景

魏蘭根

子澹
族子愷

魏收字伯起，小字佛助，鉅鹿下曲陽人也。自序漢初魏無知，封高良侯。子均，均子恢，恢子彥，彥子歆，字子胡，幼孤，有志操，博洽經史。位終本郡太守。子悅，字處德，性沉厚，有度量。宣城公趙國李孝伯見而重之，以女妻焉。位濟陰太守，以善政稱。悅子子建，字敬忠，釋褐奉朝請，累遷太尉從事中郎。初宣武時，平氏遂於武興立鎮，尋改為東益州。其後鎮將刺史乖失人，和群氏作梗，遂為邊患，乃除

西川中興
氏書

子建東益州刺史子建布以恩信遠近清靜正光五年南北二秦
城人莫折念生韓祖香張長命相繼構逆僉以州城之人莫不勁
勇同類悉反宜先收其器械子建以爲城人數當行陣盡皆驍果
安之足以爲用急之腹背爲憂乃悉召居城老壯曉示之并上言
諸城人本非罪坐而來者悉求聽免明帝優詔從之子建漸分其
父兄子弟外居郡戍內外相顧終獲保全及秦賊乘勝屯營黑水
子建乃潛使掩襲前後斬獲甚衆威名赫然先反者及此悉降乃
間使上聞帝甚嘉之詔子建兼尚書爲行臺刺史如故於是威振
蜀土其梁巴二益兩秦之事皆所節度梁州刺史傅豎眼子故中
心以爲愧在洛大行貨賄以圖行臺先是子建亦屢求歸京師至
此乃遣刺史唐永代焉豎眼因爲行臺子建將還群氏慕戀相率
斷道主簿楊僧覆先行曉喻諸氏忿曰我留刺史爾送出也斫之

數 幾死子建徐加慰譬旬月方得前行吏人贈遺一無所受而
東益氏蜀尋反攻逼唐永永棄城而走乃喪一藩矣初永之走子
建客有沙門曇璨及鉅鹿人耿顯皆没落氏手及知子建之客垂
泣追衣物還之送出白馬遺愛所被如此初子建爲前軍將軍十
年不徙在洛閑暇與吏部尚書李韶韶從弟延寔頗爲奕碁時人
謂爲耽好子建每曰碁於廉勇之際得之深矣且吾未爲時用博
奕可也及一臨邊事凡經五年未曾對局還洛後累遷衛尉卿初
元顥內逼莊帝北幸子建謂所親盧義僖曰北海自絕社稷稱藩
蕭衍吾老矣豈能爲陪臣遂携家口居洛南顥平乃歸先苦風痺
及此遂甚以卿任有務屢上書乞身特除右光祿大夫邢杲之平
太傅李延寔子侍中或爲大使撫慰東土時外戚貴盛送客填門
子建亦往候別延寔曰小兒今行何以相勗子建曰益以盈滿爲

誠延寔悵然久之及莊帝殺尔朱榮遇禍於河陰者其家率相弔
賀太尉李虔第二子仁曜子建之女壻往亦見害子建謂姨弟盧
道虔曰朝廷誅翦權強兇徒尚梗未聞有奇謀異畧恐不可濟此
乃李門禍始弔賀無乃怱怱及永安之後李氏宗族流離或遇誅
夷如其所慮後歷左光祿大夫加散騎常侍驃騎大將軍子建自
出爲藩牧董司山南居脂膏之中遇天下多事正身潔已不以財
利經懷及歸京師家人衣食常不周贍清素之迹著於終始性存
重慎不雜交游唯與尚書盧義僖姨弟涇州刺史盧道裕雅相親
昵及疾篤顧敕二子曰死生大分含氣所同世有厚塋吾平生不
取籩條裸身又非吾意氣絕之後斂以時服吾平生契闊前後三
娶合塋一事抑又非古且汝二母先在舊塋墳地久固已有定別
唯汝次母墓在外耳可遷入兆域依班而定行於吾墓之後如此

足矣不須耐合當順吾心勿令吾有遺恨永熙二年春卒於洛陽
孝義里舍時年六十又贈儀同三司定州刺史謚曰文靜二子收
祚收少機警不持細行年十五頗已屬文及隨父赴邊好習騎射
欲以武藝自達榮陽鄭伯調之曰魏郎弄戟多少收慙遂折節讀
書夏月坐板牀隨樹陰諷誦積年牀板爲之銳減而精力不輟以
文華顯初除太學博士及尔朱榮於河陰濫害朝士收亦在圍中
以日晏獲免吏部尚書李神雋重收才學奏授司徒記室參軍永
安三年除北主客郎中節閔帝立妙簡遞侍詔試收爲封禪書收
下筆便就不立藁草文將千言所改無幾時黃門郎賈思同侍立
深奇之白帝曰雖七步之才無以過此遷散騎侍郎尋敕典起居
法并修國史俄兼中書侍郎時年二十六孝武初又詔收攝本職
文誥填積事咸稱旨黃門郎崔悛從齊神武入朝熏灼於世收初

不詣門。悽爲帝登阼。赦云：朕託體孝文。收嗤其率直。正員郎李慎以告之。悽深忿忌。時節閔帝殂。令收爲詔。悽乃宣言：收普泰世出入幃幄。一日造詔。優爲詞旨。然則義旗之士盡爲逆人。又收父老合解官歸侍。南臺將加彈劾。賴尚書辛雄爲言於中尉綦儁。乃解收有賤生弟仲。同先未齒錄。因此怖懼。上籍遣還鄉。扶侍孝武嘗大發士卒狩於嵩山之南。旬有六日。時寒朝野。嗟怨。帝與從官及諸妃王。奇伎異飾。多非禮度。收欲言。則懼欲默。不能已。乃上南狩賦以諷焉。年二十七。雖富言淫麗。而終歸雅正。帝手詔報焉。甚見褒美。鄭伯謂曰：卿不遇老夫。猶應逐鬼。神武固讓天柱大將軍。魏帝敕收爲詔。令遂所請。欲加相國。問收相國品秩。收以實對。帝遂止收。旣未測主相之意。以前事不安。求解詔許焉。久之。除帝兄子廣平王贊開府從事中郎。收不敢辭。乃爲庭竹賦。以致已意。尋兼

中書舍人。與濟陰溫子昇、河間邢子才、齊譽世號三才。時孝武內有間隙。收遂以疾固辭。而免舅崔孝芬。怪而問之。收曰：懼有晉陽之甲。尋而神武南上。帝西入關。收兼通直散騎常侍。副王昕聘梁。昕風流文辯。收辭藻富逸。梁主及其群臣咸加敬異。先是南北初。和李諧、盧元明首通使命。二人才器並爲鄰國所重。至此梁主稱曰：盧李命世。王魏中興。未知後來復何如耳。收在館。遂買吳婢入館。其部下有買婢者。收亦喚取。遍行姦穢。梁朝館司皆爲之獲罪。人稱其才而鄙其行。在途作聘游賦。辭甚美盛。使還尚書右僕射高隆之求南貨於昕。收不能如志。遂諷御史中尉高仲密禁止。昕收於其臺。久之得釋。及孫搴死。司馬子如薦收召赴晉陽。以爲中外府主簿。以受旨乖忤。頻被嫌責。加以筆楚。久不得志。會司馬子如奉使霸朝。收假其餘光子如。因宴戲言於神武曰：魏收天子中

書郎一國大才願大王借與顏色由此轉府屬然未甚優禮收叔季景有文學歷官著名並在收前然收常所欺忽季景收初赴并頓丘李庶者故大司農諧之子也以華辯見稱曾謂收曰霸朝便有二魏收率爾曰以從叔見比便是邪輸之比卿邪輸者故尚書令陳留公繼伯之子愚癡有名好自入市肆高價買物商賈共所嗤翫收忽以季景方之不遜例多如此收本以文才必望穎脫見知位既不遂求修國史崔暹爲言於文襄曰國史事重公家父子霸王功業皆須具載非收不可文襄乃啟收兼散騎常侍修國史武定二年除正常侍領兼中書侍郎仍修國史魏帝宴百寮問何故名人日皆莫能知收對曰晉議郎董勛荅問禮俗云正月一日爲雞二日爲狗三日爲猪四日爲羊五日爲牛六日爲馬七日爲人時邢邵亦在側甚恧焉自魏梁和好書下紙每云想彼境內寧

靜此率土安和梁後使其書乃去彼字自稱猶著此欲示無外之意收定報書云想境內清晏今萬國安和梁人復書依以爲體後神武入朝靜帝授相國固讓令收爲啟啟成呈上文襄時侍側神武指收曰此人當復爲崔光四年神武於西門豹祠宴集謂司馬子如曰魏收爲史官書吾善惡聞北伐時諸貴常餉史官飲食司馬僕射頗曾餉不因共大笑仍謂收曰卿勿見元康等在吾目下趨走謂吾以爲勤勞我後世身名在卿手勿謂我不知尋加兼著作郎收昔在京洛輕薄尤甚人號云魏收驚蛺蝶文襄曾游東山令給事黃門侍郎顥等宴文襄曰魏收恃才無宜適須出其短往復數番收忽大唱曰楊遵彥理屈已倒情從容曰我綽有餘暇山立不動若遇當塗恐翩翩遂逝當塗者魏翩翩者蝶也文襄先知之大笑稱善文襄又曰向語猶微宜更指斥情應聲曰魏收在并

作一篇詩對衆讀訖云打從叔季景出六百斛米亦不辨此遠近所知非敢妄說文襄喜曰我亦先聞衆人皆笑收雖自申雪不復抗拒終身病之侯景叛入梁寇南境文襄時在晉陽令收爲檄五十餘紙不日而就又檄梁朝令送侯景初夜執筆三更便了文過七紙文襄善之魏帝曾季秋大射普令賦詩收詩末云尺書徵建鄴折簡召長安文襄壯之顧謂人曰在朝今有魏收便是國之光采雅俗文墨通達縱橫我亦使子才子昇時有所作至於詞氣並不及之吾或意有所懷忘而不語語而不盡意有未及收呈草皆以周悉此亦難有又敕兼主客郎接梁使謝琿徐陵侯景旣陷梁梁鄴陽王範時爲合州刺史文襄敕收以書喻之範得書仍率部伍西上州刺史崔聖念入據其城文襄謂收曰今定一州卿有其力猶恨尺書徵建鄴未效耳文襄崩文宣如晉陽令與黃門郎崔

季舒高德正吏部郎中尉瑾於北第參掌機密轉秘書監兼著作郎又除定州大中正時齊將受禪楊愔奏收置之別館令撰禪代詔冊諸文遣徐之才守門不聽出天保元年除中書令仍兼著作郎富平縣子二年詔撰魏史四年除魏尹故優以祿力專在史閣不知郡事初帝令群臣各言志收曰臣願得直筆東觀早出魏書故帝使收專其任又詔平原王高隆之總監之署名而已帝敕收曰好直筆我終不作魏大武誅史官始魏初鄧彥海撰代記十餘卷其後崔浩典史游允程駿李彪崔光李琰之郎知世修其業浩爲編年體彪始分作紀表志傳書猶未出宣武時命邢巒追撰孝文起居法書至太和十四年又命崔鴻王遵業補續焉下訖孝明事甚委悉濟陰王暉業撰辯宗室錄三十卷收於是與通直常侍房延祐司空司馬辛元植國子博士刁柔裴昂之尚書郎高孝幹

專總斟酌以成魏書辯定名稱隨條甄舉又搜採亡遺綴續後事
 備一代史籍表而上聞之勒成一代大典凡十一紀九十二列傳
 合一百一十卷五年三月奏上之秋除梁州刺史收以志未成奏
 請終業許之十一月復奏十志天象四卷地形三卷律曆二卷禮
 樂四卷食貨一卷刑罰一卷靈徵二卷官氏二卷釋老一卷凡二
 十卷續於紀傳合一百三十卷分爲十二表其史三十五例二十
 五序九十四論前後二表一啟皆獨出於收收所引史官恐其陵
 逼唯取學流先相依附者其房延祐辛元植睦仲讓雖夙涉朝位
 竝非史才柔裴昂之以儒業見知全不堪編輯高孝幹以左道
 求進修史諸人宗祖姻戚多被書錄飾以美言收頗急不甚能平
 夙有怨者多沒其善每言何物小子敢共魏收作色舉之則使上
 天按之當使入地初收在神武時爲太常少卿修國史得陽休之

助因謝休之曰無以謝德當爲卿作佳傳休之父固魏世爲北平
 太守以貪虐爲中尉李平所彈獲罪載在魏起居注收書云固爲
 北平甚有惠政坐公事免官又云李平深相敬重余朱榮於魏爲
 賊收以高氏出自余朱且納榮子金故減其惡而增其善論云若
 修德義之風則韓彭伊霍夫何足數時論旣言收著史不平文宣
 詔收爲尚書省與諸家子孫共加論討前後投訴百有餘人云遺
 其家世職位或云其家不見記錄或云妄有非毀收皆隨狀荅之
 范陽盧斐父同附出旌祖玄傳下頓丘李庶家傳稱其本是梁國
 家人斐庶譏議云史書不直收性急不勝其憤啟誣其欲加屠害
 帝大怒親自詰責斐曰臣父仕魏位至儀同功業顯者名聞天下
 與收無親遂不立傳博陵崔綽位至本郡功曹更無事迹是收外
 親乃爲首傳收曰綽雖無位道義可嘉所以合傳帝曰卿何由知

其好人收曰高允曾為綽讚稱有道德帝曰空才士為人作讚正應稱揚亦如卿為人作文章道其好者豈能皆實收無以對戰慄而已但帝先重收才不欲加罪時太原王松年亦謗史及斐庶竝獲罪各被鞭配甲坊或因以致死盧思道亦抵罪然猶以群口拂騰救魏史且勿施行令群官博議聽有家事者入署不實者陳牒於是眾口誼然號為穢史投牒者相次收無以抗之時左僕射楊愔右僕射高德正二人勢傾朝野與收皆親收遂為其家並作傳二人不欲言史不實抑塞訴辭終文宣世更不重論又尚書陸操嘗謂愔曰魏收魏書可謂博物宏才有大功於魏室愔嘗謂收曰此謂不刊之書傳之萬古但恨論及諸家枝葉親姻過為繁碎與舊史體例不同耳收曰往思中原喪亂人士譜牒遺逸畧盡是以具書其枝派望公觀過知仁以免尤責八年夏除太子少傅監

國史復參修律令三臺成文宣曰臺成須有賦愔先以告收收上皇居新殿臺賦其文甚壯麗時所作者自邢邵已下咸不逮焉收上賦前數日乃告邢邵邵後告人曰收甚惡人不早言之帝曾游東山敕收作詔宣揚威德譬喻關西俄頃而訖辭理宏壯帝對百寮大嗟賞之仍兼太子詹事收娶其舅女崔之妹產一女無子魏太常劉芳孫女中書郎崔肇師女夫家坐事帝並賜收為妻時人比之賈充置左右夫人然無子後病甚恐身後嫡媵不平乃放二姬及疾瘳追憶作懷離賦以申意文宣每以酣宴之次云太子性懦宗社事重終當傳位常山收謂楊愔曰古人云太子國之根本不可動搖至尊三爵後每言傳位常山令臣下疑貳疑貳若實便須決行若戲此言魏收既忝師傅正當守之以死但恐國家不安愔以收言奏帝自此便止帝數宴喜收每預侍從皇太子之納鄭

良娣也有司備設牢饌帝既酣飲起而自毀覆之仍詔收曰知我意不收曰臣愚謂良娣既東宮之妾理不須牢仰惟聖懷緣此毀去帝大笑握收手曰卿知我意安德王延宗納趙郡李祖收女爲妃後帝幸李宅宴而妃母宋氏薦二石榴於帝前問諸人莫知其意帝投之收曰石榴房中多子王新婚妃母欲子孫衆多帝大喜詔收卿還將來仍賜收美錦二疋十年除儀同三司帝在宴席口敕以爲中書監命中書郎李愔於樹下造詔愔以收一代盛才難於率爾久而未訖比成帝已醉醒遂不重言愔仍不奏事竟寢及帝崩於晉陽驛召收及中山太守陽休之參議吉凶之禮并掌詔誥仍除侍中遷太常卿文宣謚及廟號陵名皆收議也及孝昭居中宰事命收禁中爲諸詔文積日不出轉中書監皇建元年除兼侍中右光祿大夫仍儀同監史收先副王昕使梁不相協睦時昕

弟晞親密而孝昭別令休之兼中書在晉陽典誥詔收留在鄴蓋晞所爲收大不平謂太子舍人盧詢祖曰若使卿作文誥我亦不言又除祖珽爲著作郎欲以代收司空主簿李文詞士也聞而告人曰詔誥悉歸陽子烈著作復遣祖孝徵文史頓失恐魏公發背於時詔議二王三恪收執王肅杜預義以元司馬氏爲二王通曹備三恪詔諸禮學之官皆執鄭玄五代之議孝昭后姓元議恪不欲廣及故議從收又除兼太子少傅解侍中帝以魏史未行詔收更加研審收奉詔頗有改正及詔行魏史收以爲直置秘閣外人無由得見於是命送一本付并省一本付鄴下任人寫之太寧元年加開府河清二年兼右僕射時武成酣飲終日朝事專委侍中高元海凡庸不堪大任以收才名振俗都官尚書畢義雲長於斷割乃虛心倚仗收畏避不能匡救爲議者所譏帝於華林別起

玄洲苑備山水臺觀之麗詔於閣上畫收其見重如此始收比温子昇邢邵稍爲後進邵旣被疎出子昇以罪死收遂大被任用獨步一時議論更相訾毀各有朋黨收每議陋邢文邵又云江南任昉文體本疎魏收非直模擬亦大偷竊收聞乃曰伊常於沈約集中作賊何意道我偷任任沈俱有重名邢魏各有所好武平中黃門郎顏之推以二公意問僕射祖珽珽荅曰見邢魏之臧不卽是任沈之優劣收以温子昇全不作賦邢雖有一兩首又非所長常云會須能作賦始成大才士唯以章表碑志自許此外更同兒戲自武定二年以後國家大事詔命軍國文詞皆收所作每有警急受詔立成或時中使催促收筆下有同宿構敏速之工邢温所不逮也其參議典禮與邢相埒旣而趙郡公增年獲免收知而過之事發除名其年又以託附陳使封芝瑛牒令其門客與行遇崑崙

船至得奇貨果然褥表美玉盈尺等數十件罪當流以贖論三年起除清郡尹尋遣黃門郎元文遙敕收曰卿舊人事我家最久前者之罪情在可恕比令卿爲尹非謂美授但初起卿斟酌如此朕豈可用卿之才而忘卿身待至十月當還卿開府天統元年除左光祿大夫二年行齊州刺史尋爲真收以子姪年少申以戒厲著枕中篇其詞曰吾曾覽管子之書其言曰任之重者莫如身途之畏者莫如口期之遠者莫如年以重任行畏途至遠期惟君子爲能及矣追而味之喟然長息若夫岳立而重有潛戴而不傾山藏稱固亦趨負而不停呂梁獨浚能行歌而匪惕焦原作險或削踵而不驚九陔方集故眇然而迅舉五紀當定想宵乎而上征苟任重也有度則任之而愈固乘危也有術蓋乘之而靡恤彼期遠而能通果應之而可必豈神理之獨爾亦人事其如一嗚呼處天壤

之間勞死生之地攻之以嗜欲牽之以名利梁肉不期而共臻珠
玉無足而俱致於是乎驕奢仍作危亡旋至然則上智大賢惟幾
惟哲或出或處不當其時其舒也濟世成務其卷也聲銷迹滅玉
帛子女椒蘭律呂諂諛無所先稱肉度骨膏挑舌怨惡莫不勳名
共山河同久志業與金石比堅斯蓋厚棟不撓游刃砉然逮於厥
德不常喪其金璞馳驚人世鼓動流俗挾湯日而謂寒包溪壑而
未足源不清而流濁表不端而影曲嗟乎膠漆詎堅寒暑甚促反
利而成害化榮而就辱欣戚更來得喪仍續至有身禦魘魅魂沉
狴獄詎非足力不强迷在當局孰可謂車戒前傾人師先覺聞諸
君子雅道之士游遨經術厭飫文史筆有奇鋒談有勝理孝悌之
至神明通矣審道而行量路而止自我及物先人後己情無繫於
榮悴心靡滯於愠喜不養望於丘壑不待價於城市言行相顧慎

終猶始有一於斯鬱爲羽儀恪居展事知無不爲或左或右則髦
士攸宜無悔無吝故高而不危異乎勇進忘退苟得患失射千金
之產徼萬鍾之秩投烈風之門趣炎火之室載蹶而墜其貽宴或
躄乃喪其貞吉可不畏歟可不戒歟門有倚禍事不可不密墻有
伏寇言不可而失宜諦其言宜端其行言之不善行之不正鬼執
強梁人囚徑挺幽奪其魄明天其命不服非法不行非道公鼎爲
已信私玉非身寶過涅爲緝踰藍作青持繩視直置水觀平時然
後取未若無欲知止知足庶免於辱是以爲必察其幾舉必慎於
微知幾慮微斯亡則稀既察且慎福祿攸歸昔蘧瑗識四十九非
顏子隣幾三月不違跬步無已至於千里覆蕢而進及於萬仞故
云行遠自卑可大可久與世推移月滿如規後夜則虧槿榮於枝
望暮而萎夫奚益而不損孰有損而不害益不欲多利不欲大唯

居德者畏其甚體真者懼其大道尊則群謗集任重而衆怨會其
達也則尼父栖遑其忠也而周公狼狽無曰人之我狹在我不可
而覆無曰人之我厚在我不可而咎如山之大無不有也如谷之
虛無不受也能剛能柔重可負也能信能順險可走也能智能愚
期可久也周廟之人三緘其口漏卮在前歆器留後俾諸來裔傳
之坐右其從後群臣多言魏史不實武成復敕更審收又迴換遂爲
盧同立傳崔綽反更附出楊愔家傳本云有魏以來一門而已至
是加此八字又先云弘農華陰人乃改自云弘農以配王慧龍自
云太原人此其失也尋除開府中書監武成崩未發喪在內諸公
以後主卽位有年疑於赦令諸公引收訪焉收固執宜有恩澤乃
從之掌詔誥除尚書右僕射總議監五禮事位特進收奏請趙彥
深和士開徐之才共監先以告士開士開驚辭以不學收曰天下

事皆由五禮非王不決士開謝而許之多引文士令執筆儒者馬
敬德熊安生權會實主之武平三年薨贈司空尚書左僕射謚文
貞有集七十卷收碩學大才然性褊不能達命體道見當塗貴游
每以言色相悅然提獎後輩以名行爲先浮華輕險之徒雖有才
能弗重也初河間邢子才子明及季景與收並以文章顯世稱大
邢小魏言尤俊也收少子才十歲子才每曰佛助察人之偉後收
稍與子才爭名文宣貶子才曰爾才不及魏收收益得志自序云
先稱溫邢後曰邢魏然收內陋邢心不許也收旣輕疾好聲樂善
胡舞文宣未數於東山與諸優爲獼猴與狗鬪帝寵狎之收外兄
博陵崔巖嘗以雙聲嘲收曰遇魏收衰由患魏魏荅曰顏巖腥瘦
是誰所坐羊頤狗頰頭團鼻平飯房笊籠著孔嘲环其辯捷不拘
若是旣緣史筆多憾於人齊亡之歲收冢被發棄其骨於外先養

弟子仁表爲嗣位至尚書膳部郎中隋開皇中卒於溫縣令子建族子惇字仲讓容貌魁偉性通率永安末除安東將軍光祿大夫介朱仲遠鎮東郡以事捕惇遇出外執惇兄子胤而去惇聞哭曰若害胤寧無吾也乃見仲遠叩頭曰家事在惇胤何知也乞以身罪仲遠義而捨之天平中拜衛將軍右光祿大夫卒惇叔偃字盤蚪有當世幹用位驍騎將軍性浮動晚乃曲附高肇彭城王勰之死也偃構成其事爲時所惡子質字懷素幼有立志年十四啓母求就徐遵明受業母以其年幼不許質遂密將一奴遠赴徐學留書一紙置所臥牀內外見之相視悲歎五六年中便通諸經大義自學言歸生徒輻輳皆同衣食情若兄弟後避葛榮難客居趙國飛龍山爲亂賊所害士友傷惜之興和二年侍中李儁秘書監常景等三十二人申辭於尚書爲請贈謚事下太常博士考行謚曰

貞烈先生

魏長賢收之族叔也祖釗本名顯義字弘理魏世祖賜名仍命以顯義爲字雅性俊辯博涉群書有當世才兼資文武知名梁楚淮泗之間世祖南伐聞而召之旣至與語大悅謂釗曰今我此行是卿建功之日勉之勿憂不富貴也授內都直侍左右師次淮南諸城未有下者釗乃進曰陛下百萬之軍風行電掃攻城略地所向無前雖有智者莫能爲計然而師次淮南已經累日義陽諸城猶敢拒守此非不懼亡滅自謂必可保全也但陛下卒徒果銳殺掠尚多人皆畏威未甚懷惠恐一旦降下妻子不全所以遲疑未肯先發臣請間入城內見其豪右宣達聖心示以誠信必當大小相率面縛請罪陛下拔其英楚因而任之此外諸城可不勞兵而自定世祖大喜曰所以召卿本爲是耳卿今所言副吾所望釗遂夜

入城中示以危亡之期開以生全之路城中大小欣悅明日開門
出降自此而南望塵款附世祖謂釗曰卿之一言踰於十萬之師
揚我信義播於四表實卿一人之力卽授義陽太守陵江將軍又
令釗與諸將統兵討襲所當無不摧破軍中服其勇敢世祖益喜
謂群臣曰中國士人吾拔擢咸盡文武膽畧未有若釗儔加授建
忠將軍追贈其父處順州刺史時經畧江左方大用之遇風疾發
動頻降醫藥竟不痊復卒時年六十四父彥字惠卿博學善屬文
趙郡王幹辟開府參軍廣陵王羽辟記室並不行陳留公李崇甚
重之引爲鎮西參軍事崇討叛氏陽靈珍叛蠻魯北鸕又請爲記
室參軍中山王英討淮南又請爲記室參軍軍還求爲著作郎思
樹不朽之業以晉書作者多家體制繁雜欲正其紕繆刪其游辭
勒成一家之典俄而彭城王聞李崇稱之復請爲掾兼知主客郎

中書遂不成王遇害退歸田里清河王復引爲諮議王勢高名重
深爲權倖所疾恐罹其禍固辭以疾肅宗初拜驃騎長史尋轉光
州刺史年六十八卒兄伯胤之歸也留長賢與弟德振使宦學於
洛中孝靜北遷亦徙居鄴博涉經史詞藻清華舉秀才除汝南王
悅參軍事入齊平陽王淹辟爲法曹參軍轉著作佐郎更撰晉書
欲還成先志河清中上書譏刺時政大忤權幸爲上黨屯留令親
故以長賢不相時而動或爲書以相規責長賢復書曰日者惠書
義高旨遠誨僕以自求諸已思不出位國之大事君與執政所圖
又謂僕祿不足以代耕位不登於執戟干非其議自貽悔咎勤勤
懇懇誠見故入之心靜言再思無忘寤寐僕雖固陋亦嘗奉教於
君子矣以爲士之立身其路不一故有負鼎俎以趨世隱漁釣以
待時操築傳巖之下取履圮橋之上者矣或有釋賃車以匡霸業

委挽輅以定王基由斬祛以見禮因射鈎而受相者矣或有三黜不移屈身以直道尤死未悔甘心於苦節者矣皆奮於泥滓自致青雲雖事有萬殊而理終一致權其大要歸乎忠孝而已矣夫孝則竭力所生忠則致身所事未有孝而遺其親忠而後其君者僕自射策金馬記言麟閣寒暑迭運五稔於茲不能勒成一家潤色洪業善述人事功既闕如顯親揚名邈焉無與每一念之曷云其已自頃王室板蕩彞倫攸斁大臣持祿而莫諫小臣畏罪而不言虛痛朝危空哀主辱匪躬之故徒聞其語有犯無隱未見其人此梅福所以獻書朱雲所以請劔者也抑又聞之嫠不恤緯而憂宗周之亡女不懷歸而悲太子之少況僕之先人世傳儒業誨僕以爲子之道厲僕以事君之節今僕之委質有年世矣安可自同於匹庶取笑於兒女子哉是以賜一夕而九心終朝而百慮懼

當年之不立恥沒世而無聞慷慨懷古自強不息庶幾伯夷之風以立懦夫之志吾子又謂僕干進務入不畏友朋居下訕上欲益反損僕誠不敏以貽吾子之羞默默苟容又非生平之意故願得鉏彼草茅逐茲鳥雀去一惡樹一善不違先旨以沒九泉求仁得仁其誰敢怨但言與不言在我用與不用在時若國道方屯時不我與以忠獲非以信見疑貝錦成章青蠅變色良田敗於邪徑黃金鑠於衆口窮達運也其如命何吾子忠告之言敢不敬承嘉惠然則僕之所懷未可一二爲俗人道也投筆而巳夫復何言是出也人皆爲之怏怏而長賢處之怡然不屑懷抱識者以此多焉武平中辭疾去職終於齊代不復出仕周武平齊搜揚才俊辟書屢降固以疾辭卒年七十四貞觀中贈定州刺史子徵

魏季景收族叔也父鸞字雙和爲魏文賜名有器幹體貌魁偉以

有容儀爲奉車都尉曾升輅車觸毀金翼斂容請罪帝笑曰卿體貌過人素不便習何足懼也車駕南征漢陽除鸞統軍帝歷幸其營歎賞之及在馬圈不豫敕兼武衛將軍領宿衛左右景明中六輔之廢鸞頗預其事後除光州刺史更滿還朝卒謚曰夷子季景少孤清苦自立博學有文才弱冠有名京師時邢子明稱有才學始與子才相伴季景與收相亞洛中號兩邢二魏莊帝時爲中書侍郎普泰中爲尚書右丞季景善附會宰要當朝必先事其左右尒朱世隆特賞愛之於時才名甚盛頗過其實太昌中位給事黃門侍郎甚見信待除定州大中正孝武帝釋奠季景與溫子昇李業興竇瑗等俱爲擿句天平初因遷都遂居栢人西山內懷憂悔乃爲擇居賦元象初兼給事黃門侍郎後兼散騎常侍使梁還歷大司農卿魏郡尹卒家無餘財遺命薄葬贈散騎常侍衛尉卿所

隋臣

著文筆二百餘篇子澹知名澹字彥深年十五而孤專精好學高才善屬文仕齊殿中侍御史預修五禮及撰御覽除殿中郎中書舍人與李德林修國史入周爲納言中士隋初爲行臺禮部侍郎尋爲聘陳使主還除太子舍人廢太子勇深禮之令注庾信集撰笑苑世稱博物遷著作郎仍爲太子學士帝以魏收所撰後魏書褒貶失實平繪爲中興書事不倫序詔澹別成魏史澹自道武下及恭帝爲十二紀七十八列傳別爲史論及例各一卷合九十二卷義例與魏收多所不同其一曰臣聞天子者繼天立稱終始絕名故穀梁傳太上不名曲禮天子不言出諸侯不生名諸侯尚不生名況天子乎若爲太子必須書名良由子者對父生稱父前子名禮之意也至如馬遷周之太子並皆言名漢之儲兩俱沒其諱以尊漢卑周臣子之意也竊謂雖立此理恐非其義何者春秋禮

記太子必書名天王不言出此仲尼之褒貶皇王之稱謂非當時與異代遂爲優劣也班固范曄陳壽王隱沈約參差不同尊卑失序至於魏收諱儲君之名書天子之字過又甚焉今所撰諱皇帝名書太子字欲尊君卑臣依春秋之義二曰魏氏平文以前部落之君長耳太祖遠追二十八帝並極崇高違堯舜憲章越周公典禮但道武出自結繩未師典誥當須南董直筆裁而正之反更飾非豈是觀過但力徼天女所誕靈異絕世尊爲始祖得禮之宜平文昭成雄據塞表英風漸盛圖南之業基自此始長孫斤之亂也兵交御坐太子授命昭成獲免道武此時后緡方娠宗廟復存社稷有主大功大孝實在獻明此之三世稱謚可也自茲以外未之敢聞其三曰幽王死於驪山厲王出奔於彘未嘗隱諱直筆書之欲以勸善懲惡詒誠將來如太武獻文並遭非命前史立紀不異

天年言論之間頗露首尾殺主害君莫知姓名逆臣賊子何所懼哉今分明直書不敢回避四曰自晉德不競宇宙分崩或帝或王各自署置其生畧如敵國書死便同庶人凡處華夏之地者皆書曰卒同之吳楚澹又以爲司馬遷創立紀傳已來述者非一人無善惡皆爲立論計在身行迹具在正書事既無奇不足懲勸再述乍同銘頌重叙唯覺繁文案丘明亞聖之才發揚聖旨言君子曰者無非甚泰其間尋常直言而已今所撰史竊有慕焉可爲勸戒者論其得失其無益者所不論也上覽而善之未幾而卒有集三十卷子罕言澹弟彥玄位洧州司馬子滿行

魏蘭根字蘭根收族叔也父伯成中山太守蘭根身長八尺儀貌奇偉博學高才機警有識悟起家北海王國侍郎母憂居喪有孝稱將葬常山郡境先有董卓祠祠有柏樹蘭根以卓凶逆不應遺

祠至今乃啟刺史請伐爲椁左右人言有靈蘭根了無疑懼父喪廬於墓側負土成墳憂毀殆於滅性正光末尚書令李崇爲大都督討蠕蠕以蘭根爲長史因說崇曰緣邊諸鎮控攝長遠昔時初置地廣人稀或徵發中原強宗子弟或國之肺腑寄以瓜牙中年以來有司乖實號曰府戶役同廝養官婚班齒致失清流而本宗舊類各各榮顯顧瞻彼此理當憤怨宜改鎮立州分置郡縣凡是府戶悉免爲平人入仕次第一準其舊此計若行國家庶無北顧之慮崇以奏聞事寢不報孝昌初爲岐州刺史從行臺蕭寶夤討破宛川俘其人爲奴婢以美女十人賞蘭根蘭根辭曰此縣介於強虜故成背叛今當恤其飢寒奈何並克僕隸於是盡以歸其父兄部內麥多五穗隣州田鼠爲災犬牙不入其境及蕭寶夤敗於涇州岐州人囚蘭根降賊寶夤兵威復振城人復斬賊刺史侯莫

陳仲和推蘭根復任朝廷以蘭根得西土人心加都督涇岐東秦南岐四州諸軍事兼四州行臺尚書孝昌末河北流人南度以蘭根兼尚書使齊濟二兗四州安撫并置郡縣蘭根甥邢杲反於青光間復詔蘭根慰勞杲不下仍隨元天穆討之還拜中書令莊帝之將誅尔朱榮蘭根泄之於兄子周達周達告尔朱世隆及榮死蘭根憂不知所出時應詔王道習見信於莊帝蘭根乃託附之求出立功乃兼尚書右僕射河北行臺定州率募鄉曲欲防并陘爲榮將侯深所敗走依勃海高乾屬乾兄弟義舉固在其中神武以宿望深禮之中與初爲尚書右僕射神武將入洛陽時廢立未決令蘭根察節閔帝帝神采高明蘭根恐於後難測遂與高乾兄弟及黃門侍郎崔陵同請神武不得已遂立武帝大昌初加侍中開府儀同三司鉅鹿縣侯啟授兄子周達蘭根既預勲業位居端副

始叙復岐州勳封永興侯高乾之死蘭根懼以病免天平初言病篤以開府儀同歸本鄉門施行馬武定三年薨贈司徒公謚曰文宣長子相如襲爵相如性亢直有文藻與族兄愷齊名雅爲當時所貴早卒孝昭時佐命功臣配饗不及蘭根次子敬仲表訴竟不允敬仲以才器稱卒於章武太守子餉字孝衡幼孤學涉有時譽居喪以孝聞隋饒州司倉參軍事子景義景禮並有才行鄉人呼爲雙鳳早卒敬仲弟少政位至洛州刺史子孝該孝幾愷自散騎常侍遷青州長史固辭文宣大怒曰何物漢子與官不就時帝已失德朝廷爲之懼愷容色坦然帝曰死與長史任卿所擇荅曰能殺臣者陛下不受長史者愚臣帝謂楊愔曰何慮無人苦用此漢放還永不須收由是積年沈廢後遇愔於路微自陳愔云咸由中旨愷應聲曰雖復零雨自天終待雲興四岳公豈得言不知楊愔

欣然曰此極爲簡要數日除霍州刺史在職有政理後卒於膠州刺史

論曰伯起少頗疎放不拘行檢及折節讀書鬱爲偉器學博今古才極從橫體物之旨尤爲富贍足以入相如之室游尼父之門勒成魏籍追蹤班馬婉而有則繁而不蕪持論序言鈞深致遠但意存實錄好抵陰私至於親故之家一無所詭不平之議見於斯矣王松年李庶等並論正家門未爲謗議遂憑附時宰鼓動淫刑庶因鞭撻而終此公之失德長賢思樹風聲抗言昏俗有朱子游之風季景父子雅業相傳抑弓冶之義蘭根道冠時英功參霸業亦一代之偉人也

丙寅三月 天啓
巳卯六月五日 閱竟 白 淑 自 如 汝 秋 曾 黃 二 交 遂 揚
梅 菴 伯 氏 作 者 併 食 料 順 皇

北史卷五十六 列傳第四十四 終

華川中鳳園
氏圖同開出

北史卷五十七

華川中鳳園
氏圖同開出

北史卷五十七 列傳第四十五

周宗室

邵惠公顥

子什肥

導護

叱羅協

馮遷

杞簡公連

莒莊公洛生

虞國公仲

廣川公測

弟深

深子孝山

東平公神舉

弟慶

邵惠公顥周文帝之長兄也德皇帝娶樂浪王氏是為德皇后生
顥性至孝居德皇后喪哀毀過禮德皇帝與衛可瓌戰墜馬顥與
數騎奔救乃免顥遂歿保定初追贈大冢宰封邵國公謚曰惠

三子什肥導護

什肥事母以孝聞文帝入關不能離母遂留晉陽文帝定秦隴什肥爲齊神武所害保定初追贈大將軍小冢宰襲爵邵國公謚曰景子胄嗣胄少孤頗有幹畧景公之見害以幼年下齷室保定初詔以晉公護子會紹景公封天和中與齊通好胄歸襲爵邵國公及隋文帝輔政胄爲榮州刺史舉兵應尉遲迥爲清河公楊素所殺國除會字乾仁胄至自齊改封譚國公後與護同誅建德三年追復封爵常武公

導字菩薩少雄豪初與諸父在葛榮中榮敗遷晉陽與文帝隨賀拔岳入關常從征伐文帝討侯莫陳悅導追斬之牽屯山以功封饒陽縣伯及魏文帝東征留導爲華州刺史旣而趙青雀于伏德慕容思慶等作亂導禽伏德斬思慶屯渭橋會文帝軍及事平進

爵章武郡公加侍中及高仲密以北豫州降文帝東征復以導爲大都督行華州刺史甚得守扞之方及大軍不利東魏追至稠桑知關中有備乃退侯景來附詔徵隴右大都督獨孤信東下令導代信爲秦州刺史大都督十五州諸軍事及齊氏稱帝文帝討之魏文帝遣齊王廓鎮隴右徵導拜大將軍大都督二十三州諸軍事屯咸陽大軍還乃旋舊鎮導性寬明善撫御文帝每出征導恒居守深爲吏人所附朝廷重之薨於上邽魏帝遣侍中漁陽王綱監護喪事贈尚書令謚曰孝朝議以導撫和西戎威恩顯著欲令世鎮隴右以彰厥德乃塋上邽城西無疆原華戎會葬者萬餘人莫祭於路悲號振野皆曰我君捨我乎大小相與負土成墳高五十餘尺周回八十餘步爲官司所止然後泣辭而去天和五年重贈太師柱國公導五子廣亮翼椿衆亮椿出後於杞

廣字乾歸，少方嚴，好文學。武成初，位大將軍，梁州總管，進封蔡國公。累遷秦州刺史，總管十三州諸軍事。性明察，善撫綏，人庶畏悅。之時，晉公護諸子及廣弟杞、公亮等，侈靡踰制，廣獨率禮，又折節待士，朝野稱焉。曾侍於武帝，所食瓜美，持以奉進，帝悅之。廣以晉公護擅權，勸令挹損，護不能納。後除陝州總管，以病免。及孝公追封豳國公，詔廣襲爵。初，廣母李氏以患憂而成疾，遂歿。廣居喪加篤，乃以毀薨，世稱母為廣病。廣為母死，慈孝之道，極於一門。武帝素服親臨，其故吏儀同、李克信等上表褒述，申其宿志，庶存儉約。詔曰：昔河間才藻，追叙於中尉；東海謙約，見稱於身後。可斟酌前典，率由舊章，使易簣之言得申，遺志黜殞之請無虧。令終於是，贈本官，加太保，隴右十四州諸軍事，秦州刺史，謚曰文。葬於隴右，所司一遵儉約之典。子洽嗣。隋文輔政，被害，國除。

翼字乾宜，封西陽郡公。早薨，謚曰昭。無子，以杞公亮子溫嗣。後坐亮反，誅國除。眾字乾道，少不慧，封天水郡公。為隋文所誅。護字薩保，幼方正，有志度，特為德皇帝所愛。文帝之入關，以年小不從。普泰初，始自晉陽至平涼，時年十七。文帝諸子並幼，遂委以家務，內外無不嚴肅。文帝歎之，以為類已。及臨夏州，留護事賀拔岳。岳被害，文帝至平涼，以護為都督，從破侯莫陳悅。後以迎魏帝功，封水池縣伯。從文帝禽竇泰，復弘農，破沙苑，戰河橋，並有功。芒山之役，為敵人所圍，賴都督侯伏龍恩救，乃免。坐免官，尋復本位。大統十三年，進封中山公。十五年，遷大將軍，與于謹征江陵，進兵徑至江陵城下，以待大軍至，圍而剋之。師還，護又討平襄陽蠻師，向天保等萬餘落。初行六官，拜司空。文帝西巡，至牽屯山，遇疾，召護至涇州見文帝。帝曰：吾形容若此，必不濟。諸子幼，天下事以屬

汝護涕泣奉命行至雲陽文帝崩護秘之至長安乃發喪時嗣子冲幼強寇在近人情不安護綱紀內外撫循文武衆心乃定先是文帝常云我得胡力當時莫曉其指時人以護字當之尋拜柱國文帝山陵畢護以天命有歸遣諷魏帝以禪代事孝閔踐阼拜大司馬封晉國公邑萬戶趙貴獨孤信等將謀襲護護因貴入朝執之黨與皆伏誅拜大冢宰時司會李植軍司馬孫恒等密要宮伯乙弗鳳張光洛賀拔提元進等爲腹心說帝言護不守臣節宜圖之帝然之數將武士於後園爲執縛勢護微知之出植爲梁州恒爲同州欲遏其謀後帝思植等每欲召之護諫曰天下至親不過兄弟若兄弟自構嫌隙他人何易可親但恐除臣後姦回得逞其欲非唯不利陛下亦危社稷因泣涕久之乃止帝猶猜鳳等益懼密謀滋甚遂克日將誅護光洛告護護乃召柱國賀蘭祥小司馬

尉遲綱等以鳳謀告之祥竝勸廢帝時綱總領禁兵護乃遣綱入宮召鳳等議事以次執送護策因罷散宿衛兵遣祥逼帝幽於舊邸於是召公卿畢集護策護曰先王勤勞王業三十餘年寇賊未平奄棄萬國寡人地則猶子親受顧命以畧陽公旣居正嫡與公等立而奉之革魏興周爲四海主自卽位已來荒淫無度昵近群小疎忌骨肉大臣重將咸欲誅夷若此謀遂行社稷必致傾覆寡人若死將何面目以見先王今日寧負畧陽公豈可負社稷寧都公年德兼茂仁孝聖慈今欲廢昏立明公等以爲何如群公咸曰此公之家事敢不唯命是聽於是斬鳳等於門外并誅植恒尋弒帝迎明帝於岐州而立之二年拜太師賜路車冕服封子至爲崇業郡公初改雍州刺史爲牧以護爲之并賜金石之樂武成元年護上表歸政帝許之軍國大事尚委於護帝性聰睿有識量護深

憚之有李安者本以鼎俎得寵於護擢爲膳部下大夫至是護令安自因進食加毒帝遂崩護立武帝百官總已以聽護自文帝爲丞相立左右十二軍總屬相府文帝崩後皆受護處分凡所徵發非護書不行護第屯兵禁衛盛於宮闕事無巨細皆先斷後聞保定元年以護爲都督中外諸軍事令五府總於天官或有希護旨者云周公德重魯立文王之廟以護功比周公宜用此禮於是詔於同州晉國第立德皇帝別廟使護祭焉三年詔自今詔誥及百司文書並不得稱公名以彰殊禮護抗表固讓初文帝創業卽與突厥和親謀爲犄角共圖高氏是年乃遣柱國楊忠與突厥東伐破齊長城至并州而還期後年更舉南北相應齊主大懼先是護母閻與皇第四姑及諸戚屬並沒齊皆被幽繫護居宰相後每遣間使尋求莫知音息至是並許還朝且請和好四年皇姑先至齊

主以護權重乃留其母以爲後圖仍令人爲閻作書與護曰吾念十九入汝家今以八十矣凡生汝輩三男二女今日目下不覩一人興言及此悲纏肌骨賴皇齊恩卹差安衰暮又得與汝楊氏姑及汝叔母紇于汝嫂劉及汝新婦等同居頗以自適但爲微有耳疾大語方聞行動飲食幸無多損汝與吾別之時年尚幼小以前家事或不委曲昔在武川鎮生汝兄弟大者屬鼠第二屬兔汝身屬蛇鮮于修禮起日吾合家大小先在博陵郡住相將欲向左入城至唐河北被定州官軍打敗汝祖及第二叔時俱戰亡叔母賀拔及兒元寶汝叔母紇于及兒菩提并吾與汝六人同被禽捉入定城未幾聞將吾及汝送與元寶掌賀拔紇于各別分散寶掌軍營在唐城內經停二日寶掌所掠得男女婦可六七千人悉送向京吾時與汝同被送限至定州城南夜宿同鄉人姬庫根家蠕

蠕奴望見鮮于修禮營火語吾云我今走向本軍既至營遂告吾
 輩在此明旦日出汝叔將兵邀截吾及汝等還得向營汝時年十
 二共吾並乘馬隨軍可不記此事由緣也後吾共汝在壽陽任時
 元寶菩提及汝姑兒賀蘭盛洛并汝身四人同學博士姓成爲人
 嚴惡汝等四人謀欲加害吾共汝叔母聞知各捉其兒打之唯盛
 洛無母獨不被打後介朱天柱亡歲賀拔阿斗泥在關西遣人迎
 家累汝叔亦遣奴來富迎汝及盛洛等汝時著緋綾袍銀裝帶盛
 洛著紫織成纈通身黃綾裏並乘騾同去盛洛小於汝三人並喚
 吾作阿摩敦如此之事當分明記之今又寄汝小時所著錦袍表
 一領至宜檢看知吾含悲抱戚多歷年祀禽獸草木母子相依吾
 有何罪與汝分隔今復何福還望見汝世間所有求皆可得母子
 異國何處可求假汝貴極公王富過山海有一老母八十之年飄

然千里死亡旦夕不得一朝暫見不得一日同處寒不得汝衣饑
 不得汝食汝雖窮榮極盛光耀世間汝何用爲於吾何益吾今日
 之前汝既不得申其供養事往何論今日以後吾之殘命唯繫於
 汝戴天履地中有鬼神勿云冥昧而可欺負楊氏姑今雖炎暑猶
 能先發關河阻遠隔絕多年書依常體慮汝致惑是以每存款質
 兼亦載吾姓名當識此理勿以爲怪護性至孝得書悲不自勝左
 右莫能仰視報書云區宇分崩遭遇災禍違離膝下三十五年受
 形稟氣皆知母子誰知薩保如此不孝宿殃積戾唯應鸚鵡鐘豈悟
 網羅上嬰慈母但立身立行不負一物明神有識宜先哀憐而子
 爲公侯母爲俘隸熱不見母熱寒不見母寒衣不知有無食不知
 饑飽泯如天地之外無由暫聞晝夜悲號繼之以血分懷冤酷終
 此一生死若有知冀奉見於泉下耳不謂齊朝鮮網惠以德音摩

敦四姑並許哀放初聞此旨竟爽飛越號天叩地不能自勝四姑
 卽蒙禮送平安入境以今月十八日於河東拜見遙奉顏色崩慟
 肝腸但離絕多年存亡阻隔相見之始口未忍言唯叙齊朝寬弘
 每存大德云與摩敦雖處宮禁常蒙優禮今者來艱恩遇彌隆重
 降矜哀聽許摩敦垂救曲盡悲酷備述家事伏讀未周五情屠割
 書中所道無一事敢忘摩敦年尊又加憂苦常謂寢食貶損或多
 遺漏伏奉論述次第分明一則以悲一則以喜當鄉里被敗之日
 薩保年以十歲隣曲舊事猶自記憶况家門禍難親戚流離奉辭
 時節先後慈訓刻肌刻骨常纏心府天長喪亂四海橫流太祖乘
 時齊朝撫運兩河三輔各遇神機源其事迹非相負背太祖升遐
 未定薩保屬當猶子之長親受顧命雖身居重任職當憂責至於
 歲時稱慶子孫在庭顧視悲摧心情斷絕胡顏履戴負媿神明齊

朝霽然之恩旣已霑洽愛敬之至施及傍人草木有心禽魚感澤
 況在人倫而不銘戴有國有家信義爲本伏度來期已應有日一
 得奉見慈顏永畢生願生死肉骨豈過今恩負山戴岳未足勝荷
 二國分隔理無書信主上以彼朝不絕母子之恩亦賜許奉荅不
 期今日得通家問伏紙嗚咽言不宣心蒙寄薩保別時所留錦袍
 表年歲雖久宛然猶識抱此悲泣至於拜見事歸忍死知復何心
 齊朝不卽發遣更令重與護書要護重報護復書往返至於再三
 而母竟不至朝議以其失信令有司移齊移未送而母至舉朝慶
 悅大赦天下護與母睽隔多年一朝聚集凡所資奉窮極華盛每
 四時伏臘武帝率諸親戚行家人禮稱觴上壽榮貴之極振古未
 聞是年突厥復率衆赴朝護以齊氏初送國親未欲卽行復慮失
 信番夷不得已遂請東征九月詔徵二十四軍及左右廂散隸秦

隴巴蜀兵諸蕃國衆二十萬人十月帝於廟庭授護斧鉞出軍至潼關乃遣柱國尉遲迥爲前鋒大將軍權景宣率山南兵出豫州少師楊標出軹關護連營漸進屯軍弘農迥圍洛陽柱國齊王憲鄭公達奚成等營芒山護性無戎畧此行又非本心故師出雖久無所克獲以無功與諸將稽首請罪帝弗之責天和二年護母薨尋詔起令視事五年詔賜護軒懸之樂六佾之舞護性甚寬和然暗於大體自恃建立功久當權軸所任皆非其人兼諸子貪殘僚屬縱溢莫不蠹政害人帝以其暴慢密與衛王直圖之七年三月十八日護自同州還帝御文安殿見護訖引入含仁殿朝皇太后先是帝於禁中見護常行家人禮護謁太后太后必賜之坐帝每立侍至是護將入帝謂曰太后春秋旣尊頗好酒諸親朝謁或廢引進喜怒有時乖爽比諫未蒙垂納兄今願更啟請因出懷中酒

誥授護曰以此諫太后護入如帝所誠讀示太后未訖帝以玉珽自後擊之踣地又令宦者何泉以御刀斫之泉懼斫不能傷時衛王直先匿於戶內乃出斬之初帝欲圖護王軌宇文神舉宇文孝伯頗預其謀是日軌等並在外更無知者殺護訖乃召宮伯長孫覽等卽令收護子柱國譚國公會大將軍莒國公至崇業公靜正平公乾嘉及乾基乾光乾蔚乾祖乾威等并柱國侯伏侯龍恩龍恩弟大將軍萬壽大將軍劉勇中外府司錄尹公正袁傑膳部下大夫李安等於殿中殺之齊王憲曰安出自阜隸所典庖廚而已未足加戮帝曰汝不知耳世宗之崩安所爲也十九日乃詔暴護等罪大赦改天和七年爲建德元年護世子訓爲蒲州刺史其夜遣柱國越公盛乘傳鎮蒲州徵訓赴京師至同州賜死護長史叱羅協司錄馮遷及所親任者皆除名護子昌城公澡使突厥遣開

府宇文德齋璽書就殺之三年詔復護及諸子先封謚護曰蕩並改葬之

叱羅協代郡人本名與武帝諱同後改焉少寒微嘗爲州小吏以恭謹見知竇泰爲御史中尉以協爲書侍御史泰向潼關協爲監軍泰死協見獲文帝授大丞相東閣祭酒累遷相府屬從事中郎協歷事二京詳練故事又深自剋勵文帝頗委任之然猶以家屬在東疑其戀本及河橋戰敗協隨軍還文帝知協不貳封冠軍縣男進爵爲侯後爲大將軍尉遲迥長史率兵伐蜀行潼州事魏恭帝三年文帝徵協入朝論蜀中事乃賜姓宇文氏晉公護旣殺孫恒李植等欲委腹心於司會柳慶司憲令狐整等二人並辭俱薦協護遂徵協入朝引與同宿深寄託之協誓以軀命自效護大悅以爲得協之晚稍遷護府長史進爵爲公常在護側明帝知其材

識庸淺每按抑之數謂曰汝何知也猶以護所親任每含容之及明帝崩便授協司會中大夫中外府長史協形貌瘦小舉措褊急旣以得志每自矜高又其所言多乖事衷當時莫不笑之護以其忠已每提獎之協旣受護重委冀得婚連帝室乃求復舊姓叱羅氏許之又進位柱國護以協年老許其致仕而協貪榮未肯告休及護誅除名建德三年以協宿齒授儀同三司賜爵南陽郡公卒子金剛嗣

馮遷字羽伐弘農人少修謹有幹能爲護府司錄性質直小心畏慎兼明練時事善於斷決每校閱文簿孜孜不倦以此甚爲護委任後授陝州刺史遷本徵寒不爲時輩所重一旦刺舉本州唯以謙恭接待鄉邑人無怨者復入爲司錄累遷小司空自天和後以年老委任稍衰及護誅猶除名卒於家子恕位儀同三司

杞簡公連幼而謹厚臨敵果毅隨德皇帝遇定州軍於唐河俱戰
 歿保定初追贈太傅柱國大將軍大司徒封杞國公謚曰簡子元
 寶為齊神武所害保定初追贈大將軍小司徒襲封杞國公謚曰
 烈以章武公導子亮嗣亮字乾德位梁州總管及幽國公廣薨以
 亮為秦州總管廣所部悉以配焉在州甚無政績尋進柱國從東
 伐進上柱國仍從平鄴遷大司徒大象初以行軍總管與元帥鄭
 國公韋孝寬等伐陳還至豫州密謀襲孝寬營將反逆孝寬追斬
 之肱明坐亮誅詔以亮弟椿為烈公後椿字乾壽位上柱國大司
 徒大定中為隋文帝所害并其五子

莒莊公洛生字任俠好施愛士北州賢俊皆與之游而才能多出
 其下及葛榮破鮮于修禮以洛生為滄陽王仍領德皇帝餘眾時
 人皆呼為洛生王洛生善撫將士是以克獲常冠諸軍介朱榮家

山東時洛生在虜中榮雅聞其名心憚焉尋為榮所害保定初追
 贈大將軍封莒國公謚曰莊子菩薩為齊神武所害保定初追贈
 大將軍小宗伯襲爵謚曰穆以晉公護子至嗣至字乾附後坐父
 護誅詔以衛王直子賓為穆公後賓字乾瑞尋坐直誅而齊王憲
 子廣都郡公貢襲貢字乾貞宣帝初被誅國除

虞國公仲德皇帝從父兄也卒于代保定初追贈太傅柱國大將
 軍大司徒封虞國公子興嗣興生屬兵亂與仲相失年幼莫知其
 戚屬遠近與文帝兄弟初不相識沙苑之敗預在行間被虜隨例
 散配諸軍興性弘厚有志度雖流離世故而風範可觀保定二年
 詔訪仲子孫興始附屬籍武帝以興帝戚近屬尊禮之甚厚位開
 府儀同三司宗師襲爵虞國公薨武帝親臨慟焉詔大司空申國
 公李穆監護喪事贈柱國大將軍謚曰靖子洛嗣位儀同三司隋

初爲介國公爲隋室賓云

廣川公測字澄鏡文帝之族子也高祖中山曾祖豆頰祖騏驎父永仕魏位並顯達測性沈密少篤學仕魏位司徒右長史尚宣武女陽平公主拜駙馬都尉及孝武疑齊神武詔測請文帝密爲之備還封廣川縣伯尋從孝武西遷進爵爲公文帝爲丞相以測爲右長史委以軍國又令測詳定宗室昭穆遠近附於屬籍歷位侍中開府儀同三司行汾州事政在簡惠頗得人和地接東魏數相抄竊或有獲其爲寇者多縛送之測皆命解縛置之賓館然後引與相見如客禮焉仍宴設故還其國衛送出境自是東魏人大慙乃不爲寇兩界遂通慶弔時論方之羊叔子或有告測懷貳文帝怒曰測爲我安邊何爲間骨肉乃命斬之仍許測便宜從事轉行綏州事每歲河冰合後突厥卽來寇掠先是常預遣居人人城堡

以避之測至皆令安堵乃於要路數百處並多積柴仍遠斥候知其動靜是年十二月突厥從連谷入寇去界數十里測命積柴處一時縱火突厥謂大軍至懼而遁走委棄雜畜輜重不可勝數自是不敢復至測因請置戍兵以備之後卒於太子少保文帝親臨勸焉仍令水池公監護喪事謚曰靖測性仁恕好施與在洛陽之日曾被竊盜所失物卽其妻陽平公主之衣服也州縣禽盜并物俱獲測恐此盜坐之以死不認焉遂遇赦免盜旣感恩請爲測左右及測從孝武西遷事極狼狽盜人亦從測入關並無異志子該嗣位除州刺史測弟深

深字奴于性鯁正有器局年數歲便累石爲營折草作旌旗布置行伍皆有軍陣之勢父永遇見之喜曰汝自然知此後必爲名將孝武西遷事起倉卒人多逃散深時爲都督領宿衛兵撫循所

部並得入關以功賜爵長樂縣伯大統中累轉尚書直事郎中及齊神武屯蒲坂分遣其將竇泰趨潼關高敖曹圍洛州周文帝將襲泰諸將咸難之帝隱其事陽若未有謀獨問策於深深曰竇氏高歡驍將歡每仗之禦侮今大軍就蒲坂則歡拒守竇必援之內外受敵取敗道也不如選輕銳潛出小關竇性躁急必來決戰高歡持重未卽救之則竇可禽也虜竇歡勢自沮迴師禦之可以制勝文帝喜曰是吾心也軍遂行果獲泰齊神武亦退深又說文帝進取弘農復剋之文帝大悅謂深曰君卽吾家陳平也是冬齊神武又率大衆至沙苑諸將皆懼惟深獨賀文帝問其故對曰歡撫河北甚得衆心雖乏智謀人皆用命以此自守未易可圖今懸師度河非衆所欲唯歡恥失竇氏復諫而來所謂忿兵一戰可禽也不賀何爲文帝然之尋大破齊軍果如所策俄進爵爲侯六官建

拜小吏部下大夫遷中大夫武成元年遷幽州刺史改封安化縣公保定初除京兆尹人爲司會中大夫深少喪父事兄甚謹性多奇譎好讀兵書旣居近侍每進籌策及在選曹頗有時譽性仁愛從弟神舉神慶幼孤深撫訓之義均同氣世亦以此稱焉卒於位謚曰成康子孝伯

孝伯字胡王其生與武帝同日文帝甚愛之養於第內及長又與武帝同學武成元年拜宗師上士時年十六性沈正嘗謬好直言武帝卽位欲引置左右時政在家臣不得專制乃託言少與同業受經思相啟發由是護弗之猜得入爲右侍上士恒侍讀及遭父憂詔令服中襲爵武帝嘗謂曰公於我猶漢高與盧縮也賜以十三環金帶自是恒侍左右出入臥內朝務皆得預焉孝伯亦竭心盡力無所回避至於時政得失外間細事皆以奏聞帝信委之當

時莫比及將誅晉公護密與衛王直圖之惟孝伯及王軌宇文神舉等頗得參預護誅授開府儀同三司歷司會中大夫左官正皇太子既無令德孝伯言於帝曰皇太子德聲未聞請妙選正人爲其師友調護聖質不然悔無所及帝斂容曰卿世載鯁正竭誠所事觀卿此言有家風矣孝伯拜謝曰非言之難受之難也深願陛下思之帝曰正人豈復過君於是以尉遲運爲右官正孝伯仍爲左官正宗師中大夫累遷右官伯常因侍坐帝問我兒比進不答曰皇太子比懼天威更無罪失及王軌因內宴捋帝鬚言太子之不善帝罷酒責孝伯曰公常謂我云太子無過今軌有此言公爲誑矣孝伯拜曰臣聞父子之際人所難言臣知陛下不能割情忍愛遂爾結舌帝知其意默然久之乃曰朕已委公公其勉之及大軍東討拜內史下大夫令掌留臺事軍還帝曰居守之重無忝戰

在

功於是加授大將軍進爵廣陵郡公并賜金帛女妓等復爲宗師每車駕巡幸常執其手令居守後帝北討至雲陽宮寢疾驛召孝伯赴行所執其手曰吾自量必無濟理以後事付君是夜授司衛上大夫總宿衛兵馬令馳驛入京鎮守宣帝卽位授小冢宰帝忌齊王憲意欲除之謂孝伯曰公能圖之當以其官位相授孝伯叩頭曰齊王戚近功高棟梁所寄臣若順旨則臣爲不忠陛下不孝之子也帝因踈之乃與于智鄭譯等圖其事令智告憲謀逆遣孝伯召入誅之帝之西征也在軍有過行鄭譯時亦預焉軍還孝伯及王軌盡以白武帝武帝怒捥帝數十乃除譯名至是帝追憾被杖乃問譯我脚上杖痕誰所爲也譯曰事由宇文孝伯及王軌譯又說軌捋帝鬚事帝乃誅軌尉遲運懼私謂孝伯曰吾徒必不免禍奈何孝伯曰今堂上有老母地下有武帝爲臣爲子知欲何之

且委質事人本徇名義諫而不入將焉逃死足下若爲身計宜且遠之於是各行其志運尋出爲秦州總官帝荒淫日甚誅戮無度孝伯頻諫不從由是益疎後稽胡反令孝伯爲行軍總管從越王盛討平之及軍還帝將殺之乃託以齊王事誚之曰公知齊王謀反何以不言對曰臣知齊王忠於社稷爲群小媒孽加之以罪臣以言必不用所以不言且先帝屬微臣輔陛下今諫而不從實負顧託以此爲罪是所甘心帝慙俛首不語令賜死於家時年三十六及隋文帝踐極以孝伯王軌忠而獲罪並令收葬復其官爵嘗謂高穎曰宇文孝伯寔有周良臣若此人在朝我輩無措手處子歆嗣

東平公神舉文帝之族子也高祖普陵會祖求男仕魏位並顯達祖金殿魏兗州刺史安喜縣侯父顯和少而襲爵性矜嚴頗涉經史膂力絕人彎弓數百斤能左右馳射孝武之在蕃顯和早蒙眷遇時屬多難嘗問計於顯和顯和具陳宜杜門晦迹相時而動帝深納焉及卽位拜閤內都督封城陽縣公以恩舊遇之甚厚顯和所居隘陋乃撤殿省賜爲寢室其見重如此及齊神武專政帝每不自安問顯和曰天下汹汹將如之何對曰莫若擇善而從因誦詩云彼美人兮西方之人兮帝曰是吾心也遂定入關策以其母老令預爲計對曰今之事忠孝不並然臣不密則失身安敢預爲私計帝愴然改容曰卿我之王陵也遷朱衣直閤閤內大都督改封長廣縣公從孝武入關至溱水周文帝素聞其善射而未之見俄而水傍有一小鳥顯和射中之文帝笑曰我知卿工矣進位車騎大將軍儀同三司散騎常侍卒建德三年追贈驃騎大將軍開府儀同三司神舉早孤有夙成之量及長神情倜儻志畧英贍眉

目疎朗儀貌魁梧明帝初起家中侍上士帝留意翰林而神舉雅好篇什每游幸神舉恒從襲爵長廣縣公天和元年累遷右宮伯中大夫進爵清河郡公建德三年自京兆尹出爲熊州刺史齊人憚其威名及帝東伐從平并州卽授刺史州旣齊氏別都多有姦猾神舉示以威恩遠近悅服改封武德郡公進柱國大將軍又改封東平郡公宣政元年轉司武上大夫及幽州人盧昌期等據范陽反詔神舉討禽之時齊黃門侍郎盧思道亦在反中賊平將解衣伏法神舉乃釋而禮之卽令草露布屬嵇胡反寇西河神舉與越王盛討之時突厥赴救神舉以奇兵擊之突厥敗走嵇胡欵服卽授并州總管神舉見待於武帝處心腹之任王軌宇文孝伯等屢言皇太子之短神舉亦頗預焉及宣帝卽位荒淫無度神舉懼及禍懷不自安初定范陽之後威聲甚振帝亦忌其名望兼以宿

憾遂使人齎醢酒賜之薨於馬邑時年四十八神舉美風儀善辭令博涉經史性愛篇章尤工騎射臨戎對寇勇而有謀在職當官每著聲績兼好施愛士以雄豪自居故得任兼文武聲彰外內百寮無不仰其風則先輩舊齒至於今稱之子同嗣位至儀同大將軍神舉弟慶

慶字神慶沈深有器局少以聰敏見知初受業東觀頗涉經史旣而謂人曰書足記姓名而已安能久事筆硯爲腐儒業乎時文州賊亂慶應募從征以功授都督衛王直鎮山南引爲左右慶善射有膽氣好格猛獸直甚壯之稍遷車騎大將軍儀同三司及誅宇文護慶有謀焉進授驃騎大將軍加開府從武帝攻河陰先登攀堞與賊短兵接中石乃墜絕而後蘇帝勞之曰卿勇可以賈人也復從武帝拔晉州齊兵大至慶與齊王憲輕騎覘卒與賊窘憲挺

身而遁慶退據汾橋衆賊爭進慶射之所中人馬必倒賊乃稍却及拔高壁剋并州下信都禽高潛功並居最進位大將軍封汝南郡公尋以行軍總管擊延安反胡平之歷延寧二州總管隋文帝爲丞相以行軍總管征江表次白帝以勞進上大將軍帝與慶有舊甚見親待令督丞相軍事委以心腹尋加柱國開皇初拜左武衛將軍進上柱國數年除涼州總管歲餘徵還不任以職初文帝龍潛時嘗與慶言謂曰天元質無積德其相貌壽亦不長加以法令繁苛耽恣聲色以吾觀之殆將不久又諸侯微弱各令就國曾無深根固本之計羽翮旣翦何能及遠尉遲迥貴戚早著聲望國家有釁必爲亂階然智量庸淺子弟輕佻貪而少惠終致亡滅司馬消難反覆之虜亦非池內之物變在俄頃但輕薄無謀未能爲害不過自竄江南耳庸蜀險隘易生艱阻王謙愚蠢素無籌畧但

靜亂清書作
辭禮

試之

恐爲人所誤不足爲虞未幾上言皆驗及此慶恐上遺忘不復收用欲見舊蒙恩顧具錄前言爲表奏之上省表大悅下詔曰朕言之驗自是偶然公乃不忘彌表誠節深感至意嘉尚無已自是上每加優禮卒於家子靜亂尚隋文女廣平公主位儀同安德縣公熊州刺史先慶卒靜亂子協位右翊衛將軍宇文化及之亂遇害協弟晶字婆羅門大業中養于宮內後爲千牛左右煬帝甚親昵之每有游宴必侍從至於出入臥內伺察六宮往來不限門禁時人號爲宇文三郎與官人淫亂至於妃嬪公主亦有醜聲蕭后言於帝晶聞懼不敢見協因奏晶壯不可久在宮掖帝不之罪召入待之如初化及殺逆際爲亂兵所害論曰自古受命之君及守文之主非獨異姓之輔亦有骨肉之助焉其茂親則有魯衛梁楚其疎屬則有凡蔣荆燕咸能飛聲騰實

不滅於百代之後至若幽孝公之勳烈加之以善政蔡文公之純
孝飾之以儉約峩峩焉足以輔於前載矣有周受命之始宇文護
實預艱難及文后崩殂諸子冲幼群公懷等夷之士天下有去就
之心卒能變魏為周捍危獲義者護之力也向使加之以禮讓經
之以忠貞桐宮有悔過之期未央終天年之數則前史所載焉足
道哉然護寡於學術昵近群小威福在已征伐自出有人臣無君
之心為人主不堪之事終於妻子為戮身首橫分蓋其宜也當隋
氏之起假天威而服海內胄以葭莩之親據一州而叶義舉可謂
忘而能勇功業不遂悲夫亮實庸才圖非常於巨逆古人稱不度
德不量力者其斯之謂歟宇文測兄弟驅馳於經綸之日孝伯神
舉盡言於父子之間觀其智勇忠槩並可追蹤於古人矣

北史卷五十七

列傳第四十五 終

魏川中鳳園
氏雷南甫

北史卷五十八

魏川中鳳園
氏雷南甫

列傳第四十六

周室諸王

文帝十三王

孝閔帝一王

明帝三王

武帝六王

宣帝二王

周文帝十三子姚夫人生明帝後宮生宋獻公震文元皇后生孝
閔皇帝文宣叱奴皇后生武帝衛刺王直達步妃生齊煬王憲王
姬生趙僭王招後宮生譙孝王儉陳惑王純越野王盛代吳王達
冀康公通滕聞王道

宋獻公震字彌俄突幼而敏達大統十六年封武邑公尚魏文帝女其年薨保定元年追贈大司馬封宋國公無子以明帝第三子實嗣建德三年進爵爲王大象中爲大前疑誓爲隋文帝害國除衛刺王直字豆羅突魏恭帝三年封秦郡公武成初進封衛國公歷雍州牧大司空襄州總管直武帝母弟也性浮詭以晉公護執政遂貳於帝而昵護及南討軍敗愠於免黜又請帝除護帝宿有誅護意遂與直謀之及護誅帝以齊王憲爲大冢宰直旣乖本望又請爲大司馬欲擅威權帝知其意謂曰汝兄弟長幼有序何反居下列也以爲大司徒建德三年進爵爲王初帝以直第爲東宮更使直自擇所居直歷觀府署無稱意者至廢陟岵佛寺遂欲居之齊王憲謂曰弟兒女成長此寺褊小詎是所宜直曰一身尚不自容何論兒女憲恠而疑之直嘗從帝校獵而亂行帝怒對衆撻

之自是忿怨滋甚及帝幸雲陽宮直在京師反攻肅章門司武尉遲運閉門不得入退走追至荊州獲之免爲庶人囚諸宮中尋有異志及其子十人竝誅之國除

齊煬王憲字毗賀突性通敏有度量初封涪城縣公少與武帝俱授詩傳咸綜機要得其指歸文帝嘗賜諸子良馬惟其所擇憲獨取駿者帝問之對曰此馬色類旣殊或多駿逸若從軍征伐牧圉易分帝喜曰此兒智識不凡當成重器後從上隴經官馬牧文帝每見駿馬輒曰此我兒馬也命取以賜之魏恭帝元年進封安城郡公明帝卽位授大將軍武成初除益州總管進封齊國公初平蜀之後文帝以其形勝之地不欲使宿將居之諸子中欲有推擇徧問武帝以下誰欲此行竝未及對而憲先請文帝曰刺史當撫衆臨人非爾所及以年授者當歸爾兄憲曰才用殊不關大小試

而無效甘受面欺文帝以憲年尚幼未之遣明帝追遵先旨故有
此授憲時年十六善於撫綏留心政術辭訟輻湊聽受不疲蜀人
悅之共立碑頌德保定中徵拜雍州牧及晉公護東伐以尉遲迥
爲前鋒圍洛陽齊兵數萬奄出軍後諸軍恆駭竝各退散唯憲與
王雄達奚武拒之而雄爲齊人所敗三軍震懼憲親自督勵衆心
乃安時晉公護執政雅相親委賞罰之際皆得預焉天和三年以
憲爲大司馬行小冢宰雍州牧如故四年齊將獨孤永業來寇詔
憲與柱國李穆出宜陽築崇德等五城絕其糧道齊將斛律明月
築壘洛南五年憲涉洛邀之明月遁走是歲明月又於汾北築城
西至龍門晉公護問計於憲憲曰兄宜暫出同州爲威容憲請以
精兵居前隨機攻取六年憲率衆出自龍門齊將新蔡王康德潛
軍宵遁憲乃度河攻其伏龍等四城二日盡拔又攻張壁克之併

律明月時在華容弗能救乃北攻姚襄城陷之汾州又見圍日久
憲追柱國宇文盛運粟饋之憲自入兩乳谷襲克齊伯杜城使柱
國譚公會築石殿城以爲汾州之援齊平原王段孝先蘭陵王高
長恭引兵大至大將軍韓歡爲齊人所乘遂退憲身自督戰齊衆
稍却會日暮乃各收軍及晉公護誅武帝召憲入免冠拜謝帝謂
曰汝親則同氣休戚共之事不相涉何煩致謝乃詔憲往護第收
兵符及諸簿籍等尋以憲爲大冢宰時帝旣誅宰臣親覽朝政方
欲齊之以刑爰及親親亦爲刻薄憲旣爲護所任自天和後威勢
漸隆護欲有所陳多令憲奏其間或有不可憲慮主相嫌隙每曲
而暢之帝亦悉其此心故得無患然猶以威名過重終不能平雖
遷授冢宰實奪其權也開府裴文舉憲之侍讀帝嘗御內殿引見
謂曰昔魏末不綱太祖匡輔元氏有周受命晉公復執威權積習

生常便謂法應須爾豈有三十歲天子可爲人所制乎且近代以來又有一弊暫經隸屬使卽禮若君臣此乃亂時權宜非經國之術爾雖陪侍齊公不得卽同臣主且太祖十兒寧可悉爲天子卿宜規以正道無令兄弟自致嫌疑文舉再拜而出歸以白憲憲指心撫几曰吾心公寧不悉但當盡忠竭節耳知復何言建德三年進爵爲王憲友劉休徵獻王箴一首憲美之休徵後又以箴上之帝方剪削諸弟甚悅其文憲嘗以兵書繁廣自刊爲要略五篇至是表陳之帝覽而稱善其秋帝於雲陽寢疾衛王直於京師舉兵帝召憲謂曰汝爲前軍吾亦續發直尋敗走帝至京師憲與趙王招俱入拜謝帝曰管蔡爲戮周公作輔人心不同有如其面但愧兄弟親尋干戈於我爲不能耳初直內忌憲憲隱而容之且以帝母弟每加友敬晉公護之誅也直固請及憲帝曰齊公心迹吾自

悉之不得更有所疑及文宣皇后崩直又密啟憲飲酒食肉與平昔不異帝曰吾與齊王異生俱非正嫡特爲吾意今祖括是同汝當媿之何論得失汝親太后之子但須自勗直乃止四年帝將東討獨與內史王誼謀之餘人莫知後以諸弟才略無出憲右遂告之憲卽贊成其事及大軍將出憲表上金寶等一十六件以助軍資詔不納以憲表示公卿曰人臣當如此朕貴其心耳寧資此物乃詔憲爲前軍趣黎陽帝親圍河陰未尅憲攻拔武濟進圍洛口拔其東西二城以帝疾班師是歲初置上柱國官以憲爲之五年大舉東討憲復爲前鋒守雀鼠谷帝親圍晉州憲進克洪洞永安二城更圍進取齊主聞晉州見圍自來援之時陳王純頓千里徑大將軍永昌公椿屯雞棲原大將軍宇文盛守汾水關竝受憲節度憲密謂椿曰兵者詭道汝今爲營不須張幕可伐栢爲菴示有

處所令兵去之後賊猶致疑時齊王分軍萬人向千里徑又令其衆出汾水關自率大兵與椿對宇文盛馳告急憲自救之齊人遽退盛與柱國侯莫陳芮逐之多有斬獲俄而椿告齊衆稍逼憲又救之會被敕追還率兵夜反齊人果謂栢菴爲帳幕不疑軍退翌日始悟時帝已去晉州留憲後拒憲阻水爲陣齊領軍段暢至橋憲隔水問暢姓名暢曰領軍段暢也公復爲誰憲曰我虞侯大都督耳暢曰觀公言語不是凡人何用隱名位憲乃曰我齊王也徧指陳王純已下竝以告之暢鞭馬去憲卽命旋軍齊人遽追之戈甲甚銳憲與開府宇文忻爲殿拒之斬其驍將賀蘭豹子山褥瓌等齊衆乃退帝又命憲援晉州齊王攻圍晉州帝次于高顯憲率所部先向晉州明日諸軍總集稍逼城下齊人大陣於營南帝召憲馳往觀之憲反命曰請破之而後食帝悅旣而諸軍俱進應時

大潰齊主遁走齊人復據高壁及洛女帝命憲攻洛女破之齊主已走鄴留其安德王延宗據并州帝進圍其城憲攻其西面尅之延宗遁走追而獲之以功進封第二子安成公質爲河間王拜第三子竇爲大將軍仍詔憲趣鄴進尅鄴城憲善兵謀長於撫御摧鋒陷陣爲士卒先齊人聞風憚其勇略齊任城王湝廣寧王孝珩等守信都復詔憲討之仍令齊王手書招湝湝不納憲軍過趙州潛令間諜二人覘候騎執以白憲憲乃集齊舊將徧將示之曰吾所爭者大不在汝等卽放還令充使乃與湝書憲至信都湝陣於城南登張耳冢望之俄而湝所署領軍尉相願僞出略陣遂降湝殺其妻子明日擒湝及孝珩等先是稽胡劉沒鐸自稱皇帝又詔憲督趙王招等平之憲自以威名日重潛思屏退及帝欲親征北蕃乃辭以疾尋而帝崩宣帝嗣位以憲屬尊望重深忌之時尚未

周書作三十五
武帝第四卷
武帝年止三
十六周書記年
三十五者是也
庚任神是碑
二十四出四十
望遠黃華

葬諸王在內居服司衛長孫覽總兵輔政恐諸王有異志奏令開府于智察其動靜及山陵還帝又命智就宅候憲因是告憲有謀帝遣小冢宰宇文孝伯謂憲曰今欲以叔為太師九叔為太傅十一叔為太保何如憲辭以才輕孝伯返命復來曰詔王晚共諸王俱入既至殿門憲獨被引進帝先伏壯士於別室至即執之憲辭色不撓固自陳說帝使于智對憲憲目光如炬與智相質或曰以王今日事勢何用多言憲曰我位重屬尊一旦至此死生有命寧復圖存但老母在堂恐留慈恨耳因擲笏於地乃縊之時年四十二帝以于智為柱國封齊國公又殺上大將軍安邑公王興上開府獨孤熊開府豆盧紹等皆以昵於憲也帝既誅憲無以為辭故託與等與憲結謀遂加戮焉時人知其冤酷咸云伴憲死也憲所生達步干氏蠕蠕人也建德三年上冊為齊國太妃憲有至性事母

以孝聞太妃舊患屢經發動憲衣不解帶扶持左右憲或東西從役每心驚母必有疾乃馳使參問果如所慮六子貴質實貢乾禧乾洽貴字乾福少聰敏尤便騎射始讀孝經便謂人曰讀此一經足為立身之本十歲封安定郡公文帝始封此郡未嘗假人至是封焉年十一從憲獵於鹽州一圍中手射野馬及鹿一十有五建德二年拜齊國世子後出為幽州刺史貴雖出自深宮而留心庶政性聰敏過目輒記嘗道逢二人謂其左右曰此人是縣黨何因輒行左右不識貴便說其姓名莫不嗟伏白獸烽經為商人所燒烽帥受貨不言其罪他日此帥隨例來參貴乃問云商人燒烽何因私放烽帥愕然遂即首伏其明察如此卒時年十七武帝甚痛惜之質字乾祐以憲勲封河間郡王實字乾禮中填公貢出後莒莊公乾禧安城公乾洽龍涸公竝與憲俱被誅

趙僭王招字豆盧突幼聰穎博涉羣書好屬文學庾信體詞多輕
 艷魏恭帝三年封正平郡公武成初進封趙國公歷益州總管大
 司空大司馬進爵為王除雍州牧建德五年從東伐以功進位上
 柱國又與齊王憲討平稽胡斬賊帥劉沒鐸宣政中拜太師大象
 元年詔以洛州襄國郡邑萬戶為趙王國招出就國二年宣帝不
 豫徵招及陳越代滕五王赴闕比招等至而帝已崩隋文帝輔政
 加招等殊禮入朝不趣劔履上殿隋文帝將遷周鼎招密欲圖之
 以匡社稷乃要隋文帝至第飲於寢室招子員貫及妃弟魯封所
 親人史胄皆先在左右佩刀而立又藏兵刃於帷席間後院亦伏
 壯士隋文帝從者多在閣外惟楊弘元胄胄弟威及陶徹坐戶側
 招屢以佩刀割瓜啖隋文隋文未之疑元胄覺變扣刀而入乃以
 大觴親飲胄酒又命胄向厨取醬胄不為之動滕王道後至隋文

降階迎胄因得耳語曰公宜速出隋文共道等就坐須臾辭出後
 事覺陷以謀反其年伏誅招及其子德廣公員永康王貫越公乾
 銑弟乾鏗等國除招所著文集十卷

譙孝王儉字侯幼突武成初封譙國公建德三年進為王從平鄴
 拜大冢宰薨子乾暉嗣為隋文帝所害國除

陳惑王純字堙智突武成初封陳國公保定中使突厥迎皇后歷
 秦陝二州總管建德三年進爵為王從平齊遜位上柱國歷并州
 總管雍州牧太傅大象元年詔以濟南郡邑萬戶為陳國純出就
 國二年朝京師并其子為隋文帝所害國除

越野王盛字立久突武成初封越國公建德三年進爵為王從平
 齊進位上柱國歷相州總管大冢宰大象元年遷大前疑太保其
 年詔以豐州武當安昌二郡邑萬戶為越國盛出就國二年朝京

師并其子為隋文帝所害國除

代吳王達字度斤突性果決善騎射武成初封代國公建德初進位柱國出為荊州刺史有政績武帝手救襄美之所管禮州刺史蔡澤贖貨被訟達以其勲庸不可加戮若曲法貸之又非奉上之體乃令所司精加案劾密表奏之事竟得釋終亦不言其處事周慎如此雅好節儉食無兼膳侍姬不過數四皆衣綈衣又未嘗營產國無儲積左右嘗以為言達曰君子憂道不憂貧何煩於此三年進為王從平齊齊淑妃馮氏尤為齊後主所幸見獲帝以達不遜聲色特以馮氏賜之宣帝即位進上柱國大象元年拜大右弼其年詔以潞州上黨郡邑萬戶為代國達出就國二年朝京師及其子為隋文帝所害國除

冀康公通字屈率突武成初封冀國公薨于絢嗣建德三年進為

王大定中亦為隋文帝所害國除

滕聞王迥字爾固突少好經史解屬文武成初封滕國公建德三年進爵為王宣政元年進位上柱國大象元年詔以荊州新野郡邑萬戶為滕國迥出就國二年朝京師為隋文帝所害并其子國除迥所著文章頗行於世

孝閔帝一男陸夫人生紀厲王康字乾安保定初封紀國公建德三年進爵為王出為利州總管康驕侈無度遂有異謀司錄裴融諫康殺之五年詔賜康死子湜嗣大定中為隋文帝所害國除明帝三男徐妃生畢刺王賢後宮生鄧王貞宋王實實出後宋獻

公震

畢刺王賢字乾陽保定四年封畢公建德三年進爵為王歷荊州總管大司空大象初進上柱國雍州牧太師明年宣帝崩賢性强

濟有威略慮隋文帝傾覆宗祏言泄并其子被害國除
鄴王貞字乾雅初封鄴國公建德三年進爵為王大象初為大冢
宰大定中并其子為隋文帝所害國除

武帝七男李皇后生宣帝漢王贊庫汗姬生秦王贊曹王允馮姬
生道王充薛世婦生蔡王允鄭姬生荆王元

漢王贊字乾依初封漢國公建德三年進爵為王大象末隋文帝
輔政欲順物情乃進贊位上柱國拜右大丞相外示尊崇實無所
綜理轉太師尋及秦王贊曹王允道王充蔡王允荆王元竝為隋
文帝所害國除

宣帝三子朱皇后生靜皇帝王姬生萊王衍皇甫姬生郢王術衍
及術竝大象二年封竝為隋文帝所害國除

論曰昔賢之議者咸以周建五等歷載八百秦立郡縣二世而亡

靜帝諱世康
同書六卷

千戈

雖得失之迹可尋是非之理互起而因循莫變復古未聞良由著
論者溺於貴遠可契者難於易業詳求適變之道竝未窮於至當
也嘗試論之夫皇王迭興為國之道匪一聖賢間出立德之指殊
塗斯豈故為相反哉亦云為政而已矣何則五等之制行於商周
之前郡縣之設始於秦漢之後論時則澆淳理隔易地則用捨或
殊譬猶柔戚日用難以成垓下之業稷嗣所述不可施成周之朝
是知因時制宜者為政之上務也觀人立教者經國之長策也且
夫裂封疆建侯伯擇賢能署牧守循名雖曰異軫責實抑亦同歸
盛則與之共安衰則與之共患共安繫乎善惡非禮義無以敦風
共患寄以存亡非甲兵不能靖亂是以齊晉帥禮鼎業傾而復振
溫陶釋位主綱弛而更張然則周之列國非一姓也晉之羣臣非
一族也豈齊晉忠於列國溫陶賢於羣臣哉蓋位重者易以立功

權輕者難以盡節故也由斯言之建侯置守乃古今之異術兵權
爵位蓋安危之所階乎周文之初定關右日不暇給既以人臣禮
終未遑蕃屏之事晉蕩輔政爰樹其黨宗室長幼竝握兵權雖海
內謝隆平之風而國家有盤石之固矣武皇克剪芒刺思弘政術
懲專朝之爲患忘維城之遠圖外崇寵任內結猜阻自是配天之
基潛有朽壤之墟矣宣皇嗣位凶暴是崇芟刈先其本枝削黜徧
於公族以齊王之奇姿傑出足可牢籠於前載處周公之地居上
將之重智勇冠俗攻戰如神敵國繫以存亡鼎命由其輕重屬道
消之日挾振王之威斯人而嬰斯戮君子是以知國祚之不永也
其餘雖地惟叔父親則同生假文能輔主武能威敵莫不謝卿士
於當年從侯服於郡國號爲千乘位侔足夫是以權臣乘其機謀
士因其隙遷龜鼎速於俯拾殲王侯烈於燎原悠悠遂古未聞茲
酷豈非摧枯振朽易爲力乎向使宣皇擇姬劉之制覽聖哲之術
分命賢戚布於內外科其輕重間以親疎首尾相持遠近爲用使
其位足以扶危其權不能爲亂事業既定僥倖自息雖使臥赤子
朝委裘社稷固以久安億兆可以無患矣何后族之地而能窺其
神器哉昔張耳陳餘賓客廝役所居皆取卿相而齊王之文武寮
吏其後亦多台牧異代相符可謂賢矣哉

北史卷五十八

列傳第四十六終

魏州刺史
氏裔

北史卷五十九

魏州刺史
氏裔

列傳第四十七

寇洛

從祖兄善

趙貴

李賢

子詢 崇 孫敏 弟遠 穆

梁禦

子睿

寇洛上谷昌平人也累世為將吏父延壽魏和平中以良家子鎮武川因家焉洛性明辯不拘小節賀拔岳西征洛與岳鄉里乃募從入關以功封安鄉縣子及岳為大行臺以洛為右都督侯莫陳悅既害岳欲并其眾時初喪元帥洛於諸將中最為舊齒素為眾信乃收集將士志在復讎既至原州眾推洛為盟主統岳之眾至平涼周文帝至以洛為右都督從討侯莫陳悅平之拜涇州刺史

及古閣 張

大統初詔加開府進爵京兆郡公封洛母宋為襄城郡君四年鎮東雍州五年卒於鎮贈太尉尚書令謚曰武子和嗣明帝二年錄舊勲以洛配享文帝廟庭賜和姓若引氏改封松陽郡公趙貴字元寶天水南安人也祖仁以良家子鎮武川因家焉貴少有節概介朱榮以為別將從討元顥有功賜爵燕樂縣子從賀拔岳平關中累遷大都督岳為侯莫陳悅所害將吏奔敗莫有守者貴謂其黨曰吾聞仁義豈有常哉行之則為君子違之則為小人朱伯厚王修感意氣微恩尚能蹈履名節况吾等荷賀拔公國士之遇寧可自同眾人乎因涕泣歔歔從之者五十人乃詣悅詐降悅信之因請收葬岳言辭慷慨悅壯而許之貴乃收岳屍還營與寇洛等奔平涼共圖拒悅貴乃首議迎周文帝周文至以貴為大都督領府司馬悅平行秦州事後以預立魏文帝勲進爵為公梁

企定稱亂河右以貴為隴西行臺討破之從復弘農沙苑進爵中山郡公河橋之戰貴與怡峯為左軍戰不利先還及高仲密以北豫州降周文迎之與東魏人戰於芒山貴為左軍失律坐免官尋復官爵後拜柱國大將軍賜姓乙弗氏六官建為太保大宗伯改封南陽郡公周孝閔帝踐阼遷大冢宰進封楚國公邑萬戶初貴與獨孤信等皆與文帝等夷及晉公護攝政貴自以元勲每懷快快與信謀殺護為開府宇文盛告被誅

善字僧慶貴之從祖兄也少好學美容儀沉毅有遠量介朱天光討邢杲方俛醜奴以為長史普泰初為大行臺尚書封山北縣伯天光拒齊神武於韓陵敗見殺善請收葬其屍齊神武義而許之賀拔岳總關中迎善復以為長史岳為侯莫陳悅所殺善共諸將翊戴周文帝魏孝武西遷改封襄城縣伯歷位尚書左右僕射進

爵爲公善性溫恭有器局雖位居端右而愈自謙退其職務克舉則曰其官之力有罪責則曰善之咎也時人稱其有公輔量大統九年從戰芒山屬大軍不利善爲敵所獲卒於東魏建德初周齊通好齊人乃歸其柩其子詢表請贈謚詔贈大將軍大都督四州諸軍事岐州刺史謚曰敬

李賢字賢和自云隴西成紀人漢騎都尉陵之後也陵沒匈奴子孫因居北狄後隨魏南遷復歸汧隴曾祖富魏太武時以子都督討兩山屠各歿於陣贈寧西將軍隴西郡守大統末以賢兄弟著勲追贈司空公賢幼有志節不妄舉動嘗出遊逢一老人鬚眉皓白謂曰我年八十觀士多矣未有如卿卿必爲台牧努力勉之九歲從師受業略觀大指而已或譏其不精答曰賢豈能領徒受業至如忠孝之道實銘於心問者慙服十四遭父憂撫訓諸弟友愛

天 天

甚篤魏永安中万俟醜奴據岐涇等州反孝莊遣介朱光擊破之光令都督長孫邪利行原州事以賢爲主簿累遷高平令賀拔岳爲侯莫陳悅所害周文帝西征賢與其弟遠穆等密應侯莫陳崇以功授都督仍守原州及大軍至秦州悅棄城走周文命兄子導追之以賢爲先鋒至牽屯山及之以功授假節撫軍將軍大都督魏孝武西遷周文令賢率騎迎衛封上邽縣公俄授左大都督還鎮原州大統三年州人豆盧很害都督大野樹兒等據州城反賢率敢死士一戰敗之很斬關遁走賢追斬之八年授原州刺史周文之奉魏太子西巡至原州遂幸賢第讓齒而坐行鄉飲酒禮後帝復至原州令賢乘路車備儀服以諸侯會遇禮相見然後幸賢第歡宴終日凡是親族頒賜有差恭帝元年進爵西河郡公後以弟子植被誅賢坐除名保定二年詔復賢官爵仍授瓜州刺史武

帝及齊王憲之在襁褓不利居宮中周文令於賢家處之六載乃還宮因賜賢妻吳姓宇文氏養為姪女賜與甚厚及武帝西巡原州幸賢第詔曰朕昔冲幼爰寓此州使持節驃騎大將軍開府儀同三司大都督瓜州諸軍事瓜州刺史賢斯土良家勲德兼著受委居朕輔導積年念其規弼功勞甚茂今巡撫居此不殊代邑舉目依然益增舊想賢雖無屬籍朕處之若至親凡厥昆季乃至子姪等可竝預宴賜於是令中侍上士尉遲愷往瓜州降璽書勞賢賜衣一襲及被褥并御所服十三環金帶一要中廐馬一疋金裝鞍鞞雜綵五百段銀錢一萬賜賢弟申國公穆亦如之子侄男女中外諸孫三十四人各賜衣一襲拜賢孫庫狄樂為儀同賢門生昔經侍奉者二人授大都督四人授帥都督六人別將奴已免賤者五人授軍王未免賤者十二人酬替放之四年王師東討西道

空虛慮羌渾侵擾乃授賢河州總管河州舊非總管至是創置賢乃大營屯田以省運漕多設斥侯以備寇戎於是羌渾斂迹五年宕昌寇邊乃於洮州置總管府以鎮遏之遂廢河州總管改授賢洮州總管屬羌寇侵擾賢頻破之虜遂震懾不敢犯塞俄廢洮州總管還於河州置總管府復以賢為之武帝思賢舊恩徵拜大將軍於京師薨帝親臨哀動左右贈使持節柱國大將軍大都督十州諸軍事原州刺史謚曰桓子端嗣端位開府儀同三司從平齊戰沒贈上大將軍追封襄陽公謚曰果端弟吉儀同三司吉弟孝軌開府儀同大將軍升遷縣伯後封奇章公孝軌弟詢詢字孝詢深沈有大略頗涉羣書仕周累遷司衛上士武帝幸雲陽宮委以留府事衛王直作亂焚肅章門詢於內益火故賊不得入董平善之累遷英果中大夫屢以軍功加位大將軍賜爵平高

隋臣

帝聞而

郡公隋文帝為丞相尉遲迥作亂遣韋孝擊之以詢為元帥長史委以心膂軍至永橋諸將不一詢密啟請重臣監護文帝令高熲監軍與熲同心惟詢而已及迥平進位上柱國改封隴西郡公開皇初歷位隰州總管以疾徵還京師卒帝悼惜者久之謚曰襄子元方嗣

詢弟崇字永隆英果有籌策膽力過人周元年以父賢勲封迴樂縣侯時年尚小拜爵日親族相賀崇獨泣下賢問之對曰無勲於國幼少封侯當報主恩不得終於孝養是以悲耳賢由此大奇之起家州主簿非其好也辭不就職求為將兵都督隨宇文護伐齊以功最授儀同三司歷位少侍伯大夫少承御大夫攝太子宮正周武平齊引參謀議以勲加授開府封襄陽縣公尋改封廣宗縣公隋文帝為丞相加授上開府儀同大將軍懷州刺史進爵郡公

尉遲迥反遣使招之崇初欲相應後知叔父穆以并州附文帝慨然太息曰合家富貴數十人遇國有難竟不能扶傾繼絕何面目處天地間乎韋孝寬亦疑之與俱臥起其兄詢時為元帥長史每諷諭之崇由是亦歸心焉及迥平授徐州總管進位上柱國開皇三年除幽州總管突厥犯塞崇輒破之奚霫契丹等警其威略爭來內附後突厥大為侵掠崇率步騎三千拒之轉戰十餘日師人多死遂保於沙城突厥圍之死亡略盡突厥降之謂曰降者封為特勅崇知不免令其士卒曰吾喪師徒罪當萬死今效命以謝國家看吾死且可降賊方便散走還見至尊道此意也乃挺刃突賊復殺二人沒於陣贈六州諸軍事豫州刺史謚曰壯子敏嗣敏字樹生文帝以其父死王事養於宮中及長襲爵廣宗公起家左千牛美姿容善騎射工歌舞弦管開皇初周宣帝后樂平公主

有女娥英妙擇婚對敕貴公子弟集弘聖宮者日以百數公主選取敏禮儀如尚帝女後將侍宴公主謂敏曰我以天下與至尊唯一女夫當爲汝求在國若授餘官慎無謝及進見上上親御琵琶遣敏歌舞大悅謂公主曰敏何官對曰一白丁耳謂敏曰今授儀同敏不答上曰不滿爾意也今授開府又不謝上曰公主有大功於我我何得向其女婿惜官今授卿在國敏迺拜而蹈舞遂於坐發詔授柱國以本官宿衛後避煬帝諱改封經城縣公歷幽金華岐數州刺史多不莅職常留京師往來宮內侍從遊宴賞賜超於功臣大業初轉衛尉卿樂平公主將薨遺言於煬帝曰妾唯一女不自憂死深憐之湯沐乞迴與敏帝從之竟食五千戶攝屯衛將楊玄感反後城闕大興敏之策也轉將作監從征高麗領新城道軍加光祿大夫十年帝復征遼東遣敏黎陽督運時或言敏一名

洪兒帝疑洪字當讖嘗面告之與其引決敏由是大懼數與金才善衡等屏人私語宇文述知而奏之竟與渾同誅其妻宇文氏尋亦賜鴆而終賢弟遠

遠字萬歲幼有器局嘗與羣兒爲戰鬥戲指麾便有軍陣之法郡守見而異之召使更戲羣兒散走遠持杖叱之復爲向陣意氣雄壯殆甚於前郡守曰此小兒必爲將帥非常人也及長涉獵書傳魏正光末天下鼎沸敕勒賊胡琮侵逼原州遠昆季率勵鄉人欲圖拒守而衆情頗有異同遠乃按劍喻以節義因曰有異同遠議者請斬之衆懼乃聽命相與盟歃深壁自守無援城陷其徒多被害唯遠兄弟竝爲人所匿得免遠乃使賢晦迹和光潛身間行入朝求援魏朝嘉之授武騎常侍俄轉別將及介朱天光西伐配遠精兵爲鄉導天光欽遠才望除爲長城郡守後以應侯莫陳崇功

遷高平郡守周文見而悅之令居麾下及魏孝武西遷封安定縣伯魏文帝嗣位之始思享遐年以遠字可嘉令扶帝升殿進爵爲公仍領左右從征竇叅復弘農並有殊勲授都督原州刺史周文謂遠曰孤有卿若身之有臂本州之榮乃私事爾遂令遠兄賢代行州事沙苑之役遠功居最進爵陽平郡公尋除大丞相府司馬參軍國機務時河東初復人情未安周文以河東爲國之要乃領授河東郡守遠敦獎風俗勸課農桑肅遏姦非兼修守禦之備曾未朞月百姓懷之周文降書勞問徵爲侍中遷太子少師東魏北豫州刺史高仲密請舉州來附周文以仲密所據遼遠難爲應接諸將皆憚此行遠曰北豫遠在賊境高歡又屯兵河陽常理而論寔難救援但不入獸穴不得獸子若以奇兵出其不意事或可濟脫有利鈍故是兵家之常如其顧望不行便無克定之日周文喜

廣

曰李萬歲所言差強人意乃授行臺尚書前驅東出周文率大軍繼進遠乃潛師而往拔仲密以歸仍從周文戰於芒山時大軍不利遠獨整所部爲殿尋授都督義州弘農等二十一郡諸軍事遠善撫馭有幹略戰守之備無不精銳每厚撫境外之人使爲間謀敵中動靜必先知之至有事泄被誅亦不以爲悔嘗獵於莎柵見石於叢薄中以爲伏兔射之鏃入寸餘視之乃石周文聞而異之賜書曰昔李將軍親有此事公今復爾可謂世載其德矣東魏將段孝先趣宜陽以送糧爲名實有窺窬之意遠密知其計遣兵襲破之孝先遁走周文賜所乘馬及金帶牀帳衣被等并綵二千匹拜大將軍頃之除尚書左僕射固辭周文不許遠不得已方拜職周文又以第十一子代王達令遠子之其見親待如此時周文嫡嗣未建明帝居長已有成德孝閔處嫡年尚幼冲乃謂羣公曰孤

欲立子以嫡恐大司馬有疑大司馬即獨孤信明帝敬后父也衆未有答遠曰立子以嫡不以長略陽公爲嗣公何疑焉若以信爲嫌請即斬信便起拔劍周文亦起曰何事至此信又自陳說遠乃止於是羣公竝從遠議遠出外拜謝信曰臨大事不得不爾信亦謝遠曰今日賴公決此大議六官建授小司寇周孝閔帝踐阼進位柱國大將軍復鎮弘農遠于植文帝時已爲相府司錄參掌朝政及晉公護執權密欲誅護頗泄護乃出植爲梁州刺史尋而廢帝召遠及植還朝遠恐有變沉吟良久乃曰大丈夫寧爲忠鬼安能作叛臣乎遂就徵至京師護以遠功名素重猶欲全宥之謂曰公兒遂有異謀可早爲之所乃以植付遠遠素愛植植又有口辯云初無此謀遠信之詰朝將植謁護護謂植已死乃曰陽平公何意自來左右云植亦在門外護大怒曰陽平公不信我矣召入命

遠同坐令帝與植相質於遠前植辭窮謂帝曰本爲此謀欲安社稷利至尊耳今日至此何事云云遠聞之自投於牀曰若爾誠合萬死於是護乃害植并逼遠自殺建德元年晉公護誅贈本官加太保謚曰忠隋開皇初追贈上柱國改謚曰懷植及諸弟竝加贈謚植弟基字仲和幼有聲譽美容儀善談論涉獵羣書尤工騎射周文令尚義歸公主以父勲封建安縣公累遷大都督進爵清河郡公及魏廢帝卽位之後猜隙彌深時周文諸子年皆幼冲章武公導中山公護復東西作鎮唯託意諸壻以爲心膂基與義城公李暉常山公于翼等俱爲武衛將軍分掌禁旅魏帝深憚之故密謀遂泄魏恭帝卽位進爵燉煌郡公尋進位驃騎大將軍開府儀同三司拜陽平國世子六官建授御正中大夫周孝閔帝踐阼出爲浙州刺史尋爲兄植合坐死以主壻又爲季父穆所請得免武

成二年除江州刺史既被譴謫常憂憤不得志保定元年卒於位穆尤所鍾愛每哭輒悲慟謂所親曰吾兒捨我去門戶豈是欲與宣政元年追贈使持節上開府儀同大將軍曹徐譙三州刺史燉煌郡公謚曰孝子威嗣威字安人又改襲遠爵陽平郡公加上開府大象末進至柱國封公賢弟穆

穆字顯慶少明敏有度量文帝入關便給事左右深被親遇穆亦小心謹肅未嘗懈怠及侯莫陳悅害賀拔岳周文自夏州赴難而悅黨史歸據原州猶爲悅守周文令侯莫陳崇襲之穆時先在城中與兄賢遠應崇遂禽歸以功授都督從迎魏孝武封永平縣子又領鄉兵禽竇泰復弘農並有戰功沙苑之捷穆言歡今日已喪膽矣請速逐之則歡可禽也周文不聽論前後功進爵爲公芒山之戰周文馬中流矢驚逸墜地敵人追及左右皆散穆下馬以策

擊周文背因大罵曰籠陳軍士爾曹主何在爾獨住此敵人見其輕侮不疑是貴人遂捨而過穆以馬授周文遂俱逸是日微穆周文已不濟矣既而與穆相對而泣自是恩盼更隆顧左右曰成我事者其此人乎擢授武衛將軍儀同三司進封安武郡公前後賞賜不可勝計周文歎其忠節曰人所貴唯命穆遂輕命濟孤爵位玉帛未足爲報乃特賜鐵券恕以十死進驃騎大將軍開府儀同三司侍中初芒山之敗穆授周文驄馬後中廐有此色者悉以賜之又賜穆嗣子惇安樂郡公姊一人爲郡君自餘姊妹並爲縣君兄弟子侄及總麻已上親并舅氏皆霑厚賜其褒崇如此從解玉壁圍拜安定國中尉歷同州刺史太僕卿從于謹平江陵以功別封一子長城縣侯尋進位大將軍賜姓拓拔氏又擊曲沔蠻破之俄除原州刺史拜世子惇爲儀同三司以賢子爲平高郡守遠子

爲平高縣令竝加鼓吹穆自以叔侄一家三人皆牧宰鄉里恩遇過隆固辭不拜周文不許後入爲雍州刺史兼小冢宰周孝閔帝踐阼又封一子爲升遷縣伯穆請迴授賢子孝軌許之及兄子植謀害宇文護被誅穆亦坐除名先是穆知植非保家主每勸遠除之遠不能用及遠臨刑泣謂穆曰顯慶吾不用汝言以至此將奈何穆以此獲免及其子弟亦免官時植弟基當從坐戮穆求以子惇怡等代死辭理酸切聞者莫不動容護矜之遂特免基死明帝卽位拜驃騎大將軍開府儀同三司大都督復爵安武郡公拜直州刺史武成中子弟免官爵者悉復之累遷大司空天和二年進封申國公舊爵迴授一子建德元年遷太保尋出爲原州總管四年武帝東征令穆別攻軹關及河北諸縣竝破之後以帝疾班師棄而不守六年進位上柱國除并州總管時東夏初平人情尚擾

穆靖以鎮守百姓懷之大象元年加邑至九千戶遷大左輔總管如舊二年詔加大傅仍總管及隋文作相尉遲迴舉兵遣使招穆穆鎖其使上其書穆子士榮以穆所居天下精兵處陰勸穆應之穆弗聽曰周德旣衰愚智共悉天時若此豈能違天乃遣使謁隋文帝并上十三環金帶蓋天子服也以微申其意時迴子誼爲朔州刺史亦執送京師迴令其署行臺韓長業攻陷潞州執刺史趙威署城人郭子勝爲刺史穆遣兵討獲子勝文帝嘉之以穆勞同破鄴城第一勲加三轉聽分授其二子榮才及賢子孝軌榮及才竝儀同大將軍孝軌進開府儀同大將軍又別封子雄爲容國公穆又密表勸進文帝旣受禪詔曰公旣舊德且又父黨敬惠來旨便以今月十三日恭膺天命俄而穆來朝文帝降座禮之拜太師贊拜不名真食成安縣三千戶穆子孫雖在襁褓悉拜儀同其一

門執象笏者百餘人，貴盛當時無比。穆上表乞骸骨，詔曰：「公年既耆舊，筋力難煩。今勒所司，敬蠲朝集。如有大事，須共謀謨。別遣侍臣就第，詢訪時。太史奏當有移都事，帝以初受命甚難之。穆乃上表，極言宜移都之便。帝素嫌臺城制度迫小，又宮內多鬼祆。蘇威嘗勸遷，上不納。遇太史奏狀，意乃惑之。至是省穆表，帝曰：「天道聰明，已有徵應。太師人望，復抗此請，則可矣。」遂從之。歲餘，下詔穆自今已後，雖有愆罪，但非謀逆，縱有百死，終不推問。開皇六年薨，時年七十七。遺命以不得陪駕，岱宗為恨。詔遣黃門侍郎監護喪事，贈十州諸軍事、冀州刺史。謚曰明，賜以石椁。前後部羽葆鼓吹，輜輶車百寮送之。郭外詔太常卿牛弘齋哀冊祭文，以太宋長子惇字士獻、周文帝令功臣長子竝與略陽遊處，惇於輩流中特被引接。每有遐方服翫珍奇，無不班賜。封安樂郡公，位驃騎大將軍，開

府儀同三司、鳳州刺史。先穆卒，子筠襲祖爵。惇弟怡，位儀同三司，贈渭州刺史。怡弟稚，少有識量，仕周，以軍功封西安縣男，位荊州總管。開皇初，進爵為公。稚弟恒，位鹽州刺史，封曲陽侯。恒弟榮，位合州刺史，長城縣公。榮弟直，位車騎將軍，歸政縣侯。直弟雄，位柱國驃騎將軍，密國公。雄弟渾，仁壽初，筠忽憊，遣兄子善衡賊之，求盜不得。文帝大怒，盡追其親族，初筠與從父弟瞿曇有隙，渾遂證瞿曇殺之。而善衡獲免，筠死。帝議立嗣，邳公蘇威奏筠不軌，請絕其封。帝不許，乃以渾嗣。

渾字金才，姿貌瓌偉，美鬚髯，起家左侍上士。尉遲迥反於鄴，時穆在并州，隋文帝甚慮迥，遣渾乘驛詣穆，穆遽令渾入京，奉熨斗。曰：「願執柄以慰天下也。」文帝大悅。又遣渾詣韋孝寬，所而述穆意，會鄴平，以功授上儀同三司，封武安郡公。開皇中，晉王廣出蕃，渾以

叔父渾怒其

驃騎將軍領親信從往揚州及筠死渾規欲紹之謂妻兄太子左衛率宇文述曰若得襲封當以國賦之半每歲相奉述因入白皇太子奏文帝竟詔渾襲申公以奉穆嗣大業六年追改穆封爲公渾仍襲焉累加光祿大夫遷右驍騎衛大將軍渾旣紹父業日增豪侈二歲後不以奉物分述述大恚因醉謂其友人于象賢曰我竟爲金才所賣死且不忘渾聞之由是結隙及帝討遼東有方士安伽陀謂帝曰李氏應爲天子宜盡誅天下李姓述知之因構渾於帝曰臣與金才夙親聞其數與李敏善衡等日夜屏語或終夕不寢渾大臣也家世隆盛身捉禁兵不宜然帝曰卿可覓其事述乃遣武賁郎將裴仁基表告渾反卽日遣述掩其家遣左丞元文都御史大夫裴蘊雜推之數日不得反狀帝更遣述推述入獄中召出敏妻宇文氏謂曰夫人帝甥也何患無賢夫李敏金才名當祇識夫人當自求全因教言金才嘗告敏云汝應圖籙當爲天子今主上好兵勞擾百姓此亦天亡隋時也若復度遼吾與汝必爲大將軍每軍二萬餘兵固以五萬人矣又發諸房子侄內外親婭竝募從征吾家子弟決爲主師分領兵馬散在諸軍吾與汝前發襲取御營子弟響赴一日之間天下定矣述口自傳授令敏妻寫表封云上密述持入奏云已得金才反狀并有敏妻密表帝覽之泣曰吾宗社幾傾賴親家公而獲全耳於是誅渾敏等自餘無少長皆徙嶺表

梁禦字善通其先安定人也後因官北邊遂家於武川改姓紇豆陵氏高祖俟力提從魏太武征討位揚風將軍定陽侯禦少好學進趣詳雅及長更好弓馬尒朱天光西討知禦有志略引爲左右共平關隴除益州刺史第一領人酋長封白水縣侯從賀拔岳鎮

長安及岳被害，禦與諸將同謀，翊戴周文帝。周文既平秦隴，欲引兵東下，雍州刺史賈顯持兩端通使於齊。神武周文知其意，以禦為大都督，雍州刺史領前軍先行，及與顯相見，因說顯，顯即出迎。周禦遂入鎮雍州。大統元年，進爵信都縣公，授尚書右僕射。從周文復弘農，破沙苑，加侍中，開府儀同三司。進爵廣平郡公。出為東雍州刺史，為政舉大綱而已。人庶稱之。薨於州。臨終，唯以國步未康為恨，言不及家。贈太尉、尚書令。雍州刺史謚曰武昭子睿。睿字持德，少沈敏，有行檢。周文帝時，以功臣子養宮中，復命與諸子遊處。七歲襲爵廣平郡公。累加儀同三司。本州大中正。開府，改封五龍郡公。渭州刺史周閔帝受禪，徵為御伯，出為中州刺史。鎮新安，以備齊。齊人來寇，睿輒挫之。帝甚嘉歎，拜大將軍，以禦佐命功，進爵蔣國公。入為司會。後從齊王憲拒齊將斛律明月於洛陽。

每戰有功，遷小冢宰，歷敷州刺史、涼安二州總管，俱有惠政。進位柱國。隋文帝總百揆，代王謙為益州總管，行至漢川西，謙反攻。始州睿不得進，文帝命睿為行軍元帥，率軍總管于義、張威、達奚長儒、梁昇石、孝義步騎二十萬討之。謙遣開府李三王守通谷，睿使張威擊破之。進至龍門，謙將趙儼、秦會擁眾十萬據嶮為營。周亘三十里，睿令將士銜枚出自間道，四面奮擊，力戰破之。遂鼓行而進，謙將敬豪守劔閣，梁巖拒平林，竝懼而來降。謙又命高阿那瓌、達奚悉等以盛兵攻利州，聞睿將至，悉分兵據開遠。睿遣上開府託拔宗趣劔閣，大將軍宇文曼指巴西，大將軍趙達水軍入嘉陵，遣張威、王倫賀若震于義，韓相貴、阿那惠等分道攻悉。自午及申，破之。悉奔歸于謙。睿逼成都，謙令達奚悉、乙弗虔守城，親帥精兵五萬背城結陳，睿擊敗之。謙將入城，悉虔以城降。謙將麾下三十

騎遁走新都令王寶執之。睿斬謙于市，劔南悉平。進位上柱國，總管如故，賜物五千段，奴婢一千口，金二千兩，銀三千兩，邑千戶。睿時威振西州，夷獠歸附。唯南寧首帥爨震恃遠不賓，睿上疏曰：南寧州漢牂柯之地，近代已來分置興古、雲南、建寧、朱提四郡，戶口殷衆，金寶富饒，二河有駿馬明珠，益寧出鹽井犀角。晉太始七年，以益州曠遠，分置寧州。至僞梁，南寧州刺史徐文盛被湘東徵赴荆州，屬東夏尚阻，未遑遠略，土人爨瓚遂竊據一方，國家遙授刺史，其子震相承至今，而震臣禮多虧，貢賦不入，如聞彼人苦其苛政，思被皇風，幸因平蜀士衆，不煩重興師狎獠。旣訖，卽請略定南寧。文帝深納之，然以天下初定，恐人心不安，故未之許。後竟遣史萬歲討平之，竝因睿之策也。睿威惠兼著，人夷悅服，聲望逾重，文帝陰憚之。薛道衡從軍在蜀，說睿勸進，文帝大悅，及受禪，顧待彌

隆。睿復上平陳策，帝善之，下詔曰：昔公孫隗蹶漢之賊也，光武與其通和，稱爲皇帝，尉佗之於高祖，初猶不臣。孫皓之答晉文書，尚云：白或尋欵服，或卽滅亡。王者體大義存遵養，雖陳國來朝，未盡蕃節，如公大略，誠須責罪，尚欲且緩其誅，宜如此意。淮海未滅，必興師旅，若命永襲，終當相屈，以身許國，無足致辭也。睿乃止。睿時見突厥方強，恐爲邊患，復陳鎮守之策十餘事，帝嘉歎久之，答以厚意。睿時自以周代舊臣，久居重鎮，內不自安，屢請入朝，於是徵還京師，及引見，上爲之興命，睿升殿握手極歡。睿退，謂所親曰：功遂身退，今其時也。遂謝病，闔門自守，不交當時。帝賜以板輿，每有朝覲，必令三衛輿上殿。睿初平王謙之始，自以威名太盛，恐爲時所忌，遂大受金賄，以自穢，由是勲簿多不以實詣朝堂，稱屈者前後百數人。上令有司案驗其事，主者多獲罪。睿懼，上表陳謝，請歸

大理上慰喻遣之十五年從至洛陽而卒謚曰襄子洋嗣歷位嵩
徐二州刺史武賁郎將大業六年詔追改睿封爲戴公命以洋襲
焉

論曰賀拔岳變起倉卒侯莫陳悅意在兼并于時人有離心士無
固志寇洛撫循散亂抗禦仇讎全師而還敵人絕覬覦之望度德
而處霸王建匡合之謀趙貴居二闕之險周室定二分之功彼此
一時其功固不細也李賢和兄弟屬亂離之際居戎馬之間志略
從橫忠勇奮發頻摧勅敵屢涉艱危及逢時遇主策名委質荷生
成之恩蒙國士之遇俱縻好爵各著勲庸遂得任兼文武聲彰出
內位高望重光國榮家跼萼連暉聊椒繁衍冠冕之盛當時莫與
比焉自周迄隋鬱爲西京盛族雖金張在漢不之尚也然而周文
始崩嗣君冲幼內則功臣放命外則強寇臨邊晉公以猶子之親

膺負圖之託遂能撫寧家國開剪異端革魏興周遠安邇悅功勤
已著過惡未彰李植受遇先朝宿參機務慮威權之去已懼將來
之不容生此厲階成茲貝錦乃以小謀大由疎間親主無昭帝之
明臣有上官之訴嫌隙旣兆釁故因之啟冢宰無君之心成閔帝
廢弒之禍植之由也李遠闕義方之訓又無先見之明以至誅夷
非爲不幸梁禦豫奉興王參謀締構驅馳畢力夷險備嘗雖遠志
未申亦云遇其時矣穆及梁睿皆周室功臣隋文王業初基俱受
腹心之寄故穆首登師傅睿終膺殊寵觀其見機而動抑亦人之
先覺然方魏朝之貞烈有愧王凌比晉室之忠臣終慙徐廣穆之
子孫特爲隆盛朱輪華轂凡數十人見忌當時禍難適及得之非
道可不戒歟

岳周文帝自平涼討悅，弼諫悅令解兵謝之。悅惶惑計無所出，弼知悅必敗。周文帝至，悅乃棄秦州南出，據險以自固。是日弼密通於周文，許背悅。至夜，弼乃勒所部云：「悅欲向秦州，命皆裝束。」弼妻悅之姨也，時為悅所親委，眾咸信之。人皆散走，弼慰輯之，遂擁以歸。周文悅由此敗。周文謂曰：「公與吾同心，天下不足平也。」大統初，進位驃騎大將軍，開府儀同三司。從平竇泰，斬獲居多。周文以所乘騅馬及泰所著牟甲賜弼，又從平弘農，與齊神武戰於沙苑。弼軍為敵所乘，弼將其麾下九十騎橫截之，賊分為二，因大破之。以功進爵趙郡公。四年，從周文東討洛陽，弼為前驅。東魏將莫多婁貸文率眾至穀城，弼倍道而前進，軍士鼓噪，曳柴揚塵。貸文以為大軍至，遂走。弼追斬貸文，傳首大軍。翌日，又從周文與齊神武戰河橋，身被七創，遂為所獲，陽隕絕於地，脫其傍有馬，因躍上得免。

歷位司空、太保、柱國大將軍。廢帝元年，賜姓徒何氏。六官建，拜太傅、大司徒及晉公，護執政朝之大事，皆與于謹及弼等參議。周孝閔帝踐阼，除太師，進封趙國公，邑萬戶。前後賞賜鉅萬。弼每征討，朝受命，夕便引路，略不問私事，亦未嘗宿於家。兼性沈雅，有深識，故能以功名終。薨於位，明帝即舉哀，比塋，三臨其喪，發卒穿冢，給大路龍旂。陳軍至墓，謚曰武。尋追封魏國公，配食文帝廟庭。子曜居長，以次子暉尚文帝女義安長公主，故遂以為嗣。暉初賜爵義城郡公，嘗臥疾，朞牛文帝憂之，賜錢一千萬，供其藥石之費。魏恭帝二年，加驃騎大將軍，開府儀同三司。出為岐州刺史。從文帝西巡，率公卿子弟別一軍。後襲趙國公，改襲魏國公。天和六年，進位柱國。建德元年，出為梁州總管。時渠達二州生獠積年侵暴，至州綏撫，竝來歸附。暉弟衍，字拔豆，少專武藝，慨慷有志。

略仕周爲義州刺史封真鄉公王謙作亂以行軍總管從梁睿擊平之進上大將軍開皇元年以行軍總管討平叛蠻進位在國後拜安州總管以妖還京卒子仲威嗣衍弟綸最知名有文武才用以功臣子少居顯職位至司會中大夫開府儀同三司封河陽郡公爲聘齊使王子長雅嗣尚隋文帝女襄國公主位內史侍郎河州刺史檢校秦州總管綸弟晏開府儀同三司趙郡公從平齊歿并州子憬以晏死王事卽襲其官爵曜旣不得嗣朝廷以弼功重封曜邢國公位開府子寬幹略過人自周及隋數經將領位在國蒲山郡公號爲名將弼弟擲字雲傑長不盈五尺性果決有膽氣魏永安元年以兼別將從介朱榮破元顥榮誅隨介朱兆入洛及魏孝武西遷擲從都督元斌之與齊神武戰敗遂與斌之奔梁後得逃歸進封晉陽縣子尋爲周文帝帳內都督從復弘農破

沙苑擲時跨馬運矛衝堅陷陣隱身鞞甲之中敵人見之皆避此小兒不知擲之形貌正自如此周文初亦聞擲驍悍未見其能至是方嗟歎之謂曰但問膽決如何何必須八尺之軀也以功進爵爲公武成初從豆盧寧征稽胡進爵汝南郡公出爲總管延綏丹三州諸軍事延州刺史卒官無子以弼子椿嗣位開府儀同大將軍右宮伯改封河東郡公

密字法王蒲山公寬之子也才兼文武志氣雄遠少襲爵蒲山公養客禮賢無所愛吝與楊玄感爲刎頸交後更折節就學尤好兵書誦皆在口師事國子助教包愷受史記漢書愷門徒皆出其下大業初授親衛大都督以疾歸及玄感有逆謀召密令與弟玄挺赴黎陽以爲謀主密進三計曰今天子遠在遼外公長驅入薊直扼其喉前有高麗退無歸路不戰而禽此計上也又關中四塞衛

文昇不足為意今率眾務早入西萬全之勢此計中也若隨近先
 向東都以引歲月此計之下也玄感曰公下計乃上策矣今百官
 家口並在東都若不取之安能勤物且經城不拔何以示威密計
 不行玄感既至東都自謂功在朝夕及獲韋福嗣既非同謀設籌
 皆持兩端玄感後使作檄文固辭不肯密揣知其情請斬之玄感
 不從密退謂所親曰楚公好反而不欲勝吾屬今為虜矣後玄感
 將西入福嗣竟亡歸東都時李雄勸玄感速稱尊號玄感以問密
 密以為不可玄感笑而止及宇文述來護等軍且至玄感謂密計
 將安出密曰元弘嗣統強兵於隴右今可揚言其反遣使迎公因
 此入關可得給眾玄感遂用密謀號令西至陝縣圍弘農不拔西
 至闕鄉追兵至玄感敗密間行人關與玄感從叔詢相隨匿馮翊
 詢妻家尋為隣人告被捕與其黨俱送帝所在途與其眾謀逃其

徒多金密令出示使者曰吾等死日此金留付公幸用相瘞其餘
 即皆報德使者利金遂相詐及出關密每夜宴飲行次邯鄲夜宿
 村中密等七人皆穿墻而遁與王仲伯亡抵平原賊帥郝孝德孝
 德不甚禮之備遭饑饉削樹皮而食之仲伯潛歸天水密詣淮陽
 舍於村中變姓名稱劉智遠聚徒教授經數月鬱鬱不得志為五
 言詩詩成泣下數行時人有恠之以告太守趙他下縣捕之密亡
 抵其妹夫雍丘令丘君明君明從子懷義後告之密得遁去君明
 竟坐死密投東郡賊帥翟讓乃因王伯當以策干讓遣說諸小賊
 所至輒降讓始敬焉召與計事密以兵眾無糧勸讓直趣滎陽休
 兵館穀然後爭利讓從之乃掠下滎陽太守郇王慶及通守張須
 陁以兵討讓讓數為須陁敗將還避之密勸讓列陣以待密以奇
 兵掩擊大破之斬須陁於陣讓於是令密建牙別統所部復說讓

以廓清天下爲事，令掩據興洛倉，發粟以振窮乏。於是與讓以義寧元年春出陽城北踰方山，自羅口襲興洛倉，破之，開倉振百姓。越王侗遣武賁郎將劉長恭討密，密城洛口，周回四十里，以居之。讓上密號爲魏公，設壇場卽位。稱元年，以房彥藻爲左長史，邴元真爲右長史，楊德方爲左司馬，鄭德韜爲右司馬，拜讓爲司徒，封東郡公。長白山賊孟讓掠東郡，燒豐都市而歸，密攻下鞏縣，獲縣長柴孝和，拜爲護軍。武賁郎將裴仁基以武牢歸密，密因遣仁基與孟讓襲破回洛倉，據之。俄而德韜、德方俱死，復以鄭頊爲左司馬，鄭虔象爲右司馬。柴孝和說密令裴仁基守回洛，翟讓據洛口，身率精銳西襲長安，不然他人我先。密曰：「此誠上策，然我之所部竝山東人，旣見未下洛陽，恐不肯西入。」孝和請行間觀隙，乃與數十騎至陝縣，賊歸之者萬餘人。密時兵鋒甚銳，毋入苑，與官軍連

戰，會密爲流矢所中，臥於營內。東都出兵擊之，密衆大潰，棄回洛倉歸洛口。孝和之衆聞密敗，各分散而去。孝和輕騎歸密，煬帝遣王世充率江淮勁卒五萬討密，敗之。孝和溺洛水死，密甚傷之。世充營於洛西，與密相拒百餘日。武揚郡丞元寶藏黎陽賊帥李文相、洹水賊帥張昇、清河賊帥趙君德、平原賊帥郝孝德竝歸密，共襲破黎陽倉，據之。周法明舉江黃之地以附密，齊郡賊帥徐圓朗任城大俠徐師仁、淮陽太守趙他等前後欵附，以千百數。翟讓所部王儒信勸讓爲太宰，總衆務，以奪密權。兄寬復謂讓曰：「天子止可自作，安得與人？汝若不作，我當爲之。」密聞惡之，會讓拒世充軍，退數百步。密與單雄信等赴之，世充敗走，讓欲乘勝破其營，會日暮固止之。明日，讓與數百人至密所，欲爲宴樂，其所將左右各就食，諸門竝設備，讓不覺，密引讓入坐，令讓射，引滿將發，密遣壯士

蔡建自後斬之遂殺其兄寬及儒信等從者亦有死焉讓部將徐世勣爲亂兵所斫中重創密止之僅得免雄信等皆叩頭求哀密竝釋而慰之於是詣讓營遣王伯當郟元真單雄信等告以殺讓意令世勣雄信伯當分統其衆世充夜襲倉城密拒破之斬武賁郎將費青奴世充復營洛北於洛水構浮橋悉衆擊密密拒之不利而退世充因薄其城下密擊之大潰爭橋溺水者數萬人武賁郎將楊威王辨霍世舉劉長恭梁德重董智通等皆沒于陣世充僅而獲免不敢還東都遂走河陽其夜大雪餘衆死亡殆盡密乃修金墉故城居之衆三十餘萬攻上春門留守韋津出戰被執其黨勸密卽尊號密不許及義士圍東都密出軍爭之交綏而退俄而宇文化及弒逆自江都北指黎陽密拒之會越王侗稱尊號遣使授密太尉尚書令東南道大行臺行軍元帥魏國公令先

平化及然後入朝輔政化及至黎陽徐世勣守倉城不下密共化及隔水語密數之曰卿本匈奴卑隸破野頭耳父與兄弟皆受隋恩豈容躬行殺虐今若速來歸義尚可全後嗣化及默然俯仰良久乃瞋目大言曰共你論相殺事何須作書傳雅語密謂從者曰化及庸懦如此忽欲圖帝王吾當折杖驅之知其糧且盡因僞與之積化及大喜恣其兵食與密饋之會密下有人獲罪亡投之具言密情化及大怒又食盡廼與密戰于童山下自辰達酉密中流矢頓於汲縣化及掠汲郡北趣魏縣以輜重留於東郡遣其刑部尚書王軌守之軌以郡降密以軌爲滑州總管密引兵而西遣記室參軍李儉朝于東都執弒帝人于弘達以獻越王侗侗以儉爲司農少卿使召密入朝密至溫縣聞世充已殺元文都盧楚等乃歸金墉城世充旣擅權乃厚賜將士時密兵少衣世充乏食乃請

交易邴元真等各求私利遽勸密密許焉初東都絕糧人歸密者日有數百至此得食降人益少密悔而止密雖據倉無府庫兵數戰不賞又厚撫初附兵於是衆心漸怨時邴元真守洛口倉性貪鄙宇文溫每謂密曰不殺元真公難未已密不答而元真知之謀叛楊慶聞而告密密因疑焉會世充悉衆來戰密留王伯當守金墉自就偃師北阻芒山以待之世充令數百騎度御河密遣裴行儼等逆之會日暮行儼孫長樂程醜金等驍將十數人皆重創密甚惡之世充夜潛濟詰朝而陣密方覺之狼狽出戰敗績馳向洛口世充夜圍偃師守將鄭頊爲其部下翻城而降世充密將入洛口倉城元真已遣人引世充密陰知之不發其事欲待世充兵半度洛水然後擊之密候騎不時覺比將出戰世充軍悉已濟密引騎而遁元真以城降世充密衆漸離將如黎陽人或曰殺翟讓之

際徐世勣幾死其心安可保密乃止時王伯當棄金墉城保河陽密自武牢濟歸之謂曰久苦諸君我今日自刎以謝衆衆皆泣莫能仰視密復曰諸君幸不相棄當共歸關中密身雖愧無功諸君必保富貴其府掾柳燮曰明公與長安宗族有疇昔之遇雖不陪起義然阻東都斷隋歸路使唐國不戰而得京師此公之功也衆咸曰然密遂歸朝封邢國公拜光祿卿尋奉使出關安撫至熊州而逃叛見殺

宇文貴字永貴其先昌黎大棘人也徙居夏州父莫豆干保定中以貴勲追贈柱國大將軍少傅夏州刺史安平郡公貴母初孕貴夢老人抱一子授之曰賜爾是子俾壽且貴及生形類所夢故以永貴字之貴少從師受學嘗輟書歎曰男兒當提劍汗馬以取公侯何能爲博士也魏正光末破六韓拔陵圍夏州刺史源子邕嬰

城固守以貴爲統軍後從朱榮禽葛榮於滏口加別將又從元天穆平邢杲轉都督元顥入洛貴率鄉兵從朱榮有功封革融縣侯除郢州刺史入爲武衛將軍關內大都督從魏孝武西遷進爵化政郡公貴善騎射有將帥才周文帝又以宗室甚親委之大統初與獨孤信入洛陽東魏潁州長史賀若統據潁川來降東魏遣將堯雄趙育是云寶率衆二萬攻潁川貴自洛陽率步騎二千救之軍次陽翟雄等去潁川四十里東魏行臺任祥又率衆四萬將與雄合諸將咸以彼衆我寡不可爭鋒貴曰若賀若一陷吾輩坐此何爲遂入潁川雄等稍進貴率千人背城爲陣與雄合戰貴馬中流矢乃短兵步鬪雄大敗輕走趙育於是降任祥聞雄敗遂不敢進貴乘勝逼祥敗之是云寶亦降師還魏文帝在天游園以金卮置侯上令公卿射中者卽賜之貴一發而中帝笑曰由基之

妙正當爾耳進侍中驃騎大將軍開府儀同三司十六年遷中外府左長史進位大將軍宕昌王梁彌定爲宗人獠甘所逐來奔又有羌酋旁乞鐵忽因梁合定反後據有渠株川擁隸數千家與渭州人鄭五醜同反周文令貴與豆盧寧討之貴等禽斬鐵忽及五醜寧又別擊獠甘破之乃納彌定并於渠株川置岷州朝廷重功遂於粟坂立碑以紀其績廢帝三年詔貴代尉遲迥鎮蜀時隆州人開府李光義反於鹽亭攻圍隆州而隆州人李拓亦聚衆反開府張道應之貴乃命開府叱奴與牧隆州又令開府成亞擊拓及道降之竝送京師除益州刺史未就拜小司徒先是蜀人多劫盜貴乃召任俠傑健者署爲游軍二十四部令其督捕由是頗息周孝閔帝踐阼進位柱國拜御正中大夫武成初與賀蘭祥討吐谷渾軍還進封許國公邑萬戶舊爵回封一子遷大司空行小冢宰

歷大司徒遷太保貴好音樂耽奕棊留連不倦然好施愛士時人頗以此稱之保定末使突厥迎皇后天和二年還至張掖薨贈太傅謚曰穆子善嗣善弘厚有武藝犬象末位上柱國封許國公隋文帝受禪遇之甚厚拜其子頴上儀同及善弟愷誅竝廢于家善未幾卒頴大業中位司農少卿後沒李密善弟忻

忻字仲樂幼而敏慧為童兒時與羣輩戲輒為部伍進止行列無不用命者年十二能左右馳射驍捷若飛恒謂所親曰自古名將唯以韓白衛霍為美談吾察其行事未足多尚使與僕並時不令豎子獨擅高名年十八從周齊王憲討突厥以功拜儀同三司賜爵興固縣公韋孝寬以忻驍勇請與鎮玉壁以戰功加開府進爵化政郡公從武帝攻拔晉州齊後主親總兵六軍憚之欲旋忻諫曰以陛下之聖武乘敵人之荒縱何往而不克若齊人更得令主

勢形

君臣協力未易平也帝從之乃戰遂大克及帝攻陷并州先勝後敗帝為賊所窘挺身而遁諸將多勸帝還忻勃然曰破城士卒輕敵微有不利何足為懷今破竹已成奈何棄之而去帝納其言明日復戰拔晉陽齊平進位大將軍尋與烏丸軌破陳將吳明徹於呂梁進位柱國除豫州總管隋文帝龍潛時與忻情好甚協及為丞相恩顧彌隆尉遲迥作亂以忻為行軍總管隨韋孝寬擊之時兵屯河陽帝令高熲馳驛監軍與熲密謀進取者唯忻而已迥遣子惇盛共武陟忻擊走之進臨相州迥遣精甲三千伏野馬岡忻以五百騎襲之斬獲略盡進至草橋迥又拒守忻以奇兵破之直趣鄴下迥背城結陣大戰官軍不利時鄴城士庶觀戰者數萬人忻謂左右曰事急矣吾當以柝道破之於是射觀者走之轉相騰籍聲如雷霆忻乃傳呼曰賊敗矣眾復振齊力急擊之迥軍大

敗及平鄴以功遷上柱國文帝謂曰尉遲迥傾山東之衆連百萬之師公舉無遺策策無全陣誠天下英傑也進封英國公自是每參帷幄出入臥內禪代之際忻有力焉後拜左領軍大將軍寵顧彌重忻解兵法馭戎齊整當時六軍有一善事雖非忻建在下輒相謂曰此必英公法也其見推服如此後改封杞國公上嘗欲令忻擊突厥高頴曰忻有異志不可委以大兵乃止忻既佐命功臣頻經將領甚有威名上由是微忌之以譴去官與梁士彥昵狎數相往來士彥時亦怨望陰圖不軌忻謂士彥曰帝王豈有常乎相扶卽是公於蒲州起事我必從征兩陣相當然後連結天下可圖也謀泄伏誅家口籍沒忻弟愷愷字安樂在周以功臣子年三歲賜爵雙泉伯七歲進封安平公愷多有器局諸兄竝以弓馬自達愷獨好學博覽書記解文多伎藝爲名公子累遷御正中大夫儀

同三司隋文帝爲丞相加上開府近師中大夫及踐阼誅宇文氏愷亦將見殺以與周本別又兄忻有功故見赦後拜營宗廟副監太子左庶子廟成別封甌山縣公及遷都上以愷有巧思詔領營新都副監高頴雖總大綱凡所規畫皆出於愷及決渭水達河以通運漕詔愷總督其事後拜萊州刺史甚有能名坐兄忻誅除名於家久不得調會朝廷以魯班故道久絕不行令愷修之旣而上建仁壽宮有僕射楊素言愷有巧思於是檢校將作大匠歲餘拜仁壽宮監授儀同三司尋爲將作少監文獻皇后崩愷與楊素營山陵上善之復爵安平郡公煬帝卽位遷都洛陽以愷爲營東都副監尋遷將作大匠愷揣帝心在宏侈於是東都制度窮極壯麗帝大悅進位開府拜工部尚書及長城之役詔愷規度之時帝北巡欲誇戎狄令愷爲大帳其下坐數千人帝大悅賜物千段又造

觀風行殿上容衛者數百人離合爲之下施輪軸推移倏忽若有神功戎狄見之莫不驚駭帝彌悅前後賞賜不可勝紀是時將復古制明堂議者皆不能決愷博考羣籍爲明堂圖樣奏之又以張衡渾象用三分爲一度裴秀輿地以一寸爲千里臣之此圖以一分爲一尺推而演之又引于時議者或以綺井爲重屋或以圓楣爲隆棟將爲臆說事不經見今錄其疑難爲之通釋皆出證據以相發明爲議曰臣愷謹案淮南子曰昔者神農之御天下也甘雨以時五穀蕃植春生夏長秋收冬藏月省時考終歲獻貢以時嘗穀祀于明堂明堂之制有益而無四方風雨不能襲燥濕不能傷遷延而入之臣愷以爲上古朴略初立典刑尚書帝命驗曰帝者承天立五府以尋天重象赤曰文祖黃曰神斗白曰顯紀黑曰玄矩蒼曰靈府注云唐虞之天府夏之世室殷之重屋周之明堂皆

同矣尸子曰有虞氏曰總章周官考工記曰夏后氏世室堂修二十七博四修一注云修南北之深也夏度以步合堂修十四步其博並以四分修之一則堂博十七步半也臣愷案三王之世夏最爲古從質尚文理應漸就寬大何因夏室乃大殷堂相形爲論理恐不爾記云堂修二七博四修一若夏度以步則應修七步注云今堂修十四步乃是增益記文殷周二堂獨無加字便是義類例不同山東禮本輒加二七之字何得殷無加尋之文周闕增進之義研窮其趣或是不然讎校古書竝無二字此乃桑間俗儒信情加減黃圖議云夏后氏益其堂之大百四十四尺周人明堂以爲兩杆間馬宮之言止論堂之一面據此爲準則三代堂基竝方得爲上圓之制諸書所說竝爲下方鄭注周官獨爲此義非直與古違異亦乃乖背禮文尋文求理深恐未愜尸子曰殷人陽館考工記

曰殷人重屋堂修七尋堂崇三尺四阿重屋注云其修七尋五丈六尺放周夏則其博九尋七丈二尺又曰周人明堂度九尺之筵東西九筵南北七筵堂崇一筵五室凡室二筵禮記明堂位曰天子之廟複廟重檐鄭注云複廟重屋也注玉藻云天子廟及路寢皆如明堂制禮圖云於內室之上起通天之觀觀八十一尺得宮之數其聲濁君之象也大戴禮曰明堂者古有之凡九室室有四戶八牖以茅蓋上圓下方外水曰璧雍赤綴戶白綴牖堂高三尺東西九仞南北七筵其官方三百步凡人疾六畜疫五穀災生於天道不順天道不順生於明堂不飾故有天災則飾明堂周書曰明堂方百一十二尺高四尺階博六尺三寸室居內方百尺室內方六十尺高八尺博四尺作洛曰明堂太廟路寢咸有四阿重亢重廊孔氏注云重亢當系棟重廊累屋禮圖曰秦明堂九室十二階

各有所居呂氏春秋曰有十二堂與月令同竝不論尺丈臣愷案十二階雖不與禮合一月一階非無理思黃圖曰堂方百四十四尺坤之策也方象地屋圓楯徑二百一十六尺乾之策也圓象天室九宮法九州太室方六丈法陰之變數十二堂法十二月三十六戶法極陰之變數七十二牖法五行所得日數八達象八風法八卦通天臺徑九尺法乾以九覆六高八十一尺法黃鍾九九之數二十八柱象二十八宿堂高三尺土階三等法三統堂四向五色法四時五行殿門去殿七十二步法五行所行門堂長四尺取太室三之二垣高無蔽目之照牖六尺其外倍之殿垣方在水內法地陰也水四周於外象四海圓法陽也水闊二十四丈應二十四氣水內徑三丈應觀禮經武帝元封二年立明堂汶上無室其外略依此制泰山通義今亡不可得而辨也元始四年八月起明

堂壁雍長安城南門制度如儀一殿垣四面門八觀水外周堤壤高四方和會築作三旬五年正月六日辛未始郊太祖高皇帝以配天二十二日丁亥宗祀孝文皇帝於明堂以配上帝及先賢百辟卿士有益者於是秩而祭之親扶三老五更祖而割牲跪而進之因班時令宣恩澤諸侯宗室四夷君長匈奴西國侍子悉奉貢助祭禮圖曰建武三十年作明堂堂上圓下方圓法天方法地十二堂法日辰九室法九州八窗象八風八九七十二法一時之王室有二戶二九十八戶法土王十八日內堂正壇高三尺土階三等胡伯始注漢官云古清廟蓋以茅今蓋以瓦瓦下藉茅以存古制東京賦曰乃營三宮布政頒常復廟重屋八達九房造舟清池惟水泱泱薛綜注云復重廟覆謂屋平覆重棟也續漢書祭祀志曰明帝永平二年祀五帝於明堂五帝坐各處其左黃帝在未皆

如南郊之位光武位在青帝之南少退西南各一犢奏樂如南郊臣愷案詩云我將祀文王於明堂也我將我享維羊維牛據此則備大牢之祭今云一犢恐與古殊自晉以前未有鴟尾其門墻壁水一依本圖晉起居注裴頠議曰尊祖配天其義明著廟宇之制理據未分直可爲一殿以崇嚴祀其餘雜碎一皆除之臣愷案天垂象聖人則之辟雍之星既有圖狀晉室方構不合天文既闕重樓又無璧水空堂乖五室之義直殿違九階之文非古欺天一何過甚後魏於北臺城南造圓墻在璧水外門在水內迴立不與墻相連其堂上九室三三相重不依古制室間通巷違舛處多其室皆用擊累極成褊陋後魏樂志曰孝昌二年立明堂議者或言九室或言五室詔斷從五室後元又執政復改爲九室遭亂不成宋起居注曰孝武大明五年立明堂其墻宇規範擬則太廟唯十二

間以應基數依漢汶上圖儀設五帝位太祖文皇帝對饗鼎俎簋
 簋一依廟禮梁武卽位之後移宋時太極殿以為明堂無室十二
 間禮疑議云祭用純漆俎瓦樽文於郊質於廟止一獻用清酒平
 陳之後臣得目觀遂量步數記其尺丈猶見焚燒殘柱毀破之餘
 入地一丈儼然如舊柱下以樟木為跗長丈餘闊四尺許兩兩相
 竝凡安數重宮城處所乃在郭內雖湫隘卑陋未合規摹但祖宗
 之靈得崇嚴祀周齊二代闕而不修大饗之典於焉靡託自古明
 堂圖唯有二本一是宗周劉熙阮譔劉昌宗等作三圖略同一是
 後漢建武三十年作禮圖有本不詳撰人臣遠尋經傳傍求子史
 研究衆說總撰今圖其樣以木為之下為方堂堂有五室上為圓
 觀觀有四門帝可其奏會遼東之役事不果行以度遼之功進位
 金紫光祿大夫其年卒官帝甚惜之謚曰康撰東都圖記二十卷

明堂圖議二卷釋疑一卷見行於世長子儒童游騎尉少子温起
 部承務郎

侯莫陳崇字尚樂代武川人也其先魏之別部居庫斛真水祖元
 以良家子鎮武川代因家焉父興殿中將軍羽林監後以崇著勳
 追贈柱國太保清河郡公崇少驍勇善騎射謹慤少言年十五隨
 賀拔岳與尔朱榮征葛榮後崇岳入關破赤水蜀又從岳力戰破
 万俟醜奴崇與輕騎逐北至涇州長坑及之賊未成列崇單騎入
 賊中於馬上生禽醜奴遂大破之封臨涇縣侯及岳為侯莫陳悅
 所害崇與諸將同謀迎周文帝文帝至軍原州刺史史歸猶為悅
 守周文遣崇襲歸直到城下即據城門時李遠兄弟在城內先知
 崇來中外鼓譟伏兵悉起遂禽歸斬之以崇行原州事仍從平悅
 別封廣武縣伯累遷儀同三司改封彭城郡公從禽竇泰復弘農

破沙苑戰河橋又別討平稽胡累戰皆有功進位柱國大將軍六
官建拜大司空周孝閔踐阼進封梁國公加太保歷太宗伯大司
徒保定三年從武帝幸原州時帝夜還京師竊怪其故崇謂所親
人常昇曰吾比日聞卜筮者晉公今年不利車駕今忽夜還不過
是晉公死耳於是皆傳之或有發其事者帝集諸公卿於大德殿
責崇崇惶懼謝罪其夜護遣使將兵就崇宅逼令自殺葬禮如常
儀謚曰躁護誅改謚曰莊閔子芮嗣位柱國從武帝東伐率衆守
太行道并州平授上柱國仍從平鄴拜大司馬隋文大業初以譴
詔流配嶺南芮弟穎

穎字遵道少有器量風神警發爲時輩所推魏大統末以父軍功
賜爵廣平侯累遷開府儀同三司周武帝時從滕王道擊龍泉文
城叛胡穎與柱國豆盧勣分路而進穎懸軍五百餘里破其三柵

隋陸

先是稽胡叛亂輒略邊人爲奴婢至是詔胡有厭匿良人者誅籍
沒其妻子有人言爲胡村所隱匿者勣將誅之穎曰將在外君命
有所不行諸胡固非悉反但相迫脇爲亂今慰撫自可不戰而定
如卽誅之轉相驚恐爲難不細未若召其渠帥以隱匿者付之令
自歸首則羣胡可安勣從之諸胡爭降附北土以安遷司武加振
威中大夫隋文帝受禪加上開府進爵昇平郡公平陳之役以行
軍總管從秦王俊出魯山道與行軍總管段文振度江安集歸附
再遷瀛州刺史甚有惠政後坐與秦王俊交通免官百姓送者莫
不流涕因相與立碑頌穎清德後拜邢州刺史仁壽中吏部尚書
牛弘持節巡撫山東以穎爲第一上優詔褒揚時朝廷以嶺南刺
史縣令多貪鄙蠻夷怨叛妙簡清吏於是徵穎入朝上與言及平
生以爲歡笑卽日進位大將軍拜桂州總管十七州諸軍事及至

官大崇恩信人夷悅服煬帝卽位頴兄梁國公芮坐事徙邊朝廷恐頴不自安徵還京師後拜恒山太守其年嶺南閩越多不附帝以頴前在桂州有惠政爲南方所信伏拜南海太守卒官謚曰定子虔會最知名

崇兄順少豪俠有氣度初事尒朱榮爲統軍普泰元年封木縣子後從魏孝武入關順與周文帝同里閭素相友善且崇先在關中周文見之甚歡進爵彭城郡公及梁企定圍逼河州以順爲大都督與趙貴討破之卽行河州事大統四年魏文帝東討順與太尉王盟僕射周惠達等留鎮長安時趙青雀反盟及惠達奉魏太子出次渭北順於渭橋與賊戰頻破之魏文帝還執順手曰渭橋之戰卿有殊力便解所服金鏤玉梁帶賜之南岐州氏羌符安壽遂率部落一千家款附時順弟崇又封彭城郡公遂改封順河間郡

公六年加驃騎大將軍開府儀同三司行西夏州事改封平原郡公周孝閔帝踐阼拜少師進位柱國其年薨崇弟瓊歷位荊州總管上柱國封修武郡公瓊弟愷以軍功賜爵下蔡縣男崇以平原州功賜爵靈武縣侯詔聽轉授凱孝閔踐阼進位開府儀同三司進爵爲公天和中爲司會中大夫建德二年爲聘齊使主

王雄字雄胡布頭太原人也父喻以雄著勲追贈柱國大將軍少傅安康郡公雄儀貌魁梧少有謀略魏末從賀拔岳入關除金紫光祿大夫孝武西遷封臨真縣伯大統中進爵武威郡公累遷大將軍行同州事恭帝元年賜姓可頻氏周孝閔帝踐阼授少傅進位柱國大將軍武成初進封庸國公邑萬戶出爲涇州總管保定四年從晉公護東征至華山與齊將斛律明月戰退走左右皆散矢又盡唯餘一奴一矢在焉雄案稍不及明月者丈餘曰惜爾不

得殺但生將爾見天子明月反射雄中額抱馬走至營薨贈使持節太保同華等二十州諸軍事同州刺史謚曰忠子謙謙字敕萬性恭謹無他才能以父功封安樂縣伯保定二年父雄封庸國公以武威郡公回封謙安樂伯回封第三弟震雄死朝議以謙父殞行陣特加殊寵授柱國大將軍襲爵庸國公建德五年武帝東征謙力戰進位上柱國六年授益州總管十八州諸軍事及宣帝崩隋文帝輔政以梁睿為益州總管時謙使司錄賀若昂奉表詣闕昂還具陳京師事謙以父子受國恩將圖匡復遂舉兵署置官司總管長史乙弗虔益州刺史達奚基勸謙憑險觀變隆州刺史高阿那肱為謙畫三策曰公親率精銳直指散關蜀人知公有勤王之節必當各思效命此上策也出兵梁漢以顧望天下此中策也坐守劔南發兵自衛此下策也謙參用其中下之策梁

睿未至大劔謙先遣兵鎮始州隋文帝即以睿為行軍元帥便發利鳳文秦成諸州兵討之謙所署柱國達奚基高阿那肱大將軍乙弗虔楊安任峻侯翕景屏等眾號十萬盡銳攻利州總管楚國公豆盧勣拒戰將四旬基等諸軍聞睿將至眾遂潰謙所署大將軍符子英攻巴州又為刺史呂珽所破睿乘其弊縱兵深入基虔密遣使詣睿請為內應以贖罪謙不知基虔之反已也竝令守成都謙先無籌略且所任用多非其才及聞睿兵奄至惶懼計無所出乃自率眾逆戰又以基虔之子為左右軍行數十里左右軍皆叛謙奔新都縣令王寶執而斬之傳首京師基虔以成都降隋文帝以基虔首謀令殺之於蜀市餘眾竝散阿那肱尋亦被誅論曰李弼懷佐時之略逢興運之期締構艱難綢繆顧遇方面宣其庸績帷幄盡其謀猷非唯攀附成名抑亦才名自取密遭風雲

之會奮其鱗翼思封函谷將割鴻溝暮月之間衆數十萬威行萬里聲動四方雖事屈與王運乖天眷而雄名克振何其壯歟然志性輕狡終致傾覆固其宜也宇文貴負將帥之材蘊剛銳之氣遭逢喪亂險阻備嘗自致高位亦云美矣忻武藝之風名高一代及晚節遇禍雖鳥盡弓藏然亦器盈斯槩夷戮非爲不幸愷學藝兼該思理通瞻規矩之妙參蹤班爾當時制度咸取則焉其起仁壽宮營建洛邑要求時幸窮侈極麗使文皇失德煬帝亡身危亂之原抑亦由此至於考覓書傳定明堂圖雖意過其通有足觀者侯莫陳崇以勇悍之氣逢戰爭之秋輕騎啟高平之扉追馬得長坑之後以宏材遠略附鳳攀龍茂績元勳位居上袞而識慙明哲遂以凶終惜哉王雄身參佐命謙寵列山河及投袂勤王志匡社稷雖忠君之效未宣與夫懷祿圖存者異也初魏孝莊帝以介朱榮

有翊戴之功拜榮柱國大將軍位在丞相上策敗後此官遂廢大統三年魏文帝復以周文帝建中興之業始命爲之其後功參佐命望實俱重者亦居此職自大統十六年已前任者凡有八人周帝位總百揆都督中外軍事魏廣陵王欣元氏懿戚從容禁闥而已此外六人各督二大將軍分掌禁旅當爪牙禦侮之寄當時榮盛莫與爲比故今之稱門閥者咸推八柱國家今并十二大將軍錄之於左使持節太尉柱國大將軍大都督尚書左僕射隴右行臺少師隴西郡開國公李諱使持節太傅柱國大將軍大宗師大司徒廣陵王元欣使持節柱國大將軍大都督大宗伯趙郡開國公李弼使持節柱國大將軍大都督大司馬河內郡開國公獨孤信使持節柱國大將軍大都督大司寇南陽郡開國公趙貴使持節柱國大將軍大都督大司空常山郡開國公于謹使持節柱國

大將軍大都督少傅彭城郡開國公侯莫陳崇與周文帝為八柱
 國使持節大將軍大都督少保廣平王元贊使持節大將軍大都
 督淮安王元育使持節大將軍大都督齊王元廓使持節大將軍
 大都督平原郡開國公侯莫陳順使持節大將軍大都督北州諸
 軍事秦州刺史章武郡開國公宇文遵使持節大將軍大都督雍
 州諸軍事雍州刺史高陽郡開國公達奚武使持節大將軍大都
 督陽平郡開國公李遠使持節大將軍大都督范陽郡開國公豆
 盧寧使持節大將軍大都督化政郡開國公宇文貴使持節大將
 軍大都督荊州諸軍事荊州刺史博陵郡開國公賀蘭祥使持節
 大將軍大都督陳留郡開國公楊忠使持節大將軍大都督岐州
 諸軍事岐州刺史武威郡開國公王雄是為十二大將軍每大將
 軍督二開府凡為二十四員分團統領是二十四軍每一團儀同

二人自相督率不編戶貫都十二大將軍十五日上則門欄陛戟
 警晝巡夜十五日下則教旗習戰無他賦役每兵唯辦弓刀一具
 月簡閱之甲槊戈弩竝資官給自大統十六年以前十二大將軍
 外念賢及王思政亦拜大將軍然賢作牧隴右思政出鎮河南竝
 不在領兵之限此後功臣位至柱國及大將軍者眾矣不限此秩
 無所統御六柱國十二大將軍之後有以位次嗣掌其事者而德
 望素在諸公之下竝不得預於此例

北史卷六十

列傳第四十八終

雙龍毛鳳
氏蘭南開



